



UNIVERSITÄTS-
BIBLIOTHEK
PADERBORN

Universitätsbibliothek Paderborn


Opvscvla Petri De Marca Archiepiscopi Parisiensis

Marca, Pierre de

Parisiis, 1681

VIII. De veteribus collectionibus canonum.

urn:nbn:de:hbz:466:1-14704



DISSE R T A T I O
D E
V E T E R I B V S
C O L L E C T I O N I B V S
C A N O N V M.

C A P V T P R I M V M.

*De vetustissima collectione canonum Ecclesiae
Romanae ante Concilium Chalcedonense.*

I. **D**VÆ sunt, quæ huc usque latuerunt, canonum collectiones, quibus usus est variis temporibus Ecclesia Romana: quarum altera post Concilium Nicenum emersit, altera post Chalcedonensem.

De prima acturis observandum est, ante Concilii Chalcedonensis definitionem canone primo comprehensam, qua regulis patrum robur & auctoritas additur ut per

universam Ecclesiam vigeant , canones
Ancyranos , Neocæsarienses , Gangren-
ses , Antiochenos , & Laodicenos in oc-
cidentem non penetrasse . Solis Ecclesia
Romana canonibus Nicænis regebatur,
ut disertè docet Innocentius in epistola
ad clerum Constantinopolitanum . Quo
nomine Sardicenses continebantur ; ut
patet ex Zosimi commonitorio quod Fau-
stino Legato suo dedit ad firmandum in
Africa usum appellationum in causis Epis-
coporum : ubi canon in Sardicensi syno-
do ea de re editus , sub titulo Concilii
Nicæni profertur . Refragati sunt quidem
Africaní Episcopi , & canonem illum in
veris exemplaribus synodi Nicænæ non
haberi contenderunt , contra nitentibus
Legatis Zosimi . Qui quidem adeo ab om-
ni fraudis & doli suspicione aberat , quem-
admodum & Bonifacius illius successor , ut
passus sit Legatos à Carthaginensi synodo
Constantinopolim & Alexandriam mitti
ad earum civitatum Episcopos ut exem-
pla canonum Nicænorum ex authenticis
codicibus descripta mitterent . Illi vero
testati sunt canones illos numero viginti
esse tantum ; quales Africana Ecclesia
penes se habebat . Vnde factum ut con-
stiterit Romanis , æquè ac Africanis , ca-
nones illos Sardicenses alios esse à Nicæ-

nis. Quod tamen non obstatit quò minus Leo I. in epistola ad Pulcheriam, conque-
rens de Flaviani Episcopi Constantinopo-
litani & ceterorum sacerdotum deposi-
tione à synodo Ephesina sub Dioscoro de-
creta, eosdem Sardicenses canones, sub
nomine Nicænorum, orientalibus obji-
ciat, contendens ex eorum præscripto
omnia in pristino statu retinenda donec
ad Apostolicam sedem referatur.

II. Innocentius quoque primus in epi-
stola ad Vicitricium, post commemoratam
Nicænam synodum, ait majores causas
ad sedem apostolicam referendas, *sicut
synodus statuit, & vetus consuetudo exigit.*
Vnde sequi videtur eum ad Nicænam sy-
nodum respexisse, cui acceptos ferebat
canones, ad Sardicense licet Concilium
pertinerent, quos postea Zosimus quo-
que Nicænos esse jactabat; præcipue
cum Innocentius solos, ut monebam, ca-
nones Nicænos obtinuisse apud Roma-
nam Ecclesiam doceat.

III. Occasio istius hallucinationis alia
non est præter collectionem canonum
quam solam ea tempestate in scriniis suis
habebat Ecclesia Romana; cuius nos
exemplar in vetustissimo codice M S. vi-
dimus beneficio Christophori Iustelli cla-
re memoriæ viri & antiquitatum eccle-

siaſticarum curiosi exploratoris : qui licet communionis Calvinianæ partes ſequetur , ſincerè ſe gerebat in eruendis è ſitu veterum monumentis ad rem canonicam exornandam.

In ea collectione hoc erat lemma : **CANONES NICÆNI**. Deinde ſequatur ſeries quadraginta canonum numeris ſuis diſtinctorum : quorum priores viginti erant veri & genuini canones Nicænae synodi , reliqui autem viginti continebant canones unum & viginti Concilii Sardicensis , duobus capitibus in unum compactis ; nulla interim mentione facta hujus Concilii Sardicensis. Non dubitandum , quin ſtatim post editionem adjecti fuerint canones illi Sardicenses priori collectioni , conſequentibus numeris , ſub antiquo titulo. Illud autem an fato acciderit , vel per incuriam , an verò data opera , ut major eſſet horum canonum auctoritas , prudentis eſto judicium. Sanè in veteribus codicibus reperiri canones Nicænos numero quadraginta adnotatum eſt in editione Moguntina Dionysii Exigui . qua collectio ſimilis eſt antiquæ illi quam nos vidimus. Nec alia erat collectio quadraginta canonum Nicænorum , cuius meminit præfatio Isidori : unde auctor ille occationem arripuit augendi numerum uſ.

que ad LXXII. ex supposititiis Iulii epistolis.

IV. Quare Innocentius, Zosimus, & Leo alieni sunt ab omni dolo in proferebant canonibus Sardicensibus ac si ad Nicænam synodum pertinerent, cùm auctoritate scriniorum suorum & veteris collectionis freti essent. Viri amplissimi eruditio & dignitate Cardinales Perronius & Baronius, ut horum Pontificum bonam fidem tuerentur, ex ingenio conjecterant ea illos collectione canonum usos esse quam nos olim in Ecclesia Romana extitisse testimoniis comprobavimus.

C A P V T I I .

De collectione canonum post Concilium Chalcedonense.

I. D E C R E T I Chalcedonensis ea fuit auctoritas ut canones orientalium synodorum, qui vigebant in oriente, suscepit Ecclesia Romana, eosque adhibuerit in causarum & negotiorum ecclesiasticorum disceptatione; demptis iis quos juribus suis officere existimabat. Quare codicem illum canonum ex quo recitati sunt canones aliquot in Concilio Chalcedonensi Romam Legati cùm de-

tulissent, auctoritate Leonis Papæ confessa est & composita nova canonum collectio, quæ viguit sola in occidente per sexaginta & amplius annos, donec altera quoque accessit Dionysii Exiqui, quæ in quibusdam à priore discrepat, ut mox observabimus.

II. Priorem illam, hactenus ignotam, ex codicibus duobus manuscriptis monasterii Rivipullensis in Catalonia favente numine erutam hic explicamus: quæ majoris ponderis apud nos esse debet quod ea usi sint Gallicani Episcopi usque ad tempora Hadriani Pontificis & Caroli Magni, & unà cum Gallicanis canonibus ab Ecclesia Hispanica usurpata fuerit usque ad Sarracenorum adventum; quemadmodum etiam in Africa.

Ejus autem collectionis hæc est methodus. Incipiunt canones Nicæni. Sequuntur Ancyranæ, Neocæsarienses, & Gangrenses. Deinde Sardicenses canones. Postea Antiocheni, & Laodiceni. Subiunguntur statim viginti septem canones Concilii Chalcedonensis. Deinde Carthaginenses; de quibus mox dicemus.

III. Huic collectioni præfigitur prefatio, cujus hæc sunt verba. *Canones generalium Conciliorum à temporibus Constantini cœperunt. In præcedentibus annis namque,*

persecutione fervente, docendarum plebium minime dabatur facultas. Inde Christianitas in diversas haereses scissa est : quia non erat licentia Episcopis in unum convenire, nisi tempore supradicti Imperatoris. Ipse enim dedit facultatem Christianis liberè congregari. Sub hoc etiam sancti patres in Concilio Nicæno de omni orbe terrarum convenientes, juxta fidem evangelicam & apostolicam secundum post apostolos symbolum tradiderunt. Quatuor autem principalia esse Concilia, ex quibus plenissimam fideli doctrinam tenet Ecclesia tam de patris & filii & spiritus sancti divinitate quam de praedicti filii & salvatoris nostri incarnatione. Prior harum Nicæna synodus est CCCXVII. Episcoporum Constantino Augusto imperante peracta : in qua Arrianæ perfidie blasphemia condemnata, quam de inæqualitate sanctæ trinitatis idem Arrius asserebat. Consubstantiam Deo patri Deum filium eadem sancta synodus per symbolum definivit. Secunda synodus est CL. patrum sub Theodosio seniore Constantiopolim congregata ; quæ Macedonium sanctum spiritum Deum esse negantem condemnans, consubstantiam patri & filio eundem paraclitum demonstravit, dans latius symboli formam quam tota Grecia & Latinitas in Ecclesiis prædicat. Tertia synodus Ephesina c.c. Episcoporum sub juniore Theodosio Augusto edita ; quæ Nestorium duas personas in Christo asserentem justa

anathemate condemnavit, ostendens manere in
duas naturas unam Domini Iesu Christi per-
sonam. Quarta est synodus Chalcedonensi
sexcentorum xxx. sacerdotum sub Martiano
Principe habita; in qua Eutychem Constanti-
nopolitanum Abbatem, verbi Dei & carnis
unam naturam pronuntiantem, & ejus defen-
sorem Dioscorum quondam Alexandrinum Epis-
copum, & ipsum rursum Nestorium, cum n-
liquidis hæreticis, una patrum sententia prædam-
navit, prædicans eadem synodus Christum Deum
sic natum de virgine ut unam personam &
divinæ & humanæ confiteamur naturæ. Haec
sunt, ut prædictimus, quatuor principales &
venerabiles synodi totam fidem catholicam com-
pletentes. Sed & si qua sunt Concilia quo
sancti patres spiritu Dei pleni sanxerunt, po-
istorum quatuor auctoritatem omni manent fa-
bilita vigore. quorum etiam gesta in hoc corpo-
re condita continentur. In principio autem ha-
jus voluminis Nicænam synodum constituimus
pro auctoritate ejusdem magni Concilii. Dein
ceps diversorum Conciliorum Græcorum ac La-
tinorum, sive quæ antea, sive quæ postinodum
facta sunt, sub ordine numerorum ac tempo-
rum, capitulis suis distincta, sub hujus volu-
minis aspectu locavimus. Subjicientes etiam de-
creta Præsulum Romanorum, in quibus, pro-
culmine sedis apostolice, non impar Conciliorum
extat auctoritas: quatenus ecclesiastici ordinis
disciplina

disciplina in unum à nobis coacta atque digesta
Et sancti præfules paternis constringantur regu-
lis, Et obedientes Ecclesiæ ministri vel populi
spiritualibus imbuantur exemplis. Canones au-
tem qui dicuntur Apostolorum, seu quia eisdem
nec sedes apostolica recipit, nec sancti patres
illis consensum præbuerunt, pro eo quod ab hæ-
reticis sub nomine Apostolorum compositi di-
noscuntur, quamvis in eis quedam invenian-
tur utilia, auctoritate tamen canonica atque
apostolica eorum gesta constant esse remota, Et
inter apocrypha deputata.

IV. Priorem hujus præfationis par-
tem Isidorus Hispalensis retulit in librum
sextum originum cap. xv. Etenim cùm
sibi proposuisset eo capite de canonibus
Conciliorum agere, solenneque illi sit
laudabiles locos, qui suo instituto con-
ducunt, tacitis auctoribus in opus illud
congerere, (quo nomine ab eruditissima
majorem consecutus est laudem) more illo
suo hunc quoque centonem aliis addidit,
& iisdem verbis præfationem illam ex par-
te transcripsit. Si quis autem pervicaciter
contendere velit ex Isidorō potius de-
promptam hanc præfationem, omnino se
victum fatebitur si se deposito dimicandi stu-
dio perpendat præfationis corpus esse in-
tegrum, aliquot periodos complectens
uno spiritu cum prioribus conjunctas;

O

quæ tamen desunt apud Isidorum , qui ex loco laudato decerpit quod sibi commodum videbatur. Deinde ultima verba excerpti quod est apud Isidorum , ista nempe , *Quorum etiam gesta in hoc opere condita continentur* , nullius operæ sunt in libris originum ; imò verò apertè falsa , cùm in eo volumine nec canonum nec Conciliorum acta contineantur. Quare prudenter observavit vir eruditus in scholiis hujus loci : *Hæc omissa oportuit.* Quæ sanè verba in præfatione leguntur opportunè , quia præfixa est collectioni canonum. Vnde ex scriptor qui jussu Isidori in origines hunc locum transtulit , manifestè hallucinatus est non omittendo verba hæc , quæ in volume canonum sunt aptissima , sed ab originibus prorsùs aliena. Pars ultima præfationis , quæ reprobat canones Apostolorum , transcripta est à Gratiano ex Isidoro. qua de re capite sequenti dicemus.

*Dif. 16. c. I.
Canones.*

V. Ex hac collectione Symmachus Papa in sexta synodo Romana habita anno DIV. citat duos canones synodi Gangrensis ex versione antiqua quæ est in hac collectio ne. Vnde *apostolica auctoritate hos canones conditos* ait ; quoniam etsi provincialis esset synodus Gangrensis , tamen cùm auctoritate sedis apostolicæ jam esset in occi-

dente recepta , perinde erat ac si ab initio eadem auctoritate canones suos constituisse. Neque enim confugiendum est ad conjecturas quas adhibet Baronius, qui putat Osium Cordubensem legatione Romana functum huic synodo interfuisse. Recensetur quidem ille in epistola synodica, sed permisus aliis Episcopis , & inter ultimos. quod non congruit dignitati sedis apostolicæ.

C A P V T III.

De discrimine collectionis istius & Dionysianæ.

I. **N**E eo primùm differunt hæ duæ collectiones , vetus & Dionysiana, quòd diversis canonum Græcorum translatis utantur. In vetere quippe interpretatione canonum Græcorum eadem est omnino cum illa quam Isidori collectio præfert, quæque usurpatur in libris Capitularium ; ut ex studiosa earum inter se collatione didicimus. Planè Dionysiana versio videtur esse accurasier & verbis magis affixa. Sed altera est elegantior ; & verba quædam si alicubi dissimulet , alibi sententiam veram canonis , alioquin obscuri , feliciter patefacit. Hæcque est illa translatio cuius obscuritate adductum se

O ij

Dionysius fatetur ad novam condendam.
Quamquam & alia quoque in manuscrip-
tis codicibus reperiatur paulò obscurior
hac nostra.

II. Alia sunt discrimina inter utram-
que collectionem quæ sunt majoris pon-
deris , & meram antiquitatem redolent.
Secunda ergo differentia hæc erit , quod
canones apostolici absunt ab ista collec-
tione , eo titulo quod nullius essent au-
toritatis , ut docet disertè superior præ-
fatio. In quo illi egregiè convenit cum
decreto Gelasii in synodo Romana , quo
liber canonum Apostolorum inter apo-
crypha numeratur. Inde quoque præstans
argumentum trahitur hanc esse collectio-
nem canonum qua Gallicana Ecclesia ute-
batur ; quippe quæ his canonibus Apo-
stolorum careret , ut ex Gregorio Tu-
ronensi docuimus libro III. de con-
cordia sacerdotii & imperii cap. IV. §.
III.

III. At Dionysiana collectio cano-
nes istos , saltem priores numero quin-
quaginta , in occidentem invexit. Et ejus
exemplum auctor Isidorianæ collectionis
eodem numero & iisdem verbis cum Dio-
nysio canones illos transtulit in suam,
licet in canonibus Græcis versionem an-
tiquam sequatur : quæ cùm istis canoni-

bus apostolicis careret, necessariò ex Dionysii versione & collectione petendi fuerunt. Rationem facti sui hanc proponit Isidorus : *Denique propter eorum auctoritatem ceteris Conciliis præposuimus canones qui dicuntur Apostolorum, licet à quibusdam apocryphi dicantur : quoniam plures eos recipiunt, & sancti patres eorum sententias synodali auctoritate roboraverunt, & inter canonicas posuerunt constitutiones.* Quòd synodalem partim auctoritatem laudat, de synodo Trulensi intelligendum est ; cuius decreto canones apostolici numero LXXXIV. recepti sunt in oriente. Priores autem quinquaginta, qui soli erant in occidente noti, nullum robur obtinuerunt, saltem in Galliis & Hispaniis, usque ad tempora Caroli Magni ; quando Dionysiana collectio, monente Hadriano Papa, vigere incepit in his regionibus.

IV. Tertium discrimin versatur in canonibus Sardicensis Concilii, qui loco quinto positi sunt in hac collectione post Nicænos, Ancyranos, Neocæsarienses, & Gangrenses, & Antiochenos atque Laodicenses ordine antecedunt. Ancyra, Neocæsariensis, & Gangrensis synodi vetustiores sunt Nicæna synodo ; sed istius reverentia factum est ut in capite collocetur. His quatuor succedit Sardi-

O iii

censis anno cccxlvi. quæ licet posterior Antiochena , (quæ coacta fuit anno cccxli.) illi tamen in hac serie prælata est ob dignitatem. Dionysius vero collectionis Græcæ interpretationem aggressus , in qua Sardicenses canones non habentur , eis post universos canones orientalium Conciliorum , licet tempore posteriorum , locum in sua collectione dedit.

V. Memoriæ lectoris occurret quod superius adnotavimus de Leone primo , qui canones Sardicenses sub nomine Nicænorum orientalibus objiciebat. Ex quo sequi videtur ut aut de bona fide periclitetur ille , cum ex hac collectione , quam ejus auctoritati tribuimus , illi constaret liquidò alios esse Sardicenses canones , quinto loco positos , à Nicænis , qui frontem codicis occupabant ; vel dicendum erit hanc collectionem posteriorem esse Leonis temporibus.

VI. Sed ex temporum discrimine pendet hujus difficultatis explicatio. Ante Concilium Chalcedonense data est epistola Leonis ad Pulcheriam anno cccc-xlix. ubi Nicænos canones cum Sardicensibus permisset; adeo ut querelæ literis illis comprehensæ , de fide violata , Flaviano oppresso , & restituto Eutychete , Mar-

cianum auctore Leone ad convocandum Chalcedonense Concilium adegerint. Post illud verò Concilium (quod habitum est anno cccc l i .) & ex ejus præscripto aggredienda fuit nova collectio , in quam canones orientalium synodorum impingerentur. Tunc discutienda fuit ratio temporum , & suis quique Conciliis canones vindicandi. Quod egregiè factum est in hac collectione ; in qua Sardenses à Nicænis secreti sunt , & suis locis positi.

VII. Vnde quoque illud addiscimus , eos graviter falli qui Sardenses canones universo orbi Christiano , etiam ipsi Romanæ Ecclesiæ , vel ignotos vel apocryphos fuisse docent usque ad tempora Dionysii Exigui , qui eos è tenebris in lucem primus protulerit. Etenim ista collectio ne , quæ antiquior est Dionysiana , in canonum auctoritatem recepti sunt per universas Ecclesias. Planè illorum usus receptus erat Damasi Papæ temporibus ; ut patet ex synodo Romana & edicto Gratiani à Sirmondo publicatis , ubi causæ Episcoporum datis à Romano Pontifice judicibus definiendæ constituuntur.

VIII. In Galliis invaluerant , licet tacito nomine , ante Leonis tempora ; cùm ex ejus epistola ad Episcopos pro-

O iiiij

vinciæ Viennensis constet Gallicanorum Episcoporum judicia per varias appellationes & relationes à Romanis Pontificibus retractata fuisse. quod initium aut robur habuit à Concilio Sardicensi. Idem juris obtinuit in Hispaniis ; ut patet ex epistola ejusdem Leonis ad Turibium Asturensem , qua synodum à quatuor provinciis Hispaniarum adversùs redivivam harresim Priscillianistarum habendam indicit , nempe à Tarragonensibus , Carthaginensibus , Lusitanis , & Gallæcis ; adjecto quòd si quid obstiterit quò minùs possit celebrari generale Concilium , Gallæcia saltem in unum conveniant sacerdotes : *Quibus congregatis , inquit , fratres nostri Idacius & Ceponius imminebunt , conjuncta cum eis instantia tua , quatenus de provinciali conventu remedium tantis vulneribus affetur.* Indictio synodi & delegatio Idacii & Ceponii Episcoporum ut synodo immineant , canonum Sardicensium auctoritate fulta est.

I X. Idem Pontifex per Mauritaniam Sardicensium canonum vigorem plenissimè exercuit , non solùm relationes synodi recipiendo , & responsis suis de relatis negotiis decernendo , quod jus est antiquius ipsa synodo Sardicensi , sed cognitione de causa Lupicini Episcopi suscepta , qui ad

eum provocaverat ; quam definiendam synodo provinciali Mauritaniæ reliquit , eamque habendam indicit juxta ordinem præscriptum in Sardicensi synodo . Vnde quoque desumptum est quod adjungit , contra ecclesiasticam disciplinam superordinatum fuisse Episcopum Lupicino , pendente appellatione ad Romanam fedem.

X. Sed quid hæremus in temporibus Leonis ? Ipſa Zosimi , Bonifacii , & Cælestini tantò vetustior disputatio cum Africanis Episcopis pro recipiendis appellationibus Episcoporum , prolatis quoque ipsis verbis canonum Sardicensium , nonne apertè docent eorum apud Romanos auctoritatem ; imò verò & apud Africanos , qui tandem provocantibus conſerunt ; id unum deprecantes , ne faciliùs admitterentur , & causæ in provinciis judicarentur ; ut patet ex epistola ad Cæleſtinum .

Ceterūm postquam collectio iſta in Iucem emersit auctoritate Leonis publicata , Africana Ecclesia illius uſum admisit , & canonum Sardicensium ut executionem , ſic etiam & nomen : quamquam ignoti non eſſent olim in Africa canones Sardenses , quorum unum Gratus Episcopus Carthaginensis laudavit in Concilio ſuo Carthaginensi .

XI. Collectionis ab Africanis usurpatæ breviarium sive compendium per varios titulos digestum composuit Ferrandus Diaconus Ecclesiæ Carthaginensis; & post illum breviationem alteram canonum Ecclesiæ Africanæ concinnavit Cresconius.

XII. Duæ illæ collectiones in eo differunt quod posterior usq; est collectione Dionysiana, laudatis tum Apostolorum tum Africanis canonibus juxta feriem numerorum qui extant apud Dionysium. Sed Ferrandus, Dionysio vetustior, antiquam collectionem fecutus est, quæ canonibus apostolicis carebat, quos auctor ille nunquam laudat; licet Ancyranos, Neocassarienses, Gangrenses, Antiochenos, & Laodicenos titulis suis distinctos adhibeat; omissis quoque canonibus Constantinopolitanis. Quæ omnia collectioni nostræ congruunt, & manifestè probant illam à Romanis in Africam transmissam fuisse: cui Africani suos canones, alio longè ordine quam habeantur in Dionysiana collectione, suis usibus profuturos adjunixerunt.

XIII. Porrò in breviario Ferrandi canones Sardicenses, illique præcipue quide provocationibus Episcoporum ad Romanam sedem decernunt, disertè laudan-

tur; quos ille non potuit unā cum canonibus orientalibus publicare aliunde de-
promptos quām ex collectione recepta,
cujus ipse compendium exhibit; quā
prorsūs eadem est cum hac nostra.

Ex ista quoque vetere collectione Theodoreetus Episcopus Cyri hausit canones Sardicenses, quos laudat numero xxi. in compendio canonum per quinquaginta titulos digestorum. Quā collectio Theodoreti existat M S. in bibliotheca Regis Christianissimi: de qua diximus in capite III. §. viii. libri iii. de concordia sacerdotii & imperii.

XIV. Quartum discrimen est, illudque maximi momenti, quod Dionysii codex tres canones synodi Constantinopolitanæ secundæ ex codice Græco transcriptos exhibit; in quibus Thracicæ, Ponticæ, & Asianæ diœceseon privilegia sic confirmantur ut primatus tribuatur Ecclesiæ Constantinopolitanæ, fiatque secunda post Romanam, ea ratione adjecta, quoniam Constantinopolis est nova Roma. Sed canones isti in hac vetere collectione penitus desiderantur. Ex quo solo capite illius veritatem colligere & genuinam Romanæ Ecclesiæ collectio-
nem hanc esse demonstrare licet.

XV. Quippe nota est vehemens illa

dimicatio quæ in Concilio Chalcedonen. si inter Aëtium Archidiaconum Ecclesiæ Constantinopolitanæ & Legatos Romanos exarsit ob canonem xxviii. quo præter Metropolitarum ordinationes in tribus illis diœcesibus ascriptas sedi Constantinopolitanæ, exæquata erant privilegia utriusque sedis, etiam in rebus ecclesiasticis, eò quod nova Roma senatu & imperio, æquè ac senior Roma, poteretur, hoc solo excepto quod Ecclesia Constantinopolitana secunda esset post Romanam. Legatis illa se absentibus clavulum gesta & per vim ab Episcopis extorta conclamantibus, magistratus Principis interlocuti sunt, ut quibus se canonicibus tueretur Aëtius, proferret in medium: qui synodicum synodi Constantinopolitanæ exhibuit, & ex eo relegi fecit tres canones qui extant apud Dionysium, omissis aliis quos ultima collectio Græcorum continet.

XVI. Legati, post prolatum canonem sextum Nicænum, cùm judicum cognitorum sententia irritam vidissent intercessionem suam, se ad sedem apostolicam omnia relatuos contestati sunt. Leo totius rei certior factus, Anatolii Patriarchæ superbos conatus seria oratione compressit, & inter cetera afferuit canones il-

los Constantinopolitanos nunquam ad decessores suos relatos fuisse aut ab iis probatos. Aiebat quidem Eusebius Episcopus Dorylæi, in actione ultima Concilii Chalcedonensis, canonem istum Constantinopolitanum Leoni gratum fuisse. *Hanc regulam, scilicet synodi Constantinopolitanæ, sanctissimo Papæ in urbe Romæ ego relegi, inquit, præsentibus clericis Constantinopolitanis, eamque suscepit.* Sed insinuatio ista privata, quando agebatur de causa Flaviani Constantinopolitani per summum scelus à Dioscoro Alexandrino damnati, ut faciebat ad augendam hominis audaciam, qui dignioris Ecclesiæ Episcopum oppreßerat, quæ dignitas canone Constantinopolitano probabatur, sic obtinere non poterat ut canon ille publica auctoritate Romanæ Ecclesiæ receptus dici posset.

XVII. Successit tandem collectio Dionysii, quæ occidenti canones illos tres Constantinopolitanos à corpore Græcorum desumptos publicavit, Id tamen non fuit impedimento quin Gregorius Magnus Ioannis Patriarchæ Constantinopolitani temeritatem comprimens, professus sit canones synodi Constantinopolitanæ, quibus ille nitebatur, nunquam ab Ecclesia Romana receptos. Quod

222 sanctus ille vir afferere potuit & debuit, quoniam collectio illa vetus, quæ publici juris facta fuerat, canones illos ut repudiatos & ab apostolica sede rejectos non continebat. Alioqui si sola Dionysii collectione, quæ tunc manibus omnium terebatur, usâ fuisset Ecclesia Romana, retorqueri potuisset in Gregorium tres illos canones, ut pote non expunctos, juris publici factos. Quam exceptionem elidere poterat prolatis contrariis instrumentis vetustioribus, nempe collectione isthac à Leone approbata, quæ illis omnino caret.

XVIII. Quod attinet ad canones Concilii Chalcedonensis; utraque collectio, tum vetus, tum Dionysiana, solos viginti septem continet, omisso x x v i i i. qui ob Leonis reprobationem nunquam in canorum censum adscriptus est; neque etiam apud orientales, ut patet ex Dionysio, qui collectionem illorum in Latinam linguam vertit. Vnde Theodoretus in sua synagoge & Theodorus lector viginti septem numero canones Chalcedonenses concludunt. Synodus deinde habita in Trullo vigesimum octavum in auctoritatem recepit; cum antea ejus mente & sententia tantum Constantinopolitanis uterentur, fulti potestate Imperatoris, ut

adnotavit Liberatus in breviario, & nos
uberius diximus libro III. de concordia
sacerdotii & imperii cap. III. §. v.

XIX. In neutra verò collectionum,
Ephesini Concilii fit mentio : quoniam
cū nulos ad disciplinam pertinentes
canones ediderit, sed tantum fidem rec-
tam adstruerit adversus insaniam Nesto-
rii, non erat cur anathemata contra hæ-
resim ejusque fautores corpori canonum
adjicerentur.

C A P V T IV.

De Canonibus Africanis.

I. N canonibus Africanis enumeran-
dis immensum est discrimen. Col-
lectio vetus eos canones exhibet quos Ec-
clesia Romana recepit, eadem serie &
ordine quo sunt in Conciliis Africanis
editi ; omissis canonibus ceteris, quibus
edendis defuit auctoritas Ecclesiae Ro-
manae.

II. Quod ut liquidiūs intelligatur,
sciendum est præsente Faustino Legato
Romanæ sedis habitam fuisse synodum
universalem totius Africæ, quæ sexta di-
citur, sub Aurelio Carthaginis Episcopo :
in qua relecti sunt canonēs illi omnes qui

diversis in Conciliis editi fuerant tempore Aurelii, & nova definitione, consentiente Faustino, approbati sunt. Horum Conciliorum gesta & canones Faustinus Romanam cum retulisset, apostolicæ sedis consensu adeo probata sunt ut partem deinde fecerint collectionis nostræ veteris, quæ incipit à tertio Carthaginensi Concilio, & cetera ex ordine complectitur quæ habita sunt sub Aurelio usque ad septimum Carthaginense, & præterea Milevitanum sub Aurelio.

III. Primum Carthaginense Concilium sub Grato, & secundum sub Genetlio, licet canones aliquot constituerint, non describuntur in hac collectione: quæ propria Romanæ Ecclesiæ cum esset, nefas erat ut aliis ista legibus uteretur quam iis de quibus ad eam relatio facta fuerat, aut quas præsentia Legatorum suorum probando, suas fecerat. Concilia sub Grato & Genetlio, quemadmodum & Teliense, Septimunicense, & Macrianense, quorum meminit Ferrandus in breviario, Ecclesiæ Africanæ ordinandæ destinata erant, ejusque erant decreta specialia. Sed Concilia habita sub Aurelio, ad Romana scrinia delata primùm, publicæ legis vim tandem obtinuerunt in occidente universo in consequentiam hujus collectio-

nis.

nis. In ea canones singulorum Concilio-
rum describuntur, & specialiter canones
Concilii Carthaginensis quarti, quibus
forma celebrandarum ordinationum in
singulis gradibus præscribitur. quæ sin-
gulare est antiquitatis sacræ & veteris ec-
clesiasticæ disciplinæ venerandum monu-
mentum; cui auctoritas & robur genera-
lis legis ab hac collectione cùm sit impen-
sum, vel eo nomine nobis cara esse de-
bet. Proferimus sæpe in controversis fi-
dei capitibus, præcipuè cùm de sacra-
mento ordinis agitur, canones ex isto Car-
thaginensi Concilio quarto petitos: quos
sectarii elevare solent eo nomine quòd
rejecti videantur ab Ecclesia Romana,
quoniam absunt à collectione Dionysii.
Imò verò quidam male fani non solum
dubios canones illos, sed etiam falsos, &
ab otiosis hominibus consarcinatos jac-
tant, ejusdemque esse farinæ cum subdi-
titiis epistolis quibus Isidorus Mercator
collectionem suam infericit. quorum in-
justas querelas hac veteris collectionis ex-
ceptione repellimus.

IV. Dionysius quidem alium ordi-
nem secutus est in describendis canonibus
Africanis ab eo qui jam receptus erat.
Etenim præmisso universali totius Africæ
Concilio, quod habitum fuit sub Aure-

P

lio, & positis xxxiiii. canonibus in eo editis, statim subjungit collectionem à se confectam canonum in variis Conciliis Africanis editorum: in qua selectis iis qui ad disciplinam ecclesiasticam pertinebant, ceteros omisit. Præterea cùm canones aliqui in superiore Concilio editi poliantur aut explicitur in sequenti, Dionysius, ut compendium laboris legenti faceret, unica editione contentus fuit; & ipse alicubi verba quædam ex prioribus addit aut demit.

V. Dubitandum enim non puto quin collectio illa Africana auctorem habeat Dionysium; quippe quæ ante illius ætatem incognita esset etiam ipsis Africanis, ne dicam Latinis ceteris. Etenim Ferrandus Diaconus, Dionysio vetustior, Carthaginensia sub Grato & sub Genelio, universale primum, secundum, tertium, & quartum laudat, quoniam nondum erat in compendium redacta canonum Africanorum rhapsodia. Sanè post publicatum Dionysii codicem Crescinius Africanus ordinem & seriem canonum, prout existant apud Dionysium, sequutus est. Diffitendum tamen non est quin plurimum Dionysio debeat Ecclesia ob collectionem illam Africanam. Etenim vetus collectio ut plurimum omissis Con-

ciliorum gestis, à canonibus auspicatur. Præterea conventus illos omittit in quibus de variis Africanarum provinciarum negotiis disceptatum est: quorum tamen Dionysius brevem summam, aliquando verba ipsa repræsentat.

VII. Ecclesia Africana canonibus Niçen, quos solos noverat, suas deinde regulas adjunxit in Conciliis Africanis decretis, quibus negotia ecclesiastica componerentur. Nomina Conciliis indita à civitatibus ubi cogebantur; à Carthagine ut plurimum, quoniam frequentius illò conveniebant Episcopi, tamquam ad caput & metropolim Africanarum provinciarum. quod ceteras civitates, istius dignitati ferè invidas, urebat. Vnde & propter faciliorem causarum communium ordinationem expressus ille canon Hippomensis, quo Concilium universale totius Africæ nunc in hac, postea verò in illa provincia cogendum esse definitur. Quare Concilium Hippomense & Milevitani inter plenaria recensentur; præter Macrianense, Septimunicense, Tusduranum, Thenitanum, laudata unà cum aliis à Ferrando Diacono; quorum canones in auctoritatem recepti erant pro regimine universæ Ecclesiæ Africanæ.

VIII. Sanè plurimos conventus Car-

P ij

thagine habitos constat ob negotia emergentia , seu adversus paganos & Donatistas , quorum causa legatio ad comitatum Principis vel etiam ad sedem apostolicam suscipienda erat , seu ob Episcoporum inter se controversias & inferioris gradus clericorum judicio canonico finiendas. In singulis illis Conciliis non sunt editi canones , sed in quibusdam Quæ observatio ut certa , ita ad discussionem eorum quæ sequuntur valde conducibilis.

VIII. Quæ disceptatio ut ordine procedat , brevem summam proponemus Conciliorum à catholicis Carthagine habitorum. Donatistarum enim conventicula hac nos in parte non tangunt. Deinde quæ canones Concilia ediderint , à reliquis secernemus. Vnde patebit ratio quam vetus collectio secuta est in Conciliis Carthaginensibus ex ordine digerendis.

*Cypr. in epist. ad Qui-
rnum.
August. lib. 4 de bap-
tis. c. 5.* Vetustissima synodus Carthaginensis est illa quam habuit Agrippinus ejus urbis Episcopus , de baptismo hæreticorum , anno c c x v i . cuius meminere Cyprianus & Augustinus.

Temporibus Cypriani , in Labesitana colonia , Privatus hæreticus , nonaginta Episcoporum sententia condemnatus , fa-

cit ut Labesitanum Concilium hic adscribamus , ex Cypriano in epistola ad Cornelium , anno c c x l i i .

Sed facultate conveniendi data , frequentes Carthagine & alibi , sed illic præcipue , habuit synodos Cyprianus , ut docet in suis epistolis . quas synodos hic tantum indicamus .

I. De pace lapsis pœnitentibus danda anno c c l i v . *Cyprianus lib. 4. epist. 21.*

II. Ob quæstionem eandem , in causa Felicissimi & Novatiani , anno c c l v . Extat apud Cyprianum epistola synodica ad Cornelium Papam .

III. De baptizandis infantibus ante octavum diem anno c c l v i i . *Epistola synodica ad Fidum , apud Cyprianum .*

IV. De admittendis ad pœnitentiam libellaticis anno c c l v i i i . *Cyprianus lib. 1. epist. 4.*

V. VI. VII. De baptismo hæretorum non admittendo , Concilium primum , & secundum ; dein tertium universale ex provincia Africa , Numidia , & Mauritania anno c c l v i i i . cujus acta habentur apud Cyprianum & Augustinum .

Post tempora Cypriani , primum quod deprehenditur Concilium Carthaginense est illud quod Gratus Episcopus , è Con-

P iij

cilio Sardicensi redux, satis frequentem coëgit post legationem Pauli & Macarii missam à Constante Imp. in Africam ad molliendos schismaticorum animos circa annum c c c x l i x. ubi quatuordecim canones editi sunt.

Sequitur Concilium Carthaginense sub Genetlio ejus urbis Episcopo, Valentino Aug. & Neoterio Coss. anno c c c x c. ubi XIII. canones constituti sunt.

Quæ verò sequuntur, habita sunt sub Aurelio Carthaginis Episcopo.

Hipponense, Theodosio III. & Abundantio Coss. viii. Idus Octobr. anno c c c x c i i i. in quo canones xli. editi sunt.

Carthaginense, Arcadio III. & Honorio II. Coss. vi. Kalend. Iulias, anno c c c x c i v.

Carthaginense, Cæsario & Attico Coss. v. Kal. Septembbris anno c c c x c v i i. in quo canones x l i x. publicati sunt.

Carthaginense, Cæsario & Attico Coss. vi. Kal. Iulias.

Carthaginense, Honorio Augusto IV. & Eutychiano Coss. vi. Idus Novembris anno c c c x c v i i i. ubi c i v. canones de mystica Ecclesiæ disciplina statuti sunt.

Carthaginense, post consulatum Ho-

norii IV. & Eutychiani, v. Kal. Maias,
anno CCCXCI.

Carthaginense, post consulatum Fla-
vii Stiliconis, xvi. Kalend. Iulias, anno
CCCCI. ubi novem capitula definita sunt.

Carthaginense, Vincentio & Flavito
Coss. Idibus Septembris, anno CCCCII.
cum viginti capitulis.

Milevitanum I. Arcadio & Honorio V.
Coss. vi. Kal. Septembr. anno CCCCII.
cum quinque capitulis.

Carthaginense, Theodosio Augusto &
Rumorido Coss. viii. Kal. Septembris,
anno CCCIII. cum octo capitulis.

Carthaginense, Honorio Augusto VI.
Coss. vi. Kalend. Iulias, anno CCCCIV.

Carthaginense, Stilicone II. & Anthe-
mio Coss. x. Kal. Septembr. anno CCCCV.

Carthaginense, Honorio VII. &
Theodosio III. Coss. Idibus Junii anno
CCCCVII. cum sedecim capitulis.

Carthaginense, Basso & Philippo Coss.
xvi. Kalend. Iulias.

Carthaginense, iisdem Consulibus, III.
Idus Octobris.

Carthaginense, Honorio VIII. &
Theodosio III. Coss. xvii. Kal. Iulii, anno
CCCCIX.

Carthaginense, post consulatum Ho-
norii VIII. & Theodosii III. xvii.

P iiiij

Carthaginense, Honorio XII. & Theodosio VIII. Coss. Kal. Maii, anno cccc.
xviii. ubi constituti sunt canones xix.

Carthaginense, post consulatum Honorii XII. & Theodosii VIII. v. Kal. Iunias, anno ccccix. quod canones xxxiii. constituit.

Carthaginense, post consulatum Honorii XII. & Theodosii VIII. III. Kal. Iunias; ubi editi sunt sex canones.

Concilia isthæc & canones ab eis promulgati sine dubio nos laterent nisi veterum collectorum diligentia factum esset ut iis Ecclesia non careret. Duo sunt qui olim studiosè in eam curam cogendi hos canones in unum corpus incubuerunt. Alter est antiquus ille collector, qui ex mandato Leonis priori collectioni operam dedit. Alter verò Dionysius; qui privato labore, amicorum precibus exstatu, suum codicem dedit Africanis canonibus auctum. Vetus ille aliqua in parte est accuratior Dionysio, in aliis verò ab isto superatur. Etenim antiquus exhibet canones Conciliorum sub Grato & sub Genetlio, qui desunt in collectione Dionysii. Habet præterea canones omnium Conciliorum quæ coacta sunt sub Aurelio; et si in Conciliis illis ab invicem

secernendis non pari industria laboraverit ac fecit Dionysius : quamvis huic quoque suæ non defint hallucinationes. Ex utriusque auctoris collatione plenam & integrum veterum Carthaginensium Conciliorum cognitionem adipiscetur lector ; quæ sincera ex omnibus partibus à singulis hauriri non potest. quod manifestius patebit ex utriusque discrimine quod statim adnotabimus.

X. Vterque sanè Africanos canones deprompsit ex actis Concilii Carthaginensis habitu sub Aurelio anno cccc xix. quod vocant sextum , ubi interfuit legatio Ecclesiæ Romanæ. Faustinus quippe Potentinus Episcopus in Italia , missus in Africam à Zosimo Papa unà cum Asello & Philippo Presbyteris Ecclesiæ Romanæ collegis suis , ut componeret controversiam motam de appellationibus Episcoporum ad Romanam sedem admittendis juxta Nicænos canones , quos proferebat , (Africanis Episcopis causantibus canones illos dubios esse , nec haberi in exemplaribus ejus synodi quæ secum Cæcilianus Episcopus Carthaginensis detulerat) occasionem dedit ut in plenaria illa synodo canones Nicæni juxta fidem exemplaris illius recitarentur , & canones omnes postillâ in Africanis Conciliis editi.

quæ omnia gestis illius Concilii inserta sunt. Vbi observandum est, non solos canones editos in Conciliis habitis sub Aurelio tunc recitatos & relatos in acta, sed præterea illos omnes qui à decessoribus Aurelii promulgati erant. Quod apertissimè ostendunt Aurelii verba in actis illius Concilii: *Nunc patimini exemplaria statutorum Nicæni Concilii, sed & quæ hic salubriter à nostris decessoribus secundum ejusdem Concilii formam, vel quæ nunc à nobis ordinata sunt, recitari & gestis inseri.* Omne Concilium dixit. *Exemplaria fidei & statuta Nicænae synodi, quæ ad nostrum Concilium per beatæ recordationis olim prædecessorem tua sanctitatis, qui interfuit, Cæcilianum Episcopum adlata sunt, sed & quæ patres exemplaria sequentes hic constituerunt, vel nunc communī tractatu statuimus, his gestis ecclesiasticis inserta manebunt.*

XI. Itaque oportuit ex ista definitio-
ne ut statuta præcedentium Conciliorum,
non solum quæ sub Aurelio, sed etiam
quæ sub decessoribus ejus coacta erant,
recitata primùm, in hujus acta Concilii
deinde referrentur post canones Nicænos.
Sanè exemplaria Nicæni Concilii à
Cæciliiano allata, id est, fidei professio,
& viginti canones ex versione Teilonis
& Tharisti Constantinopolitani inserta

sunt actis Concilii sexti ; ut pater ex veteri nostra collectione. Dionysius quoque id observavit in suo codice : *Statuta quoque Nicæni Concilii in xx. capitulis similiter recitata sunt, sicut in superioribus inveniuntur adscripta.* Intelligit Dionysius canones Nicænos locatos in capite suæ collectionis : qui tamen aliis verbis sunt concepti , id est , suis à Dionysio novo interprete , non autem Teilonis & Tharisti verbis expressi ; qua interpretatione careremus nisi conservata fuisset in veteri collectione ; quæ aliam quoque præ se fert in capite collectionis , nempe antiquam quæ in usu erat in Ecclesia Romana.

XII. Post Nicænos canones actis inserta sunt quæ ab Aurelii successoribus statuta fuerant , id est , à Grato & à Genetlio Carthaginensibus Episcopis , deinde quæ Aurelius in variis Conciliis Africani definierat , & in illo ultimo quod tunc gerebatur.

XIII. Quare Dionysii adnotatio quæ inserta est post xxxiii. canonem Concilii Carthaginensis ante ceteros Africanos , cautè accipienda est. *Recitata sunt, inquit, etiam in ista synodo diversa Concilia universæ provinciæ Africæ transactis temporibus Aurelii Carthaginensis Episcopi celebrata.* Sunt illa quidem recitata ; sed præterea

relecta sunt & gestis inserta quæ celebra-
ta sunt sub decessoribus Aurelii , ut supe-
riùs ostendimus.

XIV. Is autem ordo servatus est ut
statim post recitata capitula synodi Nicæ-
næ, sextum Concilium Carthaginense suos
canones ediderit , quos Dionysius exhi-
bet numero xxxiiii. quorum primus
quod asserimus ostendit manifestè. *Aure-
lius Episcopus dixit. Hæc ita apud nos ha-
bentur exemplaria statutorum quæ tunc patres
nostrí de Concilio Nicæno secum detulerunt ; cu-
jus formam servantes , hæc quæ sequuntur
constituta , firmata à nobis custodientur.* Ca-
nones isti Concilii sexti Carthaginensis
absunt à veteri collectione ; quoniam ex
Conciliis sub Grato , sub Genetlio , & ex
Hipponensi , quibusdam aliquando reci-
fisis & mutatis , conflati sunt. Eos autem
debemus diligentia Dionysii.

XV. Enimvero cùm Africanorum ca-
nonum corpus gestis Carthaginensis sexti
insertum esset , & gesta illa integra à Le-
gatis Români delata fuissent ad Bonifa-
ciūm Papam , ut docet disertè epistola
Concilii ad illum data , hinc factum ut
quo tempore receptæ & publicatæ sunt
auctoritate apostolica synodi diœceseon
orientalium , eadem auctoritate adjuncti
illis fuerint canones Conciliorum Afri-

æ, quæ una erat ex diœcesibus occiden-
tis. Quæ quidem Concilia ad Romanum
Pontificem transmissa , post causæ cogni-
tionem, retenta sedis dignitate , firmari
poterant ; omissis & mutatis quibusdam,
quæ collector ex auctoritate sibi delega-
ta Ecclesiæ universæ commoda judica-
vit, ut statim patebit.

XVI. Ceterū cùm sint Concilia
duodecim , in quibus constituta sunt ca-
pitula , sive canones , eorum numerum
ad octo Concilia redegit collector vetus;
cujus instituti ratio reddetur inter recen-
fendum Concilia illa ex quibus canones
suios hausit.

XVII. Aliam rationem secutus est
Dionysius ; quippe qui sola sub Aurelio
habita Concilia in collectione sua retinue-
rit , commemoratis illis quoque Conciliis
ubi canones editi non fuerant ; ad-
scriptis canonibus suæ quibusque synodo
ut plurimum. Aliquando enim ab eo pec-
catum hac in parte docebimus , tum etiam
in eo quod synodi quartæ canones inte-
gros omiserit, quemadmodum etiam Con-
cilia sub Grato & sub Genetlio , eorum-
que canones.

XVIII. Vnde patet graviter falli vi-
rum eruditum Christophorum Iustellum ;
qui in præfatione sua ad codicem cano-

num Ecclesiæ Africanæ contendit collectionem illam , prout extat apud Dionysium , in Concilio Carthaginensi probatam & confirmatam , in aëta dein relatam fuisse ; quam postea Dionysius Exiguus suæ collectioni inseruerit , & primus in occidente evulgaverit . Compendium enim illud Conciliorum Africanorum est à manu Dionysii ; cùm Concilia integræ gestis Carthaginensis Concilii sexti inserta fuerint , ut jam monui .

XIX. Ejus compendii auctorem praesto Dionysium ; ut constabit lectori , si expendat quod superiùs observavi de versione canonum Nicænorum ; quæ quidem inserta fuit aëtis , prout elucubrata fuerat à Teilone & Tharisto Presbyteris , atque Cæciliiano tradita ; ut docet vetus collectio , cuius antiquitas ex eo nomine commendatur . Dionysius autem versionem illam penitus omisit ; suamque , quam novam cudit , in capite collectio-
nis suæ posuit , ad quam referuntur verba illa superiùs laudata : *Statuta quoque Nicæni Concilii in xx. capitulis similiter recitata sunt , sicut in superioribus inveniuntur adscripta.* Hæc adnotatio tribui non potest Africanis patribus , qui octoginta & amplius annis Dionysii tempora antecedebant ; sed ipsi Dionysio , qui canones Nicænos ex

sua interpretatione significat.

XX. Quò etiam alludit hæc ejusdem collectoris adnotatio , post relatas Cy- rilli Alexandrini & Attici Constantinopo- litani ad Africanos epistolas , unà cum exemplaribus Concilii Nicæni è Græco versis per Innocentium Presbyterum & ad Bonifacium Papam missis à Carthaginensi synodo : *Huic symbolo fidei etiam exemplaria statutorum ejusdem Concilii Nicæni à memoratis Pontificibus annexa sunt , si- cut superius per omnia continentur ; quæ nos hic iterum conscribi necessarium non esse credi- dimus.* Ex quo etiam patet hunc scripto- rem hominem esse privatum , qui gesta à Pontificibus refert. Sanè privatum esse & nulla publica auctoritate fultum qui hoc compendium digessit in ordinem ex eo etiam patet quòd de se veluti studio- forum antecessore loquatur in Concilio habito anno cccc v. Stilicone II. & An- themio Coss. *Hujus concilii gesta ideo non ex integro descripsi quoniam magis ea quæ in tempore necessaria fuerunt quam aliqua gene- ralia constituta sunt , sed ad instructionem stu- diosorum , ejusdem Concilii brevem digessi.*

XXI. Fulgentius Ferrandus Dia- conus Ecclesiæ Carthaginensis , qui vixit Iustino imperante , breviationem cano- num instituit ante Dionysium , ubi syno-

O P V S C V L A

240

dos orientales auctoritate Leonis Papa
jam in occidente receptas, Nicænam, An-
cyritanam, Novocæsariensem, Gangren-
sem, Antiochenam, & Laodicenam lau-
dat, & Sardicensem, dein Carthaginen-
ses sub Grato & sub Genetlio, ceteras
quoque suis titulis distinctas ; quæ sine
dubio charactere quodam temporis apud
eum auctorem ab invicem erant discretæ;
sed incuria librariorum, Consulum notæ
perierunt. Attamen expensis cum cura
quos citat titulis Conciliorum, cognitio-
nem adepti sumus eorum ad quæ singuli
pertinent : quamvis in quibusdam nume-
rorum fides vacillet, ut mox ostendemus.
Præter eas verò synodos Carthaginenses
quas exhibent quoque vetus collectio &
Dionysiana, alias profert quarum auto-
ritas recepta erat in Africa, ut Zellensem
sive Teleptensem, Septimunicensem, Ma-
crianensem, Mazarensem, Iuncensem, Tul-
duritanam, Thenitanam, & Hippo-
ensem secundam, imò verò & Carthaginен-
sem quandam aliis collectoribus incogni-
tam. Quòd autem Concilii Carthaginen-
sis quarti canones nullos producat, non
debet cuiquam mirum videri : quoniam
de disciplina tantùm exteriori in suo ca-
nonum breviario tractat, omissis iis quæ
fidem & dogmata spectant ; ut factum ab
illo

illo est in capitulis novem quæ de gratia Dei definita sunt in Concilio Carthaginensi anno cccc xviii. quamvis ejusdem Concilii canones de disciplina editos citet. Statuta itaque Concilii quarti, quæ ordinationum mysteria & formulas graduumque atque ordinum varias functiones respiciunt, juxta instituti sui rationem Ferrandus prætermittere debuit. Illud unum me habet anxium, cur in sua breviatione de canonibus Chalcedonensis Concilii tacuerit: qui recepti cùm fuisserent ab Ecclesia Romana, valere quoque debebant in Africa, quæ flagrantibus Concilii Chalcedonensis propugnatoribus abundavit, & inter eos præcipue Facundo Hermianensi Episcopo, cuius extant libri duodecim de tribus capitulis ejus Concilii in controversiam adductis temporibus Iustiniani, quæ tamen auctor ille vehementi oratione tuetur; licet postea in Quinta synodo damnata fuerint.

C A P V T . V.

Ordo Conciliorum Africæ in veteri collectione.

I. **N**VNC specialiter consideranda sunt ea Concilia ex quibus compacta est vetus collectio. Statim occur-

Q

rit Concilium Carthagine habitum sub Grato illius urbis Episcopo, in quo omnium primò canones constituti sunt. unde dicitur eleganter in collectione illa *Concilium Carthaginense primum.*

I I. Secundum ordine est Concilium sub Genetlio: cuius nomen perperam scribitur in editis *Genedius pro Genetlio*, ut habet Ferrandus & veteres manuscripti codices. De istius Concilii veritate nullus superest dubitandi locus, cum & in collectione veteri exhibeat, & ex eo plures canones citet Ferrandus. Iustellus tamen ait falsum & fictum omnino esse quod probare tentat, quia convenisse dicitur in praefatione Valentiniano Augusto IV. & Theodosio Consulibus. Nusquam enim, inquit, Valentinianus cum Theodosio, sed cum Neoterio anno cccxc. consulatum gesisse reperitur. Quod sane notum est. Sed id solùm evincit, errorem in nomen Theodosii exscriptorum vitio irrepsisse, legendumque *Neoterium*, ut habeamus par Consulum illius anni.

III. Addit, Alypium Tagastensem Episcopum, qui hac in synodo interloquitur, nonnisi quatuor annis post prædictorum consulatum ordinatum fuisse Episcopum, ut observat Baronius ex Augustino & Hieronymo. quo argumento cum ipse

quoque Baronius utatur, illud statim diluemus. Sanè Baronius mitius agit cum hoc Concilio, quod gradu solum movendum putat, & posterius esse Conciliis omnibus quæ ab Aurelio Carthaginensi habita sunt: qui quidem, velut emeritus, successorem sibi designarit Genetium. unde factum ut in actis ejus Concilii Genetii & Aurelii mentio injiciatur, ac si uterque synodo praesesset; ille ut actu Episcopus, alter ob dignitatem retentam, cum tamen certum sit vice versa Aurelium successisse Genetio. Probat autem sententiam suam ex eo quod Valentinus Numidiæ Primas huic synodo interfuerit, qui fuit Xantippi successor. Porro Xantippus Milevitano Concilio praesens aderat anno cccc i. ante quod tempus Carthaginense tertium quod vocant, quartum, & quintum habita fuerant. Ergo secundum dici non potest in quo Valentinus Xantippi successor interfuit. Huic argumento aliud addit, nempe canone secundo hujus Concilii citari canonem xxxvii. collectionis Dionysianæ, de continentia clericorum, qui petitus est ex Concilio habito anno cccc i. & canone tertio laudari canonem de chrismate, reconciliatione pœnitentium, & puellarum consecratione, qui extat in Concilii sexti canone decimo.

Q ij

I V. His difficultatibus ut satisfiat, observandum est canones Concilii Carthaginensis sexti petitos esse ex variis Conciliis prioribus, nempe ex Concilio sub Grato canonem quintum, ex Carthaginensi tertio plerosque, & ex synodo sub Genetlio canones I I. I I I. I V. VI. VII. VIII. IX. X. XI. XII. & XIII. iisdem quandoque verbis, aliquando vero paulisper mutatis. Vnde accidit ut interlocutiones Episcoporum, quæ tribuuntur recte Aurelio, Alypio, Numidio, & aliis in Concilio sexto, in quod canonum sub Genetlio verba transcribuntur, fuerint deinde inter exscribendum, librariorum vitio, retentæ in actis Concilii sub Genetlio sub nominibus eorundem Episcoporum; qui alii erant in vero exemplari illius Concilii sub Genetlio, ut statim patebit.

V. Interim ut tota res sit adhuc aperitor, canones editi à Concilio sub Genetlio, quos habet Ferrandus, hic proponendi sunt, & reliqui expendendi: unde constabit vetustas hujus Concilii præ ceteris habitis sub Aurelio; tantum abest ut sit ultimum, quemadmodum sibi persuaserat Baronius. Tum etiam manifestum fiet delictum istius Concilii à sexto; quod tamen à priore pleraque mutuatum est, ut dixi. Denique quid significetur per pre-

teritum Concilium in canone i i. & i i i. sub Genetlio. Sicque Baronii argumentis respondebitur.

V I. Quatuor hujus Concilii canones citat Ferrandus in Breviario , quartum , octavum , nonum , & decimum . Quarti canonis compendium hoc est apud illum auctorem numero c x c i v . *Vt qui aliquibus sceleribus irretitus est , vocem accusandi non habeat.* Concilium Carthaginense sub sancto Genetlio tit. i v . Concil. Carthag. tit. vi . Hoc & in Concilio Thenitano statutum est . Ex collatione istorum canonum patet duo fuisse Concilia Carthaginensia quæ criminosas ab accusatione summoverunt , alterum sub Genetlio , idque prius , ut docet ordo scripturæ , & alterum Carthaginense . quod congruit cum antiqua collectione ; ubi res eadem sancitur in Concilio sub Genetlio tit. vi . & præterea apud Dionysium in Carthaginensi sub Aurelio , quod vocant sextum , tit. vi i i . Vbi diligenter observandum est , hunc canonem editum in Concilio sub Genetlio teste Ferrando , & in Carthaginensi sexto , eodem teste ; in utroque fieri ad suggestionem Numidii , Aurelio interloquente & Præsidis munus exercente . quod ut conveniat Concilio sexto , non potest convenire Concilio sub Genetlio . Quare dicendum , canonis verba

Q iij

deprompta quidem à patribus Concilii sexti ex Concilio sub Genetlio, sed à librariis transcribentibus vices mutatas, & Episcoporum nomina ex Concilio sexto in hoc translata, quod caput probandum sumpseramus. Idem error pervasit canoness vii. x. & xi. Concilii sexti, qui respondent canonibus i v. & viii. Concilii sub Genetlio, ubi fit mentio Alypii & Valentini.

VII. Tituli octavi lemma hoc est num. l v. apud Ferrandum: *Vt Episcopus si causam habuerit, à duodecim Episcopis audiatur. Concilium Carthaginense sub sancto Genetlio tit. viii. Et de Presbyteris numero xcvi, apud eundem: Ut Presbyter qui reatum incurrit, à sex vel à septem Episcopis audiatur. Concil. Carthagin. sub antistite Genetlio tit. ix.* in collectione veteri can. x. ad suggestionem Felicis Episcopi Selemfelitani. quæ repetita sunt iisdem verbis in Carthaginensi sexto sub Aurelio; dempta tamen isthac clausula, quæ est in isto secundo: *Genethius Episcopus dixit: Quid ad hoc dicit sanctitas vestra? Ab universis Episcopis dictum est à nobis veterum statuta debere servari. Vnde manifestè patet hunc canonem è Concilio sub Genetlio translatum fuisse in Concilium sextum, ut nos toties diximus.*

VIII. Ad rem ipsam quod attinet

numerus duodecim Episcoporum ad judicandum Episcopum constitutus fuerat à Concilio sub Grato can. x i. sex in judicio Presbyteri, trium autem in causa Diaconi. Quare non inutiliter in Concilio sub Genetlio additum est illud constitui *juxta veterum canonum statuta*. Quod iterum confirmatum fuit canone v i i i. Concilii Carthaginensis tertii, qui repetitus est in canone x x. Concilii Carthaginensis sexti, explicata phrasí quæ in præcedenti Concilio obscurior videbatur. Dicto enim canone v i i i. statuitur quòd si Presbyteri vel Diaconi fuerint accusati, adjuncto sibi ex vicinis locis legitimo numero collegarum, id est, in Presbyteri nomine quinque, in Diaconi duorum, Episcopi ipsorum causas discussiant. Quem loquendi modum retinuit Ferrandus num. l i. *Vt Episcopus accusatos Presbyteros convocatis quinque Episcopis audiat. Quod ita enuntiatur in dicto canone x x. Concilii Carthaginensis sexti ut sententia prioris canonis explicetur. Ait enim vicinos Episcopos petendos & eligendos ab accusatis, & debere eos esse numero sex, unà cum proprio Episcopo, in Presbyteri nomine, & in Diaconi tres.*

IX. In Concilio sub Genetlio constitutum docet Ferrandus numero x x i v.

Q iiiij

Vt nullus Episcopus plebem alienam usurpet.
Concil. Carthagin. sub sancto Grato tit. IX.
Concilium Carthagin. sub antistite Genetlio tit. IX.
Concil. Carthagin. tit. v. Canon iste nonus est undecimus numero in collectione veteri, editus ad suggestionem Victoris Episcopi. In Concilio sexto sub Aurelio canone v. quem laudat Ferrandus, ad relationem Aurelii de avaritiæ variis capitibus cavetur; inter cetera generaliter, ne quis alienos fines usurpet. Vnde patet discrimen utriusque Concilii, & prius esse **Concilium sub Genetlio quam Carthaginense sub Aurelio.**

X. Eadem differentia & antiquitas magis elucet ex titulo x. quem laudat Ferrandus numero i v. *Vt Episcopus à tribus ordinetur, consentientibus aliis per scripta, cum confirmatione Metropolitani vel Primatis.* **Concil. Carthag.** sub antistite Genetlio tit. x. **Concil. universale Carthagin.** tit. XLIV. Sanè consensus & præceptum Primatis disertè requiritur & numerus trium sacerdotum in ordinando Episcopo, ex definitione canonis XIII, sub Genetlio in editis, qui ad suggestionem Numidii Massulitani constitutus est. Quæ sententia brevioribus verbis, referente Aurelio, expressa est canone XIIII. Concili Carthaginensis sexti, licet decretum istud & interlocutio diser-

tē tribuatur Genetlio in superiori Concilio. Quo exemplo docemur Aurelii interlocutiones insertas actis Concilii sub Genetlio corrigendas esse & tribuendas ipsi Genetlio, non autem Aurelio, qui nondum erat Episcopus.

XI. Ea omnia docent apertissimè discri-
men Concilii sub Genetlio à ceteris Afri-
canis & illius vetustatem; quamvis cano-
nes aliquot ex eo transcripti sint in Conci-
lium Carthaginense sextum sub Aurelio,
iisdem quandoque verbis; quandoque
vero illorum sententia sola, ut superius
dixi & probavi. Quod accidit quoque in
secundo canone Carthaginensis sexti;
qui, dempta præfatione quæ est in Conci-
lio sub Genetlio, transcriptus est è primo
capitulo illius Concilii; nempe, ut Tri-
nitas credatur & prædicetur.

XII. Canon tertius & quartus ejus-
dem Concilii sexti, de continentia sacer-
dotum, quorum primus Aurelio sugge-
rente constituitur, & alter Faustino quo-
que interloquente, desumpti sunt ex ca-
none secundo sub Genetlio: ubi Aurelius
interloquens introducitur, sed de Fausti-
no tacetur; quæque in sexto Concilio,
Faustino Legato Romanæ sedis tribuun-
tur, in Concilio habito sub Genetlio uni-
versis Episcopis adscribuntur. Vnde fit

manifestum Concilium sub Genetlio vestitate præcedere aliud, quod ex priore locupletatur. Quod autem constituitur de sacerdotum continentia, juxta præriti Concilii definitionem, ut aiunt, intelligendum est de Concilio habitu sub Siricio statim post epistolam synodicam Concilii Romani ad Africanos directam post consulatum Arcadii Augusti & Bantonis, id est, anno ccc lxxxvi. ubi cavetur specialiter de sacerdotum abstinentia ab uxoribus, ut docui libro i. de concordia sacerdotii & imperii cap. viii. §. iv. Quare fallitur Baronius, qui canone illo secundo laudari putat canones Concilii Carthaginensis sexti.

XIII. Sextus canon de chrismate, reconciliatione pœnitentium, & puellarum consecratione à Presbyteris non agenda, ad suggestionem Fortunati, rogante sententias Aurelio, iisdem verbis exhibetur in canone tertio Concilii sub Genetlio. In quo sine dubio est hallucinatio exscriptoris, qui canonem Concilii sexti adscripsit Concilio sub Genetlio; in quo ea de re nihil statutum fuit, sed in Carthaginensi tertio can. xxxi. & xxxv. quod preteritum Concilium dicitur in canone illo sexto. Sanè Ferrandus numero xc. utitur in hac re solo testimonio Carthagi-

nensis tertii: *Vt Presbyter inconsulto Episcopo virginis non consecret, chrisma verò nunquam conficiat.* Concil. Carthagin. tit. XL.

XIV. Vetustas quoque Concilii istius sub Genetlio deprehenditur ex canone quinto, ubi ad suggestionem Felicis Selenselitani, interloquente Genetlio, definitum est ut diœceses quæ nunquam Episcopos habuerunt, non habeant, nisi ex consensu proprii Episcopi. Quæ definitio deinde confirmata est in canone XLII. Concilii tertii, ubi habetur illud in multis Conciliis jam fuisse constitutum. quibus verbis Concilium sub Genetlio, inter cetera, indicatur. Hæc sententia dein audita est, requisito tamen consensu Primatis & Concilii plenarii auctoritate in canone quarto Concilii Carthaginensis habitu anno ccccvi. qui relatus est in collectione Dionysii.

XV. Aliud quoque sugerente eodem Felice, & interloquente Genetlio, constitutum est canone septimo, nempe ut Episcopus ille excommunicetur qui ab alio excommunicatum suscepere. quod in nullo posteriore Concilio insertum est. Et canone nono ad suggestionem Numidi statuitur *ut Presbyter inconsulto Episcopo in quolibet loco agenda non audeat celebrare.* quod extat apud Ferrandum numero xc.

ex Concilio Carthagin. tit. v i i. ubi deest
fine dubio nota quam addit alibi , nempe
ex Concilio sub Genetlio. Tandem Ge-
netlius Concilium suum claudit sanctione
ista ; ut quæ statuta sunt ab eo gloriosi-
simoc oœtu custodiantur , & qui subscrip-
tionem suam violaverit , deponatur.

X VI. Post synodum habitam sub Ge-
netlio , Concilium universale omnium
provinciarum Africæ coactum est in Hip-
ponensi civitate sub Aurelio , Theodosio
Augusto i i i. & Abundantio Coss. id est,
anno c c c x c i i i. ut adnotavit Diony-
sius in collectione. Quadraginta canones
& unum constituit , qui deinde recensiti
sunt in Concilio Carthaginensi tertio, de
quo statim.

X VII. Sequitur plenarium Africæ
Concilium, quod Cæsario & Attico Coss.
v. Kalendas Septembris Carthaginie ha-
buit Aurelius , id est , anno c c c x c v i i .
Vbi breviarium canonum , quod à Byza-
cenis Episcopis excerptum erat de Hip-
ponensi Concilio , quodque ad Aurelium
transmiserant , recitatum est & probatum;
ut patet ex interlocutione Epigonii cano-
ne primo istius Concilii Carthaginensis
apud Dionysium , qui omissus est in ve-
teri collectione. Quod breviarium postea
remissum est ad universas provincias ; ^w

compendio recensentes Episcopi quæ sta-
tuta sunt, ea facilius memoria retinerent,
& sollicitius atque diligentius observa-
rent. Extat epistola synodica cum abbre-
viationibus Concilii Hipponensis in veteri
collectione & tomo primo Conciliorum.
Sed in eo non stetit patrum sollicitudo.
Quippe non contenti brevem canonum
Hipponensium per provincias transmis-
se, canones ipsos accuratiori examine per-
pensos in corpus Carthaginensium ca-
nonum, quos in eo Concilio statuerunt,
transtulere, additis quibusdam quæ ad in-
terpretationem vel ad novam definitionem
pertinere videbantur. Vnde in Concilii
Milevitani præfatione hæc sunt Aurelii
verba, quibus confirmationem illorum
capitulorum ab Episcopis exigit : *Quæ*
jamdudum vel in Hipponensi synodo firmata
sunt, vel postmodum meliore consilio apud Car-
thaginem definita, nunc quoque nobis ex ordine
recitentur.

XVIII. Hinc factum ut numerus ca-
nonum hujus Concilii Carthaginensis in
quinquaginta excreverit, comprehensis
in summa uno & quadraginta Hipponen-
sis Concilii. Hoc est quod vocatur Car-
thaginense tertium in collectione veteri,
quæ quinquaginta canones exhibet, com-
pactos, ut dicebam, ex Hipponensibus inibi

diligentiūs discussis & ex propriis: quōrum magna esse debet auctoritas, cū fuerint probati à tribus plenariis Conciliis, Hipponeñsi & Carthaginensi, & demum à Milevitano. Eadem ratione quam vetus collector amplexus est, canones hujus Concilii laudantur à Ferrando Diacono sub nomine Concilii Carthaginensis, etiam illi quorum mentio in breviario Concilii Hipponeñsis. quod ad fastidium ex collatione variorum canonum probari posset. Sed sufficiet illustre exemplum in canone de scripturis canonicis, quem tribuit Hipponeñsi Concilio ejus breviarium; Ferrandus verò numero **c c x x v i i i.** tribuit Concilio Carthaginensi tit. **x l v.** qui est **x l v i i.** in edito Concilio Carthaginensi tertio.

XIX. Laudantur quidem à Ferrando canones Concilii Hipponeñsis, sed alterius quam nostri. Etenim canones quos ex eo Concilio per compendium profert, non pertinent ad nostrum Hipponeñse. Quippe num. **x x x i v.** Ferrandus notat ista: *Vt Episcopi sive Presbyteri ea que sunt in locis ubi ordinantur, ad alia loca non transferant, nisi causas antē reddiderint. Concilium Hipponeñsum tit. v. Et num. **x x v.** Vt Episcopi quicquid nomine suo comparaverint, cogantur Ecclesiae refundere; quicquid autem*

eis donatur, cui voluerint conferant. Concil. Hippo. tit. viii. Item numero xxxviii. Ut Episcopus matricis non usurpet quicquid fuerit donatum Ecclesiis quae in diœcesi constituta sunt. Concil. Hippo. tit. ix. Laudatur quoque idem Concilium à Ferrando numero l i v. & num. xc. Tum numero cxxxviii. Ut accusator, si in loco ubi est ille qui accusatur violentiam timuerit, locum sibi proximum eligat. Quorum omnium est altum silentium in Hippoensi nostro, ut patet ex illius breviario, imò & in Carthaginensibus; præter titulum v i i. qui videtur concidere cum canone x l i x. Concilii tertii, quo Ferrandus utitur: quem maluit ex Hippoensi secundo citare ob rei qua de agebatur continentiam quam ex Carthaginensi tertio, ubi prius definitus erat: ut vel hinc pateat post omnia Carthaginensia editum istud Hippoense secundum.

X X. Ceterū quod attinet ad canones Carthaginensis tertii; ex eo Ferrandus laudat xl v. & vetus collectio eos omnes ad quinquaginta redigit. Quare castiganda potius quam laudanda est Dionysii nimia diligentia, qui canones Hippoenses à Carthaginensibus distinxit, cum satius fuisset in unum corpus eos redigere, exemplo tum veteris collectionis, tum

ipsius Ferrandi Diaconi Carthaginensis.
Sed toleranda esset hujusmodi *explicatio*,
si puros Hipponenses exhibuisset absque
mixtura, & Carthaginense ab iis secrevi-
set. In quo dupliciter peccavit. Partem
quippe Hipponensium canonum, quos
Aurelius selegerat ut ex eorum compage
canones Concilii sexti partim conficeret,
in sua collectione Dionysius omisit: quo-
niam in eo Concilio sexto, à quo collec-
tionem orditār, jam erant inserti. Quā
sententia est horum verborum in collec-
tionē Dionysii agentis de Concilio Hip-
ponensi: *Gesta hujus Concilii ideo descrip-
ta non sunt quia quae ibi statuta sunt, in pri-
ribus inserta sunt*, id est, in Concilio sexto,
quod ordine antecedit. Atqui debuerat
id observasse saltem, quinam canones
pertinerent ad Concilium Hipponense,
brevi eorum canonum vel eorum numero
proposito, ut distingui possent à ceteris
Concilii sexti.

X XI. Aliud est hominis erratum,
quod Carthaginensis Concilii sub consu-
latu Cæsarii & Attici, quod est tertium,
canones cùm disertè exhibere sese profi-
teatur, aliquot tamen permiscet qui sunt
meri Hipponenses. Ejus rei periculum fa-
ciemus ex breviario Hipponensi; ubi de fi-
liis non facile emancipandis ab Episcopis

& clericis canone x v. agebatur, qui secundus est Concilii Carthaginensis apud Dionysium. Ne in sacramentis aliud offeratur praeter panem & vinum aqua mixtum statuit Hipponense Concilium num. xxv. quod Dionysius adscribit canonii iv. Carthaginensis tertii. Ut Episcopi & clerici ad virgines & viduas soli non accedant cavit Hipponense num. xxvi. quod canonii quinto Carthaginensi tribuit Dionysius. Idemque erratum admittit in plurisque aliis canonibus, ut in can. vi. vii. viii. ix. x. xi. xii. xiii. xiv. xv. qui omnes pertinent ad Hipponense Concilium, ut patet ex eorum breviario. At tamen quoniam probati & aucti in Carthaginensi, rectius cum veteri collectio ne & Ferrando Carthaginensi tertio omnia adscribemus; omissa mentione Hipponensis illius Concilii, quod transfusum est in Carthaginense & ab eo penitus absorbtum.

XXII. Facebat tamen negotium in hoc Carthaginensi tertio adnotatio quæ canonii x vii. (ubi quænam scripturæ fint canonicae definitur) adjecta est his verbis: *Hoc etiam fratri & consacerdoti nostro Bonifacio vel aliis earum partium Episcopis pro confirmando isto canone innotescat, quia a patribus ista accepimus in Ecclesia legendi.*

R.

Bonifacius enim in pontificatum eiectus fuit anno quadringentesimo decimo octavo. Quare non potuit ejus mentio fieri in Concilio tertio , quod habitum fuit anno trecentesimo nonagesimo septimo. Vnde sequi videtur confusa & permista omnia à veteri collectore , qui huic Concilio tertio tribuit canonem istum de scripturis , Concilio sexto adscriptum apud Dionysium ; ubi adnotatio illa de canone à Bonifacio confirmando inserta est , rectè , juxta rationem temporis. At tamen , ut antea monui , cùm canon iste editus fuerit primùm in Hipponeensi Concilio , dein à Carthaginensi tertio firmatus , ipso etiam Ferrando teste , non est quòd lis ulla moveatur adversùs fidem veteris collectoris : qui quidem canones Concilii sexti cùm omitteret , noluit ramen lectorem fraudari eleganti illa & necessaria definitione quæ in eo Concilio sexto adjecta fuerat huic capitulo de scripturis , scilicet ea de re ad summum Pontificem referendum , ut auctoritate sua canonem illum confirmaret. Quæ adnotatio rectè congruit cum eo quod tunc gerebatur quando ipsum Carthaginense tertium actis Concilii sexti unà cum aliis insertum est & ad Bonifacium transmissum.

XXIII. Porrò ex eo canone insignis illa & eximia Romanæ sedis auctoritas demonstratur quam in communibus Ecclesiæ negotiis ordinandis possidebat. Licet enim canones universos ad Bonifacium synodus Africana transmitteret illius decreto vel silentio firmandos, at in gravi illo negotio de scripturarum canone specialiter ejus auctoritatem imploravit, ut eum confirmet. Quod à Pontifice in synodo Romana fieri debere, ex more in ceteris negotiis minoris etiam momenti jam recepto, noverant Africani. Ideo Bonifacium præ ceteris & nominatim, sed alios quoque *earum partium*, id est, Italæ sive Romanæ synodi Episcopos, consulendos statuunt. Itaque in veteri codice, apud Binium, hujus adnotationis lemma sic conceptum est : *De confirmingo isto canone transmarina Ecclesia consulatur.* Vnde patet Africanos patres latuisse constitutionem Innocentii primi, qui epistola quam dedit ad Exuperium Tolosanum Episcopum Stilicone II. & Anthemio Coss. id est annoccccv. easdem esse scripturas canonicas definierat quas complexi sunt Africani isto canone; & deinde, majorum exemplo, Tridentina synodus.

XXIV. Sancte Iudæorum canon an-

R ij

gustior erat quām fuerit postea canon Ecclesiæ catholicæ ; quæ pro canonicis scripturis libros aliquot habuit quos Iudæi in sua notitia non describebant, ut de libris Machabæorum disertè docuit Augustinus. Inter ipsos quoque veteres Ecclesiæ Christianæ magistros de quibusdam libris controversum fuit , non sanè an eorum lectio ad pietatem conduceret, sed an pari auctoritate cum aliis censem deberent. quod tandem his definitionibus Innocentii & Africani Concilii compositum est. Inde factum ut in collectione Dionysii ultimus canon id est sexagesimus Laodicenæ synodi desideretur, in quo ,juxta sententiam orientalium, veteris & novi testamenti libri canonici describuntur , quoniam à definitione occidentalis Ecclesiæ discrepabat. Quam tamen regulam sexagesimam vetus collectio non rejecit ; quia in plerisque illi conveniebat cum Romanæ & occidentalis Ecclesiæ usu , qui canone Carthaginensi explicatur.

C A P V T VI.

*De synodo Africana habita Cæsario
& Attico Conf.*

I. **S**VPEREST ut discutiamus quæ ratiō Dionysium impulerit ut duo

nobis Concilia obtrudat habita Cæsario & Attico Consulibus, alterum nempe sexto Kalendas Iulias, ubi constitutum ait *ut nullus Episcoporum naviget sine formata Primatis, & addit, Gesta in authenticis, qui queret, inveniet, alterum iisdem Consulibus v. Kalend. Septembbris, ex quo plura capitula proponit.* Attamen dubium non est quin hæc synodus una sit, quam in duos conventus partitur: quoniam, ut discimus ex Aurelii interlocutione quam habuit v. Kalendas Septembbris, Legati ex omnibus provinciis Africæ non advenierant ad diem præstitutam Concilii, quidam verò diem Concilii prævenerant. Cum ipsis quædam tractavit Aurelius, quæ deinde in plenario Concilio relecta sunt: Vnde factum ut quædam capitula tribuat Dionysius priori conventui, inter quæ illud observat de vetita navigatione absque formata Primatis, reliqua verò secundo. Qui tamen duo conventus in unum Concilium tandem coaliere, adeo ut quæ in primo erant tractata, in secundo sint relecta, & omnium Legatorum auctoritate definita. Quare vetus collector unà cum Ferrando canones horum conventuum rectissimè solo Concilii tertii nomine comprehendit: ubi canone xxviii. in editis Episcopi prohibentur trans mare pro-

R iiij

ficiisci inconsulto primæ sedis Episcopo, ut ab eo formatam accipient. Qui quidem transcriptus est in Concilium sextum canone x x i i . paucis verbis tum additis, tum omissis. Sed eum Ferrandus citat ex Carthaginensi tertio, ubi revera eum quoque constitutum fatetur Dionysius. Ait ergo Ferrandus numero x l v i . *Vt Episcopi sine formata Primatis non nagent. Concil. Carthaginense tit. x x x v i .* Qui quidem titulus x x x v i . non solùm accedit ad x x v i i . prout exstat in editis Concilii Carthaginensis tertii; sed numerum x x i i . Concilii sexti excedit, ubi hac de re constitutum; imò & omnium canonum ejus Concilii numeros superat, qui x x x i i . comprehensi sunt.

II. Interim monendus est lector, in collectione Græca Conciliorum Africanorum seriem sincerius conservatam quam in editione Latina Dionysii Exigu juxta editionem Moguntinam & Parisensem. Quippe allocutionem Aurelii habitam in Concilio sub Cæsario statim sequuntur canones, quorum primus apud illum auctorem est ille de probando breviario Hipponensi. In editione vero Latina, perverso ordine, librariorum vito, allocutionem Aurelii sequitur Concilium habitum sub consulatu Stiliconis.

III. Illud quoque observandum est, aliquando sinceriorem esse textum in collectione veteri quam in collectione Dionysii. quod non est animus in quibusque variis lectionibus persequi; illustriora tantum discrimina adnotabo. In canone xxxiv. Concilii tertii recte legitur in veteri: *Vt ægrotantes, si per se respondere non possunt, cum voluntatis eorum testimonium, hi qui sui sunt, periculo proprio dixerint, baptizentur.* Cujus sententiam sic Ferrandus recte expressit num. ccii. *Vt ægrotantibus, quando loqui non possunt, si pro eis testimonium alii dixerint, baptismus non negetur.* Concil. Carthagin. tit. xl. Apud Dionysium, in editione Moguntina, canone XII. Concilii Africani: *Vt ægrotantes, si pro se respondere non possunt, cum voluntatis eorum testimonium hi qui suis periculo proprio affuere dixerint, baptizentur.* Hæc lectio sapit glossema parum felicis critici, qui *periculo proprio* de periculo ægritudinis contrahendæ explicuit. quod pertinet ad fidem testimoniū, qui periculo suo testantur, reddituri scilicet testimoniū sui rationem severo judici quem nihil later eorum quæ geruntur. Et si enim legibus vetitum sit ne domesticorum testimonia admittantur, placuit tamen patribus ut suo periculo favore ægri recipiatur. Sincerior est lectio quam ex ve-

R. iiiij

teri codice Nicolai Fabri V. C. expressit
in editione canonum Africanorum Chri-
stophorus Iustellus : *Vt ægrotantes, si pro
se respondere non possunt, cum voluntatis eo-
rum testimonium sui periculo proprio dixerint,
baptizentur.* Perinde est autem respondere
per se, ut est in veteri , ac *pro se*, ut est
apud Dionysium & apud Ferrandum at-
que Fulgentium. Apertior autem est sen-
tentia in veteri , *hi qui sui sunt*, quod sa-
pit glossema , quam *sui*, ut est in authen-
tico. Quæ lectio , licet vera , in errorem
induxit Græcum hujus collectionis inter-
pretem , qui *suos* non ad domesticos re-
tulit , ut debuerat , sed ad ægros ipsos,
nullo sensu : ὥτε τοὺς ἀθεναῖοὺς, οἵνες ὁ
ἔαυτῶν ἀποκρίνεθαι οὐ δύναται , τότε Βαθή-
θαι , ὅτε τῇ αὐτῷ ωρομέσηι , Ὡς εἰ αὐτοῖς
μαρτυεῖαν καὶ δύναται εἴπωσιν . Isto exem-
plu cautum quoque fuit saluti ejus ægi
qui petita pœnitentia morbo oppressus
obmutuit, aut in delirium incidit : cui, si te-
stimonium dederint eius postulationis qui
eam audierunt , beneficium pœnitentiae
& reconciliationis tribuitur. Concilium
Carthaginense i v. can. lxxvi.

I V. Sed non omittenda est elegans
disputatio , super hujus canonis sententia,
Ferrandi Diaconi & Fulgentii Rusensis.
Ille hunc interrogavit per epistolam an-

III A

baptismus cuiusdam colore Æthiopis, qui ex ultimis barbaræ provinciæ finibus servitus Carthaginem adductus fuerat, & post absolutam catechumenorum exercitationem professamque publicè fidem in ægritudinem inciderat, amissioque sensuum usu, domini sui studio in solenni Paschæ baptismo unà cum aliis tinctus fuerat, an baptismus ille, aliis pro eo fidem spondentibus, homini adulto, qui originis peccato propria quoque addiderat, sufficeret ad remissionem peccatorum, infantium exemplo, qui solius originalis peccati sunt rei. Tum sibi hunc canonem Africanum objiit : *Video*, inquit, in hoc articulo posse usitatam canonum proponi sententiam, quæ infirmos jubet, si prose respondere non valeant, sed eorum voluntati testimonium sui proprio periculo dixerint, baptizari. Sub qua definitione magis arbitror quid Ecclesia facere beat imperatum quam quid ille percipiat indicatum ; videlicet ut minister verbi liber sit à culpa negligentiae, non ut ille offendatur consors particepsque justitiae.

Respondet graviter Fulgentius, & Ionga disputatione concludit baptismi salutaris effectu non fraudari hunc baptizatum ; moxque addit : *Proinde firmissime tenenda est illa canonum sententia paternorum, quæ infirmos jubet, si prose respondere non va-*

leant, sed eorum voluntati testimonium suiper
riculo proprio dixerint, baptizari. Viderunt
enim sancti patres ream non esse voluntatem
quaे impedita cognoscitur, non mutata, nec de-
bere denegari sacramentum baptismatis ubi fir-
mitas cognoscitur voluntatis. Hoc autem sta-
tuentes sancti patres, & quid Ecclesia facien-
debeat, & quid ille percipiat, indicarunt. Ne-
que enim hoc Ecclesia faceret si ille nullum in
hoc factō beneficium percepisset. Mox post pau-
ca: Quia veraciter columna & firmamentum
veritatis ab Apostolo Ecclesia nuncupatur, qui-
quid secundūm ipsius Ecclesiae constituta in san-
ctis mysteriis redēptionis & reconciliatiōnis hu-
manæ intra eam datur & accipitur, firma veri-
tate datur, firma veritate percipitur. Postea re-
fellit Ferrandi conjecturam: *Dixisti proptereā* hoc paternis canonibus definitum, ut mini-
ster verbi liber sit à culpa negligentiae. Quo-
modo autem in hac negligentia culpam mini-
ster incurrit, si in diligentia non aliquid pro-
ficit. Mox: *Proinde debet secundūm patr.*
nos canones infirmus ille, cuius voluntati non
deest attestatio proximorum, sine dubio bapti-
zari, ut & minister verbi liber sit à culpa negli-
gentiae, & ille fiat consors particepsque justi-
tiae.

V. Ceterūm dissimulandum non est
duriorem esse Fulgentii sententiam in alio
capite & alienam à beato Ambrosio; qui

fuit benignior , & hodiernæ scholarum doctrinæ præivit, docens Valentinianum Augustum , qui catechumenum in Ecclesia gerebat , oppressum ante suscepsum baptismi , non fraudari fidei suæ effectu. Vnde profluxit vim baptismi voto desiderati , qui dicitur baptismus flaminis , æquare baptismum re ipsa suscepsum. Fulgentius verò istum Æthiopem catechumenum , cui nec credulitas defuit nec fidei professio , ideo salvum asserit quia vera tinctus fuit. *Neque enim ab hac sententia* , inquit , id est , de salute Æthiopis , *nostrum animum revocare debet ulla suspicio* , ne quis dicat quod ille salvus esset si nec ad ipsam tinctiōnē corporis pervenisset , cùm utique non dicamus illum sine baptismi sacramento , sola confessione potuisse salvari. *Qui enim crediderit & baptizatus fuerit , salvus erit*. Illum utique adolescentem , quia credidisse & confessum fuisse novimus , ideo per sacramentum baptismatis salvum fuisse firmamus. *Qui si non baptizaretur , non solum nesciens , sed etiam sciens , nullatenus salvaretur*. *Via enim salutis fuit in confessione , salus in baptimate*.

V.I. Deinde in eodem Concilio canone xxxv. sic habet vetus: *Ut scenicis atque histriōibus ceterisque hujusmodi personis , vel apostatis conversis vel reversis ad Dominum , gratia vel reconciliatio non negetur*. Absunt à Dio-

nysii collectione Latina hæc verba: *Vel apud staticis conversis vel reversis ad Dominum gratias vel &c.* quæ tamen extant in Græca interpretatione Dionysii. Ut vel hinc pateat librariorum vitio ea jam olim omissa fuisse in Latinis codicibus. Græca sic se habent: ὥστε τοῖς οὐκωνοῖς, ἐμίμοις, καὶ τοῖς λόποις ποιουτορέόποις ἀροσώποις, η̄ σποζάταις, μετανοοῦσι, καὶ ὑπερέφουσι ἀρὸς τὸν θεὸν, καὶ η̄ καταλλαγὴν μὴ δένεθεν. Quæ rectè redundunt lectionem quæ est in veteri; cuius hæc est sententia. Non solum scenicis & histriónibus & ceteris hujusmodi personis, mimis puta, thymelicis, & universgregi qui ludit in theatris, & paganam gentilemque vitam agit, si ad Dominum convertantur, hujusmodi gratiam non esse denegandam, baptisimi scilicet, sed etiam iisdem, si apostasia & desertione à fide cùm defecerint, revertantur deinde, non esse denegandam reconciliationem. Rectè dicuntur *apostatici* fidei desertores, ut in codice Theodosiano, quos Græcus interpres σποζάτας usitato verbo reddidit. De histriónibus qui ad Christianitatis gratiam venire voluerint, ne cogantur ad eadem exercenda; legem petendam statuit canon septimus Concilii Carthaginensis anno quadringentesimo primo, post consulatum Stiliconis.

VII. Canon de legendis passionibus martyrum est **xiiii.** Concilii Africani apud Dionysium, alieno loco positus, cùm sit appendix canonis editi de scripturis divinis; cuius exordium cùm sic conceputum sit, *Item placuit ut præter scripturas canonicas nihil in Ecclesia legatur sub nomine divinarum scripturarum*, post enumeratos legis divinæ libros rectè subjungitur in veteri collectione: *Liceat etiam legi passiones martyrum, cùm anniversarii dies eorum celebantur.* Quare hunc ordinem secutus Ferrandus, postquam expressit è titulo **XLV.** Concilii Carthaginensis ut præter scripturas canonicas nihil in Ecclesia legatur, addit ex titulo **XLVI.** ejusdem Concilii:

Vt non liceat passiones martyrum legere in natibus eorum. Sed emendandum est erratum quod in hunc locum irrepisit, delenda negatio; legendumque, *Vt etiam liceat.* faciliter lapsu in manuscriptis codicibus legendi *non pro etiam*, ob literarum breviationem.

Ex editione
Petri Pi-
thœi.

VIII. Non omittenda quoque est illa lectio cannois **XLII.** qui est vigesimus Concilii Africani apud Dionysium. Agitur de pleibus quæ dicæcisi episcopali subjectæ nunquam proprios Episcopos habuerunt: ubi contumacium Presbyterorum factione popularium ani-

mi concitati , proprium Episcopum scis-
fa diœcesi habere postulant , exoso prop-
ter superbiam legitimo pastore . quod ne
fiat , prohibetur . Sed locus adducen-
dus est ex veteri collectione , ut ibi do-
ceatur esse sinceriorem lectionem quam
quæ habetur apud Dionysium . At ve-
rò , inquit Epigonius , quia nonnulli , quo-
dam dominatu adepto , communionem fra-
trum abhorrent , vel certè cum elevati fuerint ,
quasi in quadam arce , tyrannicam sibi do-
minationem vindicant . Significat typhum
secularem & tumorem quorundam Epis-
coporum , qui dominatum in clero exer-
cebant , & in cathedram elevati , ac si
esset solium quoddam regium & arx ve-
lут imperii , tyrannicam sibi dominatio-
nem vindicabant . *Elevari* est dictio illius
ætatis , quæ provectionem Principum sig-
nificat sæpe apud Marcellinum & alibi
quò alludit canon iste cum elevatos
Episcopos & velut in arce collocatos pro-
ponit . Sanè cathedra episcopalis subli-
mior erat & velut in fastigio constituta ,
unde possent Episcopi de superiori loco
fideles monere ; ut docent , non solùm
auctor constitutionum apostolicarum , sed
veteres plerique , & ipsum Concilium
Carthaginense quartum canone xxxv .
Hinc illa Gregorii Nazianzeni in ora-

tione ad synodum Constantinopolitanam:
 $\chi\alpha\rho\epsilon\mu\omega\ \hat{\alpha}\ \chi\alpha\theta\epsilon\delta\rho\alpha$, τὸ ἐπίφημον ὑψος τόπο,
 $\chi\alpha\theta\epsilon\delta\rho\alpha$. Vale ḥ cathedra, invidiosum
hoc & periculose fastigium. Hoc dicendi
genus periit apud Dionysium, ubi hæc
sunt verba: *Quia nonnulli, quodam domi-*
natu adepto, communionem fratrum abhorrent,
vel certè cùm depravati fuerint, quasi in qua-
dam arce tyrannica sibi dominatum vendicant.
Confer hæc verba cum superioribus, &
veteris collectionis fidem laudabis.

IX. Attamen vetus collector auto-
ritate sibi delegata usus, quædam sibi li-
cere putavit quæ non cadunt in exscrip-
torem merum vel in hominem privatum.
quod in reliquis Conciliis ostendemus
überius. in hoc unum & alterum obser-
vabimus.

Caput istius Concilii de visitandis pro-
vinciis, quod est xix. numero apud Dio-
nysium, omissum est in antiqua collectio-
ne: quoniam cùm restrictum sit ad spe-
ciale negotium Mauritaniæ visitandæ ab
Aurelio, à quo se tunc officio excusavit,
nec possit res ipsa trahi ad consequentiam,
inutiliter paginas illius collectionis occu-
paret, quæ ad generalem disciplinæ infor-
mationem pertinere debet.

Vice versa canon xlii. Concilii ter-
ti, quo cavetur ut Episcopi vel clerici

pauperes qui agros vel prædia compara-
verint post ordinationem , Ecclesiæ illa
conferant , omisssus est à Dionysio in re-
censendis canonibus Concilii hujus sub
Cæsario & Attico Coss. quia confirma-
tus cùm fuisset à Concilio sexto , eum eo
loco retulit , nempe canone xxxii. &
abstinuit ab eo repetendo in actis Con-
cilii tertii.

C A P V T VII.

De Concilio Carthaginensi quarto.

I. **S**equitur in veteri collectione
Concilium Carthaginense quartum,
habitum Honorio August. I V. & Eutu-
chiano Coss. sexto Idus Novembri,
anno scilicet trecentesimo nonagesimo octavo,
quod repudiandum esse Iustellus edidit,
& plerique cum ipso sectarii , nec ullam
fidem adhibendam canonibus centum &
quatuor qui huic Concilio adscribuntur.
Quam fiduciam ex eo desumunt quòd nec
Dionysius nec Ferrandus hujus Concilii
meminere , ejusque prima mentio apud
Isidorum Mercatorem habeatur, qui mer-
cibus minùs vendilibibus compilationem
suam sufficerit , in quarum fascem Conci-
lium istud fere compingunt.

II. Sed

II. Sed si veteris collectionis auctori-
tas illis affulisset, non dubito quin gra-
du cessuri fuissent, & obviis ulnis ample-
xuri tam religiosum antiquitatis Eccle-
siasticæ monumentum, quod ætatem il-
lam & dicendi charactere & rebus ipsis
decisis omnino redolet. Quippe in exa-
mine Episcopi, præter Marcionis, Pauli
Samosateni, Arii, & Apollinaris dogma-
ta, quæ inibi confodiuntur, licet tacito
eorum nomine, ab Episcopo exigitur
professio contraria hæresibus tunc vigen-
tibus, nempe ut novi & veteris testamen-
ti eundem credat auctorem, quod est con-
tra Manichæos. Ut credat hujus, quam
gestamus, & non alterius carnis resurrec-
tionem. quod est contra pullulantes tunc
Origenistas. Quæritur ab eo si nuptias non
improbet, si secunda matrimonia non
damnet, si carnium perceptionem non
culpet, si pœnitentibus reconciliatis com-
municet. quod est contra Novatianos &
Priscillianistas. Si in baptismo tam origi-
nale peccatum quam quæ voluntate ad-
missa sunt dimittantur. quod ad Cælestii
dogma pertinet, nondum planè detecto
Pelagianæ hæresis veneno: de qua non
tacuissent patres, si hac ætate erupisset.
Vnde patet hujus Concilii veritas & an-
tiquitas. Hoc autem in Concilio ordina-

S

tionum celebrandarum mysteria expli-
cantur, ordinum & graduum in Ecclesia
discrimina & ministeria panduntur. Non
omittuntur viduarum & sanctimonialium
consecrations ac munia, & sponsarum
benedictiones. Episcopis præterea & cle-
ricalis morum regulæ præscribuntur, quin-
imò & laicis, juxta quas vitam instituer-
debeant, Ut Christianæ ethices compen-
dium hoc Concilio contineri non imme-
ritò dixeris. Ex præfatione discimus ha-
bitum Carthagine sub Aurelio. quod
ipsæ quoque subscriptiones Episcoporum
testantur, Aurelii, Donatiani, & sancti
Augustini Hipponeñsis.

III. Tempus celebrate Concilii incidit,
ut dicebam, in sextum Idus Novembri,
Consulibus Honorio Augusto IV. & Euty-
chiano. Post eorum consulatum aliud habi-
tum est Carthaginense Concilium quinto
Kalendas Maias, scilicet anno sequentre
centesimo nonagesimo nono, in quo lega-
tio decreta ad Imperatores ut lege cave-
rent ne quis ab Ecclesiis ad eas confu-
gientes abstraheret. Ejus meminit Dio-
nysius, omisso priore. Nec silentii poenas
sustinere debet ille, nec præteritione quo-
que sua censendus est damnasse Conci-
lium nostrum. Eandem ob causam pra-
terivit in collectione sua hanc synodus

qua duas habitas sub Grato & Genetlio: quoniam collectio vetus eas integras complexa cum esset, non erat quod Dionysius eas iterum ad suam curam revocaret. Quod de ceteris, quas ille commemorat, dici non potest: quoniam vel omissae penitus erant in collectione veteri, illae nempe quae canones non ediderant, aut aliarum canones ordine diverso resensiti vel etiam imminuti erant, ut novam operam requirere viderentur. quod in hac dissertatione nostra satis manifestè ostenditur.

IV. Præterea Concilii istius quarti ratio & institutum, cum ad reconditam disciplinam ordinum sacrorum explanandam & ad mores informandos pertinet potius quam ad externam dispositiōnem judiciariamque trituram, de qua in aliis Conciliis statuitur, Dionysius existimavit non esse quod illud suæ collectioni adjungeret, præsertim cum satis priore illa & antiqua vulgatum esset.

V. Sanè de Ferrando dubitandum non est quin sciens & consultò, ob superiorem rationem, non meminerit hujus Concilii in sua breviatione canonum, ut dixi superius; utpote qui Concilii Carthaginensis habiti anno ccccxvii. titulos cum laudet, eos tamen qui ab eo de gra-

S ij

tia Dei editi sunt prætermittat, quoniam ad fidem, non autem ad disciplinam ecclesiasticam, pertinent. quos tamen Dionysius non omisit, ut nobis integrum Concilium proponeret.

C A P V T VIII.

De Concilio Carthaginensi quinto.

I. **C**ONCILIO MODERUM quintum in collectione veteri est illud quod habitum fuit post consulatum Flavii Stiliconis, xiv. Kalendas Iulias, id est, anno quadringentesimo primo: cui adjuncti sunt quoque canones synodi habitæ Vincentio & Flavito Consulibus, Idibus Septembribus ejusdem anni. Concilii priors præfatio extat integra in collectione Dionysii: quæ quidem suo loco posita est in editione Latina & Græca Parisiensi codicis canonum Africanorum; quæ perverso ordine posita fuerat in editione Moguntina, nempe ante canones Concilii tertii Cæsario & Attico Coff.

II. Præcipua hujus synodi cura fuit ut legatio decerneretur ad transmarinas partes, tum ad sedem apostolicam, tum ad Imperatores, ut Ecclesiae Africanæ necessitatibus subveniretur. Ac primò cùm

ob Donatistarum sævitiam grassantem & bellorum excidium apud Ecclesias catholicae maxima clericorum esset penuria, supplere numerum aliter non poterant Africani nisi liberum illis esset redeentes ab hæresi Donatistarum in clerum adsciscere. quod prohibitum ne fieret à sede apostolica & à Mediolanensi profitetur Aurelius, id est, in plenario Concilio Italico. atque ideo conveniendos Anastasium sedis apostolicæ Episcopum & Venerium sacerdotem Mediolanensis Ecclesiæ, ut communi periculo provideant & *consentiant*, quemadmodum loquitur canon primus, ut saltem qui parvuli baptizati sunt à Donatistis, & majores facti cognitum errorem deseruerunt, possint clericatus officio admoveri. Qua de re consulendos quoque Siricium & Simplicianum antea constituerant canone **X L V I I I**. Carthaginensis tertii. Vnde patet decreta Romanæ sedis in Concilio Italico edita ipsos quoque Africanos obstrinxisse, & eorum veniam atque remissionem ob publicam necessitatem à sede apostolica præcipue, & à Mediolanensi quoque, utpote per Italie vicariatum ceteris Episcopis præfecto, petitam. Itaque caput primum istius Concilii, quod est apud Dionysium, rectè omissum est in collectione veteri, quo-

S iiij

niam cùm res ipsa penderet ex arbitrio
sedis apostolicæ , & nullum ea de re il-
lius extaret rescriptum , inutile erat con-
sultationis istius iterum meminisse.

III. Secundum quoque caput recte
omissum est à collectore , quoniam nihil
definitur quod ad disciplinam pertineat,
id tantum decernitur postulari ab Impe-
ratoribus , ut templa idolorum quæ sunt
in agris dirui jubeant. Qua ratione omis-
sa sunt etiam caput quartum de pagano-
rum conviviis lege Principis tollendis , &
quintum de spectaculis quoque & ludis
theatrorum lege prohibendis , ne saltem
fiant die dominica vel ceteris diebus ce-
leberrimis.

IV. Tertium sanè caput omissum non
est à collectore veteri , sed summa auto-
ritate in melius commutatum. Agitur de
cognitione quam clerici de causis laico-
rum suscipiebant *jure apostolico* , ut loqui-
tur canon , *Ecclesiis imposito* , ubi alludit ad
locum Pauli , quo monentur fideles ne ad
forum coram ethnicis litigaturi pergent ,
sed potius Episcopi & clericorum arbit-
rio se committant. *Si enim angelos judica-
bimus* , inquit Paulus , *quanto magis secula-
ria*. Ex quo Apostoli monito inductum
ut litigatorum arbitria in se reciperent
Episcopi , ac si mandato apostolico , ob-

fidelium concordiam alendam, ad id es-
sent adstricti. quo de onere Episcopis im-
posito non tacent auctor constitutionum
apostolicarum, Chrysostomus, Ambro-
sius, Augustinus, & alii. Quod confir-
matum fuit lege Constantini, adeo ut
unus è litigatoriis invitum adversarium
cogere possit ad subeundum Episcopi ju-
dicium. Enimverò cùm Episcopi senatum
suum haberent, ut loquitur Hieronymus,
sive presbyterium, ut loquitur Cyprianus
una cum Paulo, Presbyteros suos velut
assessores suos contrahere debebant ad
judicandas causas, ut docet eleganter ca-
non **xxiiii.** Concilii quarti his verbis:
*Vt Episcopus nullius causam audiat absque
præsentia clericorum suorum. Alioqui irrita erit
sententia Episcopi, nisi clericorum præsentia
confirmetur. Quoniam verò à sententiis il-
lis provocari poterat ad judicem publi-
cum, (licet interim res judicata executio-
ni demandari posset, ut cautum erat le-
gibus) contingebat aliquando ut clericus
cognitor, aut qui præsens fuerat cogni-
tioni, evocaretur à judice publico ad te-
stimonium dicendum de iis quæ apud se
gesta erant. Quod ideo accidebat frequen-
tiùs quia sine scripto lites istæ, id est,
summarie, absque strepitu & figura judi-
cii, ut hodie loquuntur, ab Episcopis &*

S **iiij**

clericis dirimebantur. Quod sanè grave erat atque injuriosum clericis. Ideoque Africani, ut ab hac se vexatione libera-
rent, petendum aiunt ab Imperatoribus
*ut statuere dignentur ut si qui fortè in Ecclesia
quamlibet causam jure apostolico Ecclesiis im-
posito agere voluerint, & fortasse decisum de-
ricorum uni parti displicuerit, non liceat cleri-
cum ad testimonium devocari eum quia cogni-
tor vel præsens fuerit, ut nulla ad testimonium
dicendum ecclesiastici cuiuslibet persona pulsetur.*
Sed collector vetus ex auctoritate sibi
mandata hunc canonem emendavit, &
quod postulandum erat à Principe, ipse
ut constitutum à Concilio ponit. Vnde
nisi quis morosus esse velit, facile sibi per-
suadebit hanc collectionem, non privato
studio, sed publica potestate compactam,
& deinde Ecclesiis pro lege publicatam.
Hæc sunt itaque canonis istius apud col-
lectorem verba, alioqui etiam sinceroris
lectionis. *In principio statuendum est ut qui
fortè in Ecclesia quamlibet causam jure aposto-
lico agere voluerit, & fortasse decisio clerico-
rum uni parti displicuerit, non liceat clericum
ad testimonium devocari eum qui cognitor vel
præsens fuit. Et ut nulla ad testimonium di-
cendum ecclesiastici cuiuslibet persona pulsetur.*

V. Hinc docemur duo constituta. Pri-
mum, ut qui cognitor fuit non evocetur ad

Cod. Can.
Eccl. Afric.
c. 59.

testimonium dicendum. Secundum, ut nullus è clero ad testimonium dicendum in qualibet causa evocetur à judice publico. Corrupta lectio apud Dionysium primam illam regulam solam exprimit ; quoniam apud illum clausula ultima non est discreta à prioribus verbis, ut decet, propter omissam particulam conjunctivam *Et*, ita ut videatur potius ratio prioris definitio-
nis quam nova definitio. Quod ipse Dio-
nysius eo modo intellexit, ut patet ex
lemmate quod huic canoni præposuit : *Vt*
clericis de judicii sui cognitione non cogantur in
publico dicere testimonium. Sed in veteri col-
lectione lemma generaliter conceptum est
de omni testimonii dictione interdicta cle-
ricis in judicio publico : *De clericis ad testi-
monium non pulsandis.* Sanè lectio veteris
collectionis, *Et ut*, unde oritur secunda
illa generalis definitio, confirmatur ab
interprete Græco, qui lectionem illam
agnoscit. οὐα μηδὲ περσώτω τὸς ἐκκλησια-
τῶν περσικον ὅντειν ως ἡ ὁφέλειν μαρτυ-
ρεῖν. Hinc colligit lector antiquam esse
prohibitionem ne clerici à judicibus se-
cularibus ad testimonium citentur, nisi
ex consensu Episcopi. Quod decretali-
bus severè sancitum est, & ubique obser-
vatur præterquam in Galliæ regno, quod
suis privilegiis utitur. quamquam diffi-

tendum non sit à Iustiniano aliter constitutum.

V I. Eadem collectoris auctoritas elicit in capite sexto, ubi petendum decernitur à Principibus ut statuere dignentur ne clerici judicio Episcoporum damnati, ab Ecclesiis quibus præfuerant nec à quolibet defensentur, interposita pena damni pecuniæ atque honoris, quo nec ætatem nec sexum excusandum precipiant. Lex petenda erat ob poenam civilem, quæ ab Ecclesia infligi non poterat, sed tantum canonica. Sed collectori visum ut canonem istum secundum in sua collectione locaret, constituendo synodis auctoritate quod postulandum erat à Princeps. *Et illud statuendum.* inquit. & cetera subjungit. Vnde factum crediderim ut plures mediæ ætatis Pontificum constitutiones damno honoris & privatione dignitatum afficiendos jubeant qui suis decretis reluctati fuerint.

V II. Caput septimum de histriónibus ad fidem conversis, ne ad iudicras artes iterum cogantur, quoniam lex petenda decernitur, omissum est. Octavum quoque manifestam ob causam; quoniam illud tantum proponit Aurelius, ut manumissiones servorum in Ecclesiis Africanis fiant, si confacerdotes per Italiam id fa-

cere reperiantur. Quare cùm ex legibus Constantini relatis in Codice & à Sozo... *sozom. lib.*
meno commemoratis manumissi in Eccle... *I. c. 9.*
sia libertatem Romanam adipiscerentur,
non erat quòd in dubium adduceretur in
reliquis occidentis Ecclesiis quod Africa-
ni in posterum facere debebant. Nonum
quoque & ultimum caput omittitur, quia
pertinet ad speciale negotium Equitii
Episcopi jam olim damnati & ad trans-
marinas partes profecti ut turbaret Afric-
anæ Ecclesiæ statum, cuius impuden-
tiam repellendam à Legato decernitur.

C A P V T I X.

*De eodem Concilio quinto Carthaginensi,
& de Donatistis.*

EODEM anno cccc*i*. Vincentio & Flavito Coss. Idibus Septembris habitum est Concilium Carthagine ex omnibus provinciis Africæ, quod sanè aliud est à priore. Attamen cùm eodem anno celebratum fuerit, sub unius Concilii quinti nomine exhibetur in collectio- ne veteri. Quod accuratiūs & rectius di- stinguitur apud Dionysium, & ab ipso quoque Ferrando.

II. Donatistarum machinationes, & in-

fidiæ quibus Ecclesiam Africanam vexabant, Anastasii Episcopi Romani pectus adeo commoverant ut literis ad Episcopos Africæ datis eos hortaretur ne de hæreticorum insidiis & improbitatibus dissimularent, ut capitulo primo hujus Concilii docemur. Carthaginensis ergo synodus de Donatistarum causa tractans, cum eis Ieniūs agendum censuit, & plebes eorum communione infectas miserabilis illius erroris commonendas quo sunc devinctæ. Tum ut à judicibus petatur ut auctoritate sua juvent communem matrem Ecclesiam catholicam, judicia potestate inquirentes quid gestum sit in iis locis in quibus Maximianistæ, qui à Donatistis schisma fecere, basilicas obtinuerunt. Magni momenti hæc perquisitio videbatur futura, quoniam Maximianus Episcopus Carthaginensis ex parte Donati, cum à Primiano ejusdem partis Episcopo schismate divisus esset & anathemate ab adversariis ictus, pari eos damnatione excepisset, (ut copiosè docet Augustinus lib. III. contra Cresconium cap. XL. lib. IV. cap. VI. & in enarratione psalmi XXXVI.) istius Maximiani sectatores, ut schismatici, Donatistis potentibus à basilicis quas tenebant per iussa judicum deturbati erant, ut scribit

Augustinus libro IIII. contra literas Petiliiani cap. XXXIX. maximè cùm illa tempestate Maximianistæ recepti fuissent à ceteris Donatistis in communionem absque baptismi repetitione. Quo exemplo convinci poterant tum ab initio Donatistas tam iniquè ab Ecclesiæ unitate diffessisse temporibus Cæciliiani quam iniquè nunc clamabant Maximianistas à se schisma fecisse , tum stolidè pacem Ecclesiæ toto orbe diffusæ atque illius communionem baptismumque respuerere , qui suos olim sui Concilii plenarii auctoritate damnatos in communionem cum suis honoribus recipiant. quo argumento quoque utitur Augustinus epistola quinquagesima & libro de hæresibus. Ut autem facilius Donatistæ ad Ecclesiæ accedendi studio accenderentur , suomet exemplo alliciendos putavit hæc synodus. Itaque sicut ipsi Maximianistas suscepserant in clero cum suis honoribus , ita resipescentes Donatistas & ad catholicæ Ecclesiæ communionem redeuntes in suis gradibus recipiendos decernunt. Attamen quoniam Capuano Concilio vetitum fuerat ne clerici Donatistæ resipescentes in suis honoribus susciperentur , ea fuit hujus synodi pro transmarini Concilii decretis reverentia ut quam prohi-

bitioni generali exceptionem adhiben-
dam putabat , nempe ut ii soli recipian-
tur per quos unitati catholicæ consulitur,
judicio sedis apostolicæ committat ; ad
quam *maximè* , ut ait , & ad reliquos Epis-
copos transmarinos scribendum decer-
nit . Vnde patet sedis apostolicæ auctor-
itas præcipua in canonibus temperandis,
ab ipsis Africanis & ab orientalibus quo-
que jam olim agnita , ut uberiūs docui-
bro tertio de concordia cap. xiiii.

III. Quæ dixi , quatuor Concilii hu-
jus capitibus comprehensa , cùm ad ne-
gotia specialia Africæ pertineant , in ve-
teri collectione dissimulata sunt . Sed omis-
sum non est iteratum interdictum canone
quinto Concilii comprehensum , & in
tertium Concilii quinti conjectum , quo
Episcopi , Presbyteri , & Levitæ ab uxo-
ribus continere jubentur *secundum priora*
statuta , id est , juxta priorum canonum
Carthaginensium decreta , de quibus su-
periùs egimus . Græcus interpres , depravatam lectionem fecutus , reddidit ac si
scriptum esset *secundum propria statuta* ,
κατὰ ιδίους ὕψους . Quæ versio tolerari posset
nisi eam interpretatione sua corrupissent
Zonaras & Balsamo , qui ambiguum vo-
cis ὕψος , quæ legem & statutum æquè sig-
nificat ac limitem sive etiam temporis

terminum, ad suos orientalium mores confirmandos transferentes, hunc canonom sic explicant ac si decerneret ut tempore vicos suæ, Iudæorum exemplo, quisque sacerdotum contineat, redditurus post ministerii & ἐφημερίας functionem illam temporariam ad uxoris commercium. quod hebdomadariis Presbyteris, quos instituere Græci, competere posset. Sed quid fieri de Episcopis, qui Presbyteris & Levitis hoc canone junguntur, à quibus tamen Græci ipsi continentiam perpetuam ab uxoribus exigunt, & ex illo capite singularitas eorum in quaue Ecclesia vetat ne per vices fungi possint munere suo. Quare cùm clausula isthæc, καὶ τοῦ θεοῦ, ex interpretatione Græca, eos aquæ comprehendat ac Sacerdotes & Levitas, alia est adhibenda explicatio quam ea quæ recentioribus Græcis placuit, nempe ut propriis & gradibus suis aptis continentiae legibus astringantur. Quamquam alia lectio & verior est atque sincerior, omnemque difficultatem adimit, scilicet secundum priora statuta, id est, juxta id quod in prioribus Conciliis constitutum est. Ferrandus videtur hunc canonem laudare ex isto Concilio num. vi. *Vt Episcopi, Presbyteri, & Diaconi ab uxoribus abstineant. Concil. Carth. tit. III.*

I V. Sequitur in veteri collectione canon quartus de rebus Ecclesiæ sine consilio Primatis non alienandis : qui sine dubio ad hoc Concilium habitum Vincentio & Flavito Conſſ. pertinet , non ſolū juxta fidem antiqui collectoris , ſed etiam juxta Ferrandum , qui notat num. XLVII. *Vt Episcopi rem Ecclesiæ ſine Primatis Concilio non vendant. Concil. Carthagin. tit. v. Hippo. tit. ix.* Dionysius verò hic canonem iſtum omiſit , quoniam à Concilio ſexto can. XXVI. firmatus cùm fuifſet , ejus Concilii canones in capite Africanorum collocanti inutile videbatur hunc ſuo loco reddere. Sed vetus , qui Carthaginensis ſexti canones omiſit ex prioribus compactos , retinuit hunc canonem ſuo loco. Grave eſt hoc interdictum de rerum ecclesiasticarum alienatione abſque synodo Primatis ſive Metropolitani. Libera quondam Episcopis ſingulis , faltem cum prebbyterii confilio , rerum ecclesiasticarum alienatio ; ſed non vice versa Prebbyteris vacante Ecclesia , cùm reſcindendum juſferit hoc caſu contractum synodus Ancyra canone XIIII. Hanc potestatem Ecclesiarum damnis cavens Concilium Carthaginense , & deinde Hippoſene ſecundum , optimè reſtrinxit , & Primatis ſynodique provincialis decreto negotium commiſit,

commisit, exceptione solūm addita, nisi tam gravis premeret necessitas ut Primatem adeundi non supereffret spatium. Sed tunc quoque venditor vicinis Episcopis antea indicare, & post factum, Concilio provinciali referre debet Ecclesiæ suæ necessitates. Hæc est enim sententia canonis, cuius lectio luxata, sic constituenda est in veteri: *saltem curiositatem habeat* (id est, curam, Africana dictione) & vicinis Episcopis hoc antè indicare, & post factum, ad Concilium referre suæ Ecclesiæ necessitates. Quod si non fecerit, reus Concilio venditor teneatur. Hunc locum canon sexti Concilii interpretatus est potius quām exscripsit: *saltem vicinos testes convocet Episcopos, curans ad Concilium omnes referre Ecclesiæ suæ necessitates. Quod si non fecerit, reus Deo & Concilio venditor honore amissō teneatur.* Priorem partem Græcus non est asscutus. Legit enim, *vicinos testes convocet Episcopus, cùm legendum sit Episcopos.*

V. Hunc canonem excipit aliis in veteri collectione, quo definitur ne quis, relicta cathedra principali, in alia diœcēsos Ecclesia aut in proprio fundo diuitias quām oportet resideat. Quod his verbis Ferrandus expressit num. xvii. *Vt nullus Episcopus, dimissa matrice, in diœcesi constituat.* (legendum consistat) Concil. Car-

T

thagin. tit. vi. Vbi cathedra principalis
recte matrix redditur. Vnde matræ ca-
thedralæ in Concilii Carthaginensis cap.
cxxxiii. apud Dionysium.

V I. Canon de infantibus baptizandis
quoties non inveniuntur certissimi testes
de illorum baptismo, nec ipsi idonei sunt
propter ætatem de traditis sibi sacramen-
tis respondere, à Leone primo probatus
est, qui ejus in simili specie sententiam
sequitur in epistola ad Rusticum Narbo-
nensem. Sed mutilus est canon ille apud
Dionysium; ubi omissa est ultima clau-
sula, quam exhibet vetus, de consecra-
tionis Ecclesiis quoties de earum consecra-
tione dubitatur. Obiter autem monen-
dus est lector magnum oriri beneficium
ex tabulis parochialibus in quas bapti-
morum acta referuntur, unde non solum
infantium ætas ad res civiles, sed etiam
baptismi testatio probari potest: quibus
tabulis si usa fuisset vetus Ecclesia, ut li-
berorum censitione in actis publicis olim
utebatur Imperium, difficultatibus istis
de baptismo infantium se exemisset.

V II. Cautum fuerat in Concilio Car-
thaginensi tertio canone xli. ut quotan-
nis ad Concilium universale Africæ con-
venirent Episcopi, & per legatos redeun-
tes in provincias dies Paschæ ab Ecclesia

Carthaginensi denuntiaretur. Nunc duo constituuntur. Primum, ut formatarum subscriptione dies ille omnibus intimeretur, id est, ut in formatis quæ clericis peregrè proficiscentibus dantur, dies Paschæ adnotetur; quod si adhuc incertus est dies anni illius, præcedens adjungatur quo modo solet *Post consulatum* in publicis gestis ascribi, ut explicuit canon vigesimus synodi Milevitanae in veteri collectione, qui est centesimus sextus in codice canonum Africanorum ex Concilio Carthaginensi anni quadringentesimi septimi. Secundum est, ut tempus fixum & certum Concilii in decima die Kalendarum Septembrium constituatur. Quæ dies Africanis conventibus apta esse poterat propter anni tempestatem à provinciis Europæ diversam. *Dies verò Concilii idem servetur qui in Hipponeñsi Concilio constitutus est, id est, x. Kalendas Septembri.* Vetus autem collector tempus illud immutavit auctoritate sibi delegata, ut alibi dixi. *Dies Concilii, inquit, undecimo Kalendas Novembris servetur, scilicet post exactas ferias vindemiales, omissa mentione Concilii Hipponeñsis, in quo scilicet dies decima Kalendarum Septembrium constuebatur; à quo cùm recederet, non erat quod illud Hipponeñse Concilium iau-*

T ij

daret. Ceterum observare non posse-
bit hic agi de generali & universali totius
Africæ , de quo etiam canone decimo,
non autem de provincialibus synodis,
quæ à Primatibus sive Metropolitanis co-
gebantur: de quibus hic cavetur ut Pri-
mates , quando Concilium apud se con-
gregant , diem hic præstitutum universali
Concilio non impediunt. Ad istud exem-
plum decretum est de patriarchica syno-
do in canone x vii. octavæ synodi.

VIII. Canonem de intercessore dato
Ecclesiæ Ferrandus ex titulo nono Concilii
Carthaginensis laudat, id est, ex Concilio
habito Vincentio & Flavito Consulibus,
cui numerus ille respondet. Vacantibus
Ecclesiis præficiebatur à Metropolitanu
Episcopus ad dissidia populi componenda,
ne per varia studia in eligendo Episcopo
in apertam seditionem erumperent. Di-
ctus fuit intercessor quia dissidentibus in-
tercedebat , medium se præbebat & con-
ciliatorem. Vnde *μείτης* dictus ab inter-
prete Græco. A Ferrando dicitur inter-
ventor num. xxii. *Ut nullus Episcopus ca-*
thedram cui datus fuerit interventor plusquam
annum teneat , sed ipse eis Episcopum petat.
Concil. Carthagin. tit. ix. Dionysius quo-
que in lemmate canonis interventorem
appellat. Sequenti seculo dictus est visi-

rator à Gregorio Magno. Visitatoris usum & nomen retinuere posteri , ut patet ex Hincmari epistolis à Sirmondo editis ; qui ex more tunc recepto non antè visitatorem Episcopum Ecclesiæ vacanti præfiebat quām Regem consuluisset, ut ex ejus arbitrio persona visitatoris penderet, nempe ut cleri & populi animos ad electionem Regi gratam inflechteret.

IX. Capita duo apud Dionysium , quorum alterum agit de conveniendo Cresconio Villaregiensi ut se sistat proximo universali Concilio Africano , & alterum de ordinando Episcopo in Ecclesia Hipponensium Diarrhytorum, omissa sunt à veteri , quia sunt specialia Africæ negotia.

X. Canon autem undecimus , quo statuitur ne Presbyteris aut Diaconis ob gravorem culpam à gradu remotis manus pœnitentiæ imponatur tamquam Iaicis , hic est suo loco positus in collectione veteri ; quem Dionysius inter capita Carthaginensis sexti jam semel à se positum hic repetere noluit. Ratio verò hujus statuti petenta est ex Basilio cap. xxxii . qui ait dupli pœna affigendum non esse Presbyterum & Diaconum , tum depositione , tum laboribus pœnitentiæ publicæ.

T iij

XI. Undecimi canonis definitione recte conjungitur canon duodecimus, quo accusatis clericis annus conceditur ad diluendum crimen sibi impositum. Quoniam verò textus corruptus est tam in collectione veteri quam in Dionysiana, emendandus à nobis erit postquam vulgatam lectionem proposuero. *Quoties*, inquit, clericis convictis & confessis in aliquo crimine, vel propter eorum quorum verecundiæ parcitur, vel propter Ecclesiæ opprobrium, aut insolentem insultationem hæreticorum atque gentilium, si forte cause suæ adesse voluerint & innocentiam suam afferere, intra annum excommunicationis suæ hoc faciant &c. Quænam ambo consequentia est in his verbis, ut convictus & confessus innocentiam deinde suam afferat? Convictus & confessus pro iudicato habetur juxta legum præscripta, est *autος τέκνος*, ut loquitur Paulus. Presbytero de se confessò non parcitur, ex canone nono Concilii Neocæsariensis: quia (ut inquit Valentina synodus habita anno CCCLXXIV.) *reus est vel ven confessione vel mendacio falsitatis*. Quare sine dubio legendum est: *Quoties clericis convictis nec confessis in aliquo crimine vel propter eorum verecundiā parcitur, vel propter Ecclesiæ opprobrium*. Mutandum enim illud, quorum verecundiæ parcitur, ne alioqui suspensa

fit oratio, & neverbum desit à quo non
mina dativi casus, *clericis convictis*, regan-
tur. Attamen vetus est mendum, ab ipso
etiam interprete Græco expressum, ne
dicam ab Ivone & Gratiano x i. q. 111.
Rursus constitutum. ubi ancipites sunt glof-
fatorum de mente canonis istius opinio-
nes. Sententia itaque canonis hæc est
quam exhibet Ferrandus num. cxxxvi.

*Vt accusatus clericus intra annum causam suam
agere debeat. Concil. Carthag. tit. xiiii.* Or-
do antiquus judiciorum ecclesiasticorum
hinc defumi potest. Testes recipiebantur
adversus reum gravioris criminis. Eorum
testimonio convictus, communione absti-
nebatur: qui deinde vel se purgabat, vel
confessione criminis facta, pœnitentiæ
beneficium petebat absque ulla temporis
præscriptione. Hic anni tempus post ex-
communicationem illi inflictam compu-
tandum clero conceditur, ut se purget.
quo tempore elapsa, non amplius audi-
tur. Inde factum ut decretis recentiori-
bus laici quoque excommunicati ad pur-
gationem vel ad petendam absolutionem
adigantur.

XII. In canone xiiii. de alieno mo-
nacho non ordinando vox repertum, quam Dif. 56. si
vetus & Dionysius præferunt, & ex eis ^{quis de alte-}
Gratianus, cubat in mendo, & restituenda

T iiiij

*Vide Balsa-
mon. in can.
82. synodi
Carthag.*

lectio ex interprete Græco: *Si quis de alterius monasterio receptum.* ἐάν τις δέποιτι λόγιον μυραγηλου ἀποδέξῃ τίνα.

XIII. Titulus xv i. apud Dionysium abest à veteri , recte , quoniam huic speciei satis cautum erat duobus capitulis Concilii Carthaginensis tertii. Etenim canone xiii. constitutum est ut Episcopi & clerici hæreticis, etiamsi consanguinei sint, nihil per donationem aut testamentum conferant. Canone autem XLIX. Episcopi & clerici quod ex peculio Ecclesiæ acquisierint, jubentur suis Ecclesiis conferre. De eo autem quod illis ex liberalitate alijus vel ex successione cognationis obvenerit, libera disponendi facultas relinquitur ; dummodo ita se gerant ut eorum proposito congruit. Alioqui honore ecclesiastico indigni judicabuntur. Quam in poenam incidissent sine dubio si hæreticis vel gentilibus consanguineis aliquid contulissent, quia id vetitum canone decimo tertio. ne de personis infamibus loquar. Ceterum si extraneos heredes instituissent, dummodo Christianos , immunes erant à culpa. Canon autem xvi. hujus Concilii tacens de clericis , vetat ne heredes extraneos à consanguinitate sua Episcopus Ecclesiæ præferat, nedum consanguineos hæreticos aut paganos ; addita

gravissima poena, nempe anathematis post mortem. de qua tantopere disceptatum fuit in Quinta synodo. Additur quoque, quod huic poenæ est consecrarium, ne nomen ejus inter Dei sacerdotes reciteretur; scilicet in sacrificio, quando ex diphyschis sive libellis Ecclesiæ cujusque nomina defunctorum Episcoporum recitata, Deo commendabantur, ut patet ex actis Quintæ synodi. Vnde discimus hanc quoque consuetudinem in Ecclesia Africana perinde ac in ceteris universi orbis Christiani invaluisse.

XIV. Canones reliqui hujus Concilii quinti cum Dionysio convenient, adeo ut operam nostram non desiderent, præcipue cum Notas in universos canones non edamus,

C A P V T X.

De Concilio Carthaginensi sexto.

I. **O**RDO veteris collectionis nos ducit ad Concilium Carthaginense sextum: quod aliud est apud Isidorum, aliud apud veterem collectorem. In illo quippe perturbata Conciliorum serie octavum seu Milevitanum dicitur; quod in collectione antiqua rectissimè sextum nuncupatur, depulsis ex eo gradu

sesto vulgato & septimo, quæ in veteri septimum & octavum vocantur. Sanè cùm in eo quod dicitur sextum recitata fuerint priora Concilia, necesse est ut ea de quibus statim agemus, inserta fuerint illius Concilii actis, & numero sicut tempore Concilium sextum vulgo dictum anteverterint. Nos tamen recepta numerandi consuetudine usi perpetuo sextum Carthaginense vocamus quod eo nomine hoc usque designatum fuit juxta collectionem Isidori depravatam in illis numeris; qui tamen hujus mutationis causam sibi visus est aliquam habere ex eo quod synodus Milevitanam à Carthaginensibus secernebat.

I I. Quod ad rem attinet, in collectio-
ne Dionysii exhibetur synodus Milevi-
tana prima celebrata Arcadio & Honorio
Augg. v. Conff. sexto Kalendas Septem-
bris, id est, anno quadringentesimo se-
cundo, in civitate Milevitana, confiden-
te Aurelio Carthaginensi Episcopo in
Concilio universalis, ut habent acta. Differt
hæc synodus ab altera ejusdem nominis,
quæ habita fuit contra Pelagium Hono-
rio v i i. & Palladio Conff. anno c c c -
x v i. sub Silvano Primate Numidiæ ab
Episcopis ejus provinciæ; cuius epistola
synodica extat inter epistolas sancti Au-

Augustin.
epist. 92.

gustini. Existimabat Baronius duo isthæc Milevitana Concilia in unum compacta à collectoribus, & canones de gratia in secundo editos, transcriptos esse in primum, & ceteris canonibus editis in primo adjunctos. Quod tamen dici non debet, cùm nullos canones de gratia ediderit secundum Milevitanum, licet Pelagij hæresim Episcopi proscripterint, contenti datis ad Innocentium literis, quæ extant apud Augustinum, sententiam suam significasse.

III. Fatendum est quidem in collectione veteri canones quosdam desumptos ex synodo Milevitana prima, compactos fuisse in unum corpus cum alijs canonibus depromptis ex duobus Conciliis Carthaginensibus celebratis anno quadringentesimo septimo & anno quadringentesimo decimo octavo. Quare huic compilacioni sequens titulus præfigitur in veteri. *Concilium sextum Carthaginis Africæ, & in Milevitana civitate habitum.* Quibus verbis satis significatur hoc corpus è variis Conciliis esse consarcinatum. Enimvero licet Milevitanum tempore sit potius, quoniam tamen Carthaginis nomen dignitate præcellit, & plures canones petiti sunt ex duobus Conciliis Carthaginensibus, huic Carthaginensis nomen inditum est à veteri collectore, tum etiam ne pertur-

baretur ordo numerandi hæc Concilia sub nomine Carthaginensium , quamvis non taceatur in titulo nomen Milevitani.

IV. Ceterum quoniam ratio fidei ceteris articulis præfulgere debet, vetus collector Concilium istud auspicatus est ab octo canonibus de gratia Dei editis adversus Pelagium , quos ex universali Concilio Carthaginensi celebrato anno quadragesimo decimo octavo , cuius acta sunt apud Dionysium , transcripsit , & in capite ceterorum canonum posuit. Sanè partem præfationis Milevitano primo præfixæ usurpavit ; & ut materias connecteret, de suo hæc ultima verba addidit aut ex præfatione Carthaginensi illi præfixa, qua caremus : *Ideoque pariter quædam de causis fidei , unde nunc quæstio Pelagianorum imminet , in hoc cœtu sanctissimo primitus tractentur , deinde subsequantur & aliqua quæ disciplinæ ecclesiasticæ necessaria existunt.*

V. Præterea ut Carthaginensibus Conciliis potiorem locum daret , post octo canones de gratia subjunxit canones petitos ex altero Carthaginensi anni cccc. vii. quorum primus est apud Dionysium , de Concilio universali Africæ , nefiat quotannis , sed quando exegerit causa communis ; qui est in hoc nostro nouus. Deprompti sunt ex eodem Concilio

annni cccvii. canones x. xi. xii. & xvi. qui proprius est Africæ apud Dionysium. *Placuit præterea ut executores in omnibus desideriis quæ habet Ecclesia quinque postulantur*, qui in diversis provinciis impertiantur. Agit de publicis executoribus postulandis à Principe, qui rebus Ecclesiæ immincent. Vetus autem, non designato numero, sic generaliter expressit : *Placuit præterea ut executores in omnibus justis desideriis impertiantur*. addita quoque per modestiam voce *justis*, quæ patribus Africani exciderat.

Decimus septimus indidem quoque est desumptus, quo cavetur ne dimissus vel dimissa, etiam ob adulterium, alteri conjungantur. Qua definitione tandem sopia est antiqua illa quæstio in Arelatensi primo & apud Græcos indecisa.

Decimus octavus est haustus ex eodem Carthaginensi, verbis quæ in authentico sunt Africæ propria ad constitutionem generalem accommodatis. *Quicunque non communicans in Africa, in transmarinis ad communionem obrepserit, jacturam clericatus accipiat*. Ita Dionysius. Vetus autem sic habet. *Quicunque non communicans in provincia propria, & in aliis provintiis vel transmarinis partibus ad communicandum obrepserit, jacturam communionis vel clericatus accipiat*.

Petita quoque sunt ab eodem Concilio capitula xix. & xx. ubi constituitur ne quis perget in comitatum Principis sine formata , verbis accommodatis in veteri ad usum communem , quæ in authentico de formata missa ad Romanam Episcopum loquuntur. Omissa verò sunt alia illius Concilii capita à collectore veteri, quoniam propria erant Africæ.

V I. Ex Milevitano Concilio desumpta sunt capitula xiii. xiv. xv. quæ agunt de Episcoporum ordine inter se , de literis dandis ab ordinatoribus cum die & Consule , & ne quis ad aliam Ecclesiam trahatur quicunque in sua vel semel legit. Reliqua capita , de archivo Numidiæ , de Quodvultdeo & Maximiano, ideo sunt omissa à veteri quia sunt specialia negotia Africæ.

V II. Ex Concilio Carthaginensi anni cccc xviii. petiti sunt canones xxi. xxii. xxiv. xxv. xxvi. xxvii. Reliquos omisit vetus , quia de Donatistis Episcopis conversis & de partitione dicēseon inter eos & catholicos Episcopos cùm agant , ad Africam solam pertinent. Sanè canon vigesimus tertius , qui est de converso ab hæresi ad unitatem catholicam & susceptam apud hæreticos pœnitentiam gerente, ut arbitrio Episcopi catholici

tempus pœnitentiae vel reconciliationis ei decernatur, nescio quam ob causam omis-
sus sit à Dionysio; quem tamen vetus ex-
hibet, & series rerum docet ad hoc Concilium
pertinere, ubi de conversione Do-
natistarum copiosè tractatur. Ex Ferran-
do, qui meminit hujus canonis, colligitur
in authentico actum de Donatista con-
verso, licet vetus ad omnes hæreticos ge-
neraliter definitionem more suo transtu-
lerit. Ferrandus num. L. *Vt Episcopi judi-
cio Donatistæ, qui apud suos acta pœnitentia
convertitur, tempus pœnitentiae vel reconcilia-
tionis decernatur. Concilium Carthagin. tit. II.*

Ceterūm acta Conciliorum habitorum
annis cccciiii. cccciij. & ccccv.
quæ de convenientiis Donatistis agunt &
de legationibus ad Principes, prudenter
vetus collector dissimulavit, quoniam suo
instituto non serviebant.

C A P V T X I .

De reliquis Conciliis Africanis.

I. **A**GMEN Conciliorum Carthagi-
nenium claudet illud quod vo-
cant septimum, cùm de sexto & octavo
superius egerimus. De septimo controv-
ertitur an sit idem Concilium cum sexto.

Non differre putant Binius & Iustellus, quoniam sextum habitum est post consulatum Honorii XII. & Theodosii VIII. octavo Kalendas Iunias Carthagine, septimum verò eodem loco & quinque post illa diebus, nempe 111. Kalendas Iunias. Non solum autem locus & tempus conveniunt, sed etiam numerus Episcoporum ducentorum decem & septem qui resedisse in Concilio sexto dicuntur in prefatione Concilii, & huic septimo eodem numero subscriptissse testatur collectio Dionysii. Attamen vetus collector adnotat hoc Concilium à triginta octo Episcopis celebratum, corrupto calculo. Legendum enim, xxiii.

II. Antequam hunc nodum dissolvam, observandum est à Ferrando canones huic septimo Concilio tributos laudari tamquam è Concilio à reliquis Carthaginensibus diverso, ut patet ex numerorum serie quam sequitur, similem computationi quæ est in veteri collectione, cuius fides ex eo probanda est quod in Concilio isto distinguendo in sexto adulteratorem habeat Ferrandum Diaconum. Ille verò canones istos citat num. LXXIII. cxcv. cxcvi. & cxcvii. Ratio verò hujus discriminis patet ex actis Concilii septimi, quæ docent plerosque Episcopos

ex

ex illis ccxvii. qui convenerant, con-
queitos fuisse ceterorum quæ agenda su-
pererant moras se sustinere non posse.
Quare ut illis redeundi in Ecclesias com-
meatus facilior esset & se ad iter accin-
gendum parare possent, ab universali
Concilio delecti sunt judices numero
xxiii. qui reliqua peragerent, scilicet præ-
ter Aurelium Carthaginem & Fausti-
num Episcopum Potentinum Legatum Ec-
clesiæ Romanæ, decem Episcopi legati
provinciæ proconsularis, tres legati Numi-
diæ, tres legati provinciæ Byzacenæ, tres
legati Mauritaniæ Sitifensis, tres legati
Mauritaniæ Cæsariensis. Vnâ cum judici-
bus delectis confedit Aurelius, & canones
quinque promulgavit. Quare non imme-
nitò Concilium diversum dici potest quod
nova statuta minore judicum numero de-
cernit. His capitulis constitutis subscrip-
sere qui ea ediderant. Die sequenti, id est,
secundo Kalendas Iunias, iidem electi judi-
ces epistolam ad Bonifacium Papam dic-
tarunt, quæ clausit acta Concilii sexti, &
posita est post canones hujus septimi con-
ventus. His gestis in unum compactis &
epistolæ ad Bonifacium die illo, nempe
secundo Kalendas Iunias, subscripsere,
non solùm Aurelius & provinciarum le-
gati, sed etiam Episcopi omnes usque ad

superiorem numerum c c x v i i . antequam Carthagine discederent ; non autem in suis quique Ecclesias , ut putabat Baronius.

III. Quæ dixi hausta sunt ex interlocutione Aurelii apud Dionysium : qui post decreta quinque illa capitula à se & à legatis provinciarum , ait sibi placere rerum omnium conclusionem facere , id verò ita fieri posse si primū quæ die illa tractata fuerant , id est , capitula quinque , gestis inserantur . quæ est sententia horum verborum : *Universi tituli designati & digesti hujus diei tractatum Ecclesiæ gesta suscipiant.* Titulus ille generalis qui disceptandus in hoc cœtu propositus fuerat , respicit personas quæ ad clericorum accusationem admitti non possent . Hujus quæstionis decisio digesta est per capita quædam , ita ut primo excommunicati non admittantur , secundo servi , liberti , hæretici , pagani , Iudæi , & infames , tertio ut qui unum crimen non probaverit , ad cetera non admittatur , quarto qui ad testimonium admittendi non sint ; quibus subjungitur de Episcopo qui excommunicat eum quem sibi soli crimen dicit esse confessum . Hæc omnia per capita digesta , ad explicandum titulum sive argumentum propositum , gestis illius diei inserenda in-

terloquitur Aurelius. Subjungit : *Quæ
verò adhuc expressa non sunt, die sequenti per
fratres nostros Faustinum Episcopum, Philip-
pum & Asellum Presbyteros, venerabili fra-
tri & coëpiscopo nostro Bonifacio rescribemus.
Et subscripterunt. Aurelius &c.* Die itaque
sequenti judices illi dilecti de rescribendo
ad Bonifacium acturi erant. Interim sub-
scribunt huic definitioni, scilicet iidem illi
qui de ea tractaverunt. Deinceps, quia
perventum erat ad finem totius discepta-
tionis & gestorum in controversia cum
Faustino, ceteri quoque Episcopi usque
ad numerum ccxvii. actis subscriptere
& ipsi quoque epistolæ ad Bonifacium
datae: quæ universis Episcopis præsentи-
bus relecta est.

C A P V T XII.

De canonibus adversus Pelagium.

NVNC operæ pretium est canonum
de gratia latorum adversus Pela-
gium occasionem & definitionum ratio-
nes paucis recensere, remissa ad Theo-
logos uberiori harum rerum tractatione.

I. Primo capitulo de statu & conditio-
ne naturæ Adami ante illius lapsum de-
cernitur adversus Pelagianos, qui dice-

V ij

Augustin.
lib. de pec-
cat. mer.
c. 2.

bant Adamum sic creatum ut etiam sine peccati merito moreretur, teste Augustino. Cur autem isthæc afferent, causa in promptu est, ne pœnam aliquam in posteros ex primi parentis peccato traduci faterentur. Hoc dogma cùm objectum esset Pelagio ex Cælestii scriptis in synodo Diopolitana, nempe *Adam mortalem factum, qui sive peccaret, sive non peccaret, moriturus esset, quoniam peccatum Ad ipsum solum læserit & non genus humanum*, hæc (inquit Augustinus libro de gestis Pelagii cap. x i.) *judicio illo ecclesiastico, anathematizante Pelagio, & Episcopis interloquentibus, constat esse damnata*. A qua tamen perversa sententia non discessere Pelagiani, ut passim docet Augustinus, tum libro primo imperfecti operis contra Julianum cap. l x v i. Quare necessaria fuit Concilii hujus Carthaginensis constitutio; quam secuta est Tridentina synodus Dogmatis hujus auctoritas ex sacris libris petenda est, in quibus disertè traditur mortem humano generi pœnæ loco inflic tam esse propter peccatum primi hominis, in epistola ad Romanos cap. v. & vi i i. in libro sapientiæ cap. i. & ii. Quare non immerito caput istud intra fiduci regulam reponitur ab Augustino lib. xiii. de civit. cap. xv. *Vnde constat inter Chri-*

stianos veraciter catholicam tenentes fidem, etiam ipsam nobis corporis mortem, non lege naturæ, quia nullam mortem homini Deus fecit, sed merito inflictam esse peccati; quam peccatum vindicans Deus dixit homini in quo tunc omnes eramus: *Terra es, & in terram ibis.* Mediæ igitur conditionis Adamus erat inter immortalitatem & mortalitatem, amborum capax; ut eleganter observat vetus auctor Theophilus Antiochenus ad Antolycum; ita tamen ut natura mortalis esset, quippe qui pabulo egeret quod illi Deus ex omnibus fructibus concederat præter vetitum; sed gratia & beneficio Dei futurus immortalis ex pastu ligni vitæ, ut docet Augustinus lib. xii. de civit. cap. xx.

II. Secundo capitulo damnatur aliud Pelagianorum dogma quod primo consequens erat, scilicet nullum reatum ex Adami proprio peccato ad ejus posteros origine transire, integrum proinde ac nulli sceleri nullique poenæ obnoxiam esse parvolorum recentium ab uteris matrum naturam. Peccatum itaque originale tollebat. Hoc inter capita de quibus interrogatus fuerat Cælestius in synodo Carthaginensi anno ccccxi. primum fuit, ut testatur Augustinus lib. i. de peccat. orig. cap. ii. iii. & iv. *Et Cælestius*
V iiij

quidem, inquit, in hoc fuit errore liberior neque in episcopali iudicio damnare volunt eos qui dicunt quod peccatum Adæ ipsum solum lœserit, & non genus humanum, & quid infantes qui nascuntur, in eo statu sunt in quo Adam fuit ante prævaricationem. Ideo traducem peccati negabat, idque se Roma dicentem asserebat audisse Ruffinum, teste eodem Augustino. Quod objectum est quoque Pelagio in Diospolitana synodo. Fatebatur quidem, ut scripturæ testimoniis satisfacere aliquo pacto videretur, solo Adamum exemplo nocuisse, quo posteros traheret ad imitandum, sed nec reatum neque poenam peccati ad posteritatem transmissum.

III. Opponebatur illis grave argumentum petitum ex baptismo parvorum. Eum quidem illi admittebant, sed in hoc tantum ut baptizati in filios Dei adoptarentur & consequi possent regnum cœlorum, non autem ut ab originalis peccati vinculo solverentur; à quo cùm liberos dicerent, vitam illis beatam & æternam promittebant, quamvis extra regnum Dei, ad quod per solum regenerationis lavacrum admitti posse dicebant, ut copiosè scribit Augustinus hæresi LXXXVII, lib, 1, de peccat. mer. & rem, cap. XXIX, epist, LXXXIX, &

alibi. Non erat istud solius Pelagii commentum , quod illi commune fuit cum aliis qui ætate illa peccatum ex traduce negabant, idéoque baptismum in parvulis ad alium finem quam remissionis peccatorum trahebant. Inter quos Ruffinus Palæstinus in libro de fide , nuper editus à Sirmondo : qui alias est à Ruffino Hieronymi adversario. Ruffini Palæstini hæc sunt verba : *Baptisma igitur infantes non propter peccata percipiunt , sed ut spiritalem procreationem habentes , quasi per baptisma in Christo creentur , & ipsius regni cœlestis particeps fiant.*

IV. Quare Cælestius in Carthaginensi synodo anno ccccxi. & in libello Romæ oblato dixit infantes egere baptismum. Hoc tamen admisso profligata est omnino nefaria Pelagii sententia de peccato originali. Etenim baptismus administratur in remissionem peccatorum, ut docent scripturæ & fidei regula, in qua universa Ecclesia unum baptisma confitetur in remissionem peccatorum. Ergo ipsi quoque infantes tinguntur ut peccata illis remittantur , non sanè propria , sed vetus illud & originale peccatum. A quo nodo his verbis Cælestius expediebat sese in libello oblato Romæ apud Augustinum libro de pecc. orig. cap. v. *Infantes debere*

V iiiij

baptizari in remissionem peccatorum secundum regulam universalis Ecclesiae & secundum evangelii sententiam confitemur, quia Dominus statuit regnum cœlorum non nisi baptizatis posse conferri; quod quia vires naturæ non habent, conferri necesse est per gratiæ libertatem. Mox addit: In remissionem autem peccatorum baptizandos infantes non ideo diximus ut peccatum ex traduce firmare videamur. quod longe à catholico sensu alienum est &c. Et illud ergo confiteri congruum, ne diversa baptismatis genera facere videamur. Et hoc præmunire necessarium est, ne per mysterii occasionem ad creatoris injuriam malum antè quam fiat ab homine tradicatur homini per naturam. Oppressum ferē rationis hujus pondere se fatetur qui tam molliter respondet. Necesse est, inquit, ut dicamus baptismum parvulis conferri in remissionem peccatorum. Alioqui duo genera baptismorum admittenda essent, alterum in adultis, quod in remissionem peccatorum datur, alterum in parvulis absque remissione. quod esset absurdum. Itaque dicit confitendum baptizari infantes in remissionem peccatorum. Quod sic intelligere cum oportebat juxta suæ sectæ regulam, quoniam idoneus est baptismus ad ea delenda, quando inciderint in futurum; sed nihil aliud in parvulis agi tunc vi lavacri quam ut Deo consecrentur,

adoptentur in filios, & regnum cœlorum adipisci possint. Addebat quoque, ut bene nati meliores fierent, apud Prosperum initio libri *De ingratis*.

V. Cavillationem illam elidit robustè Augustinus, & synodus ipsa Carthaginensis hoc capitulo secundo. Etenim si parvuli nihil ex Adam trahunt originalis peccati quod lavacro regenerationis expictur, inde fit consequens ut in eis *forma baptismatis in remissionem peccatorum, non vera, sed falsa intelligatur*. Quæ verba videntur prima fronte innuere ampliorem fuisse baptismi formulam quam sit illa qua hodie utitur Ecclesia Romana, *Baptizo te in nomine patris & filii & spiritus sancti*, addita scilicet isthac clausula, *in remissionem peccatorum*. Alioqui mancum & elumbe vide- tur synodi argumentum. Sed observan- dum est formam baptismatis non accipi ea significatione quæ in scholis huic no- mini tribuitur, quando de materia & for- ma baptismi disputant. Sumitur hic pro- ritu, ordine, & forma baptismi in Eccle- sia universalis exerceri solita; ubi suus est locus interrogationi quæ à cathecumenis mox tingendis fidei Christianæ professio exigitur, & inter cetera capita, remissionis peccatorum per baptismum consequen- dæ. Hoc fidei compendium vocatur re-

gula fidei ab Irenæo , Tertulliano, Augustino , & aliis veteribus. Hæc est quam regulam universalis Ecclesiæ vocabat Cælestius in loco superiùs prolato. Symbolum quoque fidei dicitur ab Hieronymo hac de re loquente libro tertio adversus Pelagianos. *Hoc unum dicam*, inquit, *ut tandem finiatur oratio*, aut novum vos debet symbolum tradere, *ut post patrem & filium & spiritum sanctum baptizetis infantes in regnum cælorum*, aut si unum & in parvulis & in magnis habetis baptismum, etiam infantes in remissionem peccatorum baptizandos in similitudinem prævaricationis Adam. Potest quoque Hieronymus explicari de symbolo seu fidei libello à patribus in synodo Constantinopolitana secunda edito, ubi confitentur disertè baptismum dari in remissionem peccatorum: quem libellum cùm synodus œcumenica anno c c c l x x x i. constituisse, anno sequenti iterum coacta Constantinopoli, per synodicam epistolam ad Damasum Papam transmisit. Quare regulam fidei à synodo Nicæna & Constantinopolitana explicatam sequi se profitentur Legati apostolici in Concilio Calcedonensi. Attamen usus symboli illius recitandi in mysteriis statim non obtinuit, qui primùm inductus est occidente à Concilio Toletano tertio sub Recaredo Rege.

VI. Ceterum Hieronymi argumentum simile est illi quod usurpant patres Africani, qui præterea proxim Ecclesiæ de tingendis infantibus in remissionem peccatorum confirmant Apostoli testimonio, qui ait in Adamo omnes peccasse. quem locum de peccato originis Ecclesiam catholicam ubique diffusam semper intellexisse dicunt. Mox definitionem his verbis concludunt : *Propter enim hanc regulam fidei etiam parvuli, qui nihil peccatorum in se ipsis adhuc committere potuerunt, ideo in peccatorum remissionem veraciter baptizantur ut in eis regeneratione mundetur quod generatione traxerunt.*

CAPVT XIII.

De Pelagii dogmatibus & arcanis.

I. **A**NTEQUAM ad sequentia capitulo accedamus, quæ agunt de vi & necessitate gratiæ, penetrare oportet in Pelagii arcana, qui subdolis & versutis artibus doctrinam suam occulebat, ut qui gratiam Christi evertere conabatur, eam tamen videretur astruere, ne catholicorum hominum conviciis pateret. Docebat itaque liberum hominis arbitrium, quod ex Adami peccato nullum vitium

contraxerat, innatis viribus ex solo suæ conditionis præsidio posse bonum amplecti, malum vitare, & assequi regnum cœlorum, & ubi in utraque parte libera essent studia voluntatis, non facultatem his qui mali sunt ad bonum deesse, sed studium, ut loquitur Prosper de illius hæresi agens in libro de libero arbitrio ad Ruffinum. Hanc ergoli-beri arbitrii facultatem, gratiam vocabat, quæ nullis præcedentibus meritis, beneficio Dei, hominibus erat concessa, teste

*August. lib.
de hæres. &
epist. 105.*

Augustino pluribus in locis. Legis quoque & Prophetarum doctrinam alteram gratiam docebat Dei beneficio hominibus concessam, ut intelligerent quid se qui deberent, quid fugere, objectis suppliciorum terroribus & gloriae magnitudine & piorum hominum exemplis. Gra-tia legem in adjutorium misit, ut rationis lumen, quod pravitatis exempla hebetabant, & consuetudo vitiorum multimodis eruditionibus excitaret atque invitatu suo foveret, inquit Julianus Pelagianus.

II. Addebat tamen Pelagius, postadventum Christi neminem ad salutem per-venire posse nisi per fidem in Christum, per quam fidelis remissionem peccato-rum sive justificationem consequebatur. quam gratiam per singula momenta &

per singulos actus necessariam dicebat; quæ evangelii doctrina & Christi ipsius exemplo incipiebat & fovebatur. Sed callicitatem hominis detegit Augustinus, post relata Pelagii verba, in libro de gratia Christi cap. 11. Docet enim eum significasse, *ut semper in memoria retinentes & reminscentes dimissa nobis esse peccata, non pecemus ulterius, adjuti non aliqua subministratōne virtutis, sed viribus propriæ voluntatis, quid sibi remissione peccatorum præstītum fuerit recordantes.* Idem libro de gratia & libero arbitrio cap. xiii. *Dicunt etiam gratiam Dei quæ data est per fidem Iesu Christi, que neque est lex neque natura, ad hoc tantum valere ut peccata præterita dimittantur, non ut futura vitentur, vel repugnantia superentur.* Idem libro 111. contra Iulianum cap. xxiii. *Verū tu à vestro dogmate non recedis, inquit, quo putatis gratiam Dei per Iesum Christum Dominum nostrum sic in sola peccatorum remissione versari ut non adjuvet ad vitanda peccata & desideria vincenda carnalia, diffundendo caritatem in cordibus nostris.* Hic Pelagii error damnatur tertio capitulo synodi Carthaginensis. *Item placuit ut quicunque dixerit gratiam Dei qua justificatur homo per Iesum Christum Dominum nostrum, ad solam remissionem peccatorum valeat quæ jam commissa sunt, non etiam ad ad-*

jutorium ut non committantur, anathema sit.

III. Porrò veræ gratiæ remissionis per fidem in Christum multum detrahebat, qui ab ea auxilium non committendi peccata tollebat, ut dictum est. Præterea docebat fidem in Christum, voluntate per evangelii prædicationem excitata, viribus naturæ elicitam provocare quidem Dei misericordiam ut peccata hactenus admissa gratis condonet, ceterum recordatione illius remissionis semel adeptæ voluntatem hominis opera legis studiosè exercentem posse restituere se à lapsu & perfectam justitiam colere. Remissionem autem illam in sola peccatorum relaxatione constituebat & favore Dei externo, non in caritate in cordibus diffusa, ut docuit Augustinus; qui rectè adversus Pelagium disputat, si fides naturæ viribus acquiratur, ipsaque fides remissionem impetreret, hanc non omnino citra ulla merita dari, ut tradebat Pelagius victus Apostoli auctoritate docentis hominem justificari gratis. Vnde sequebatur primum illud Pelagii dogma de fide naturæ viribus adeptæ, esse falsum. Ut autem hoc gratiæ genus melius aperiatur, sciendum est duplicem ab eis gratiam constitutam, alteram quæ extrinsecus oblata menti, voluntatem illiciat, quæ libero

arbitrio sit veluti magistra , seque per co-
hortationes , per legem , per doctrinam,
per creaturam , per contemplationem ,
per miracula , per terrores extrinsecus ju-
dicio ejus ostendat ; quò unuquisque se-
cundùm voluntatis suæ motum , si quæsie-
rit , inveniat , si petierit , accipiat , si pul-
saverit , inveniat : quia scilicet gratiæ ip-
sus vocatio hoc primum circa nos agat
ut nostræ facultatis arbitrium admoneat ,
nec aliud sit gratia quam lex , quam pro-
pheta , quam doctor , ut loquitur Prosper
ad Ruffinum . Quæ quidem auxilia à Deo
conferri dubium non est . Sed quæ se-
quuntur , damnabuntur in doctrina Pela-
gii , nempe *ut qui sic edocti voluerint credant , & qui crediderint , justificationem merito fidei & bonæ voluntatis acquirant , ut loquitur idem Prosper . Hanc gratiam justificationis per fidem in Christum in baptismo conferri aiebant ; de qua Iulianus apud Augustinum libro primo operis imperfecti : Hæc ergo gratia , quæ in baptis- mate non solum peccata condonat , sed cum hoc indulgentiæ beneficio & provehit & adoptat & consecrat , hæc inquam gratia meritum mutat reorum , non liberum condit arbitrium .*

I V. Præter gratiam remissionis , aliam quoque Pelagius admittebat qua Deus interiore mentis illustratione cordis ocu-

O P V S C V L A

320

Ios aperit, ut sciat homo quid fugiendum, quid amplectendum, sed qua nihil in voluntate efficit ut homo agere valeat. quam gratiam his verbis exponit apud Augustinum libro primo de gratia Christi cap. vii. *Adjuvat enim nos Deus per doctrinam & revelationem suam, dum cordis nostri oculos aperit, dum nobis, ne presentibus occupemur, futura demonstrat, dum diaboli pandit insidias, dum nos multiformi & ineffabili dono cœlestis gratiae illuminat. Qui hæc dicit, gratiam tibi videtur negare? An & liberum hominis arbitrium & gratiam Dei confitetur?* Et capite decimo eandem gratiam à Pelagio commendari dicit qua *Deus future gloriæ magnitudine & præmiorum pollicitatione succedit, dum revelatione sapientie in desiderium Dei stupentem suscitat voluntatem, dum nobis suadet omne quod bonum est.* Quare gratiam profitebantur quæ mentem illuminaret, non quæ dilectionem inspiraret voluntati. Hunc errorem dispuxit synodus Carthaginensis capitulo quarto: *Cùm enim dicat Apostolus, scientia inflat, caritas verò, ædificat, valde impium est ut credamus ad eam quæ inflat nos habere gratiam Christi, ad eam quæ ædificat non habere; cùm sit utrumque domum Dei, & scire quid facere debeamus, & diligere nafaciamus.*

V. Deinde

V. Deinde Pelagius tum gratiæ illi
sue, id est, illuminationi mentis, tum
etiam gratiæ justificationis, id solum tri-
buebat ut juvaret ad facilius operandum,
ita ut absque gratia difficultius, imple-
re tamen posset homo divina mandata.
Hæc sunt Pelagii verba apud Augustinum
libro primo de gratia cap. vii. Deum ait
*illis quibus imperavit etiam gratiæ sue auxi-
lium subministrare, ut quod per liberum homi-
nes facere jubentur arbitrium, facilius possint
implere per gratiam.* Quem impii hominis
errorem synodus Carthaginensis damna-
vit anathemate capitulo quinto, ubi do-
cet Pelagium ista intellexisse etiam de
illa quam docebat justificationis & remis-
sionis gratia. quæ sanè illius etiam opini-
one munificentior erit quam mentis
illuminationes quæ extrinsecus advenie-
bant.

VI. Posset mirari aliquis cur in capi-
tulo tertio damnetur opinio Pelagii do-
centis gratiam justificationis ad peccato-
rum remissionem valere quæ jam commis-
sa sunt, non etiam ad adjutorium ut non
committantur, contraria autem opinio
hoc capitulo illi tribui videatur ut gratia
isthæc conferat ad facilius operandum.
Imo verò docebat Pelagius disertè gra-
tiam juvare ad resistendum diabolo. quod

idem est ac si diceret , ad peccata non
committenda. Hæc sunt illius verba apud
Augustinum libro primo de gratia cap.XI.
*Subditi simus Deo , ejusque faciendo volunta-
tem , divinam mereamur gratiam , ut facilis
nequam spiritui spiritus sancti auxilio resista-
mus.* Ad quæ isthæc adnotat Augustinus:
*In quibus ejus verbis certè manifestum est ita
eum velle nos adjuvari gratia spiritus sancti ,
non quia sine illo etiam per solam naturæ possi-
bilitatem non possimus resistere tentatori , sed ut
facilius resistamus.*

VII. Dicendum est Pelagium initio
detraxisse gratiæ remissionis vires resisten-
di peccatis , deinde vero catholicorum
querelis exagitatum , ut invidiam tam no-
vi & perniciosi dogmatis amoliretur , hoc
verbo negotium temperasse , dari gratiam
ut facilius operetur homo & temptationi
resistat. Ceterum qui sub ea voce late-
bat dolum synodus detegit , nempe signi-
ficari sine isto auxilio voluntatem bonum
agere posse. Quod damnat Concilium ;
eaque damnatio coincidit cum ea quæ in-
serenda est capiti tertio , qua docemur
gratiæ justificationis dari in adjutorium ,
non tantum ut facilius vitemus peccata ,
sed absolute ut vitemus , quoniam absque
subsidio gratiæ non potest liberum arbitrium
resistere tentatori nec concupiscen-

tiae libidinibus. Quare tertio capitulo gratiae necessitas docetur ad agendum; isto verò Pelagii astutia detegitur & damnatur, qui auxilium illius admittebat ad facilius agendum.

VIII. Restat ultimum Pelagianæ hæreseos dogma, quod tribus capitulis synodi confoditur, nempe sanctos & justos esse sine peccato. Sanè Hieronymus in epistola ad Ctesiphontem docet Pelagium initio dixisse posse hominem sine peccato esse si velit, quod ille cùm principio ita sentiret & palam profiteretur, quosdam fuisse & etiamnum esse perfectos qui peccato prorsùs carerent, cùm ea res invidiam illi crearet, eò confugit ut posse, si vellet, hominem sine peccato esse diceret, non tamen aut esse aut fuisse quemquam ejusmodi posse in natura; velle in arbitrio, esse in effectu locabat; & possibilitatis acceptæ confessione laudari Deum, qui hoc posse largitus est, nec esse ibi ullam laudandi hominis occasionem ubi solius Dei causa tractatur. Non enim de velle aut esse, sed tantummodo de eo quod potest esse differi; ut loquitur Pelagius apud Augustinum lib. I. de gratia cap. iv.

IX. Ceterum cùm versutus iste arcana doctrinæ suæ per vafritem publicè dissimulata discipulos suos clanculūm doce-

X ij

ret, ut testatur Hieronymus, necesse est ut impeccantiæ istius dogma suorum auribus insusurrarit. Alioqui, nisi hoc foret, & nisi jam fœdus error vulgò ab hæreticis spargeretur, frustra laborassent Africani patres in damnatione eorum qui dicerent sanctos & justos esse absque peccato. Quod falsum esse probant capitulo sexto, testimonio Ioannis in epistola prima: *Si dixerimus quia peccatum non habemus, nos ipsos seducimus, & veritas in nobis non est.* Idem conficiunt capitulis septimo & octavo, testimonii Iacobi Apostoli, Salomonis, & Danielis adductis, & ipsis quoque orationis dominicæ verbis graviter expensis. Sanè Augustinus hunc Pelagianis errorem tribuit libro quarto contra duas epistolas Pelagianorum cap. IV. *Dicunt sanctos in hac vita non habuisse peccatum, & sic evacuat oratio quam sancti tradidit qui non habebat peccatum & per quem sanctis orationibus dimititur omne peccatum.*

X. Alius erat ejusdem Pelagii error, cùm diceret posse hominem esse absque peccato, si velit. Attamen, ut animadverterit Augustinus, non ex eo præcisè condemnata est Pelagiana hæresis quòd hominem sine peccato posse esse defenderet.

August. lib. 1. de peccat. mer. c. 6. *Nam qui dicunt esse posse in hac vita hominem sine peccato, inquit, non est eis continuo*

incauta temeritate obſtendum. Si enim eſſe poſſe negaverimus, & hominis libero arbitrio, qui hoc volendo appetit, & Dei virtuti vel misericordiæ, qui hoc adjuvando efficit, derogabimus. Itaque poſſe eſſe conſitetur ſine peccato per Dei gratiam & liberum arbitrium; tametsi non eſſe conſiteatur, eò quod scriptura neminem ſine peccato eſſe teſtetur. Quamquam Hieronymus libro primo contra Pelagianos, ex eo quod nemo unquam ſine peccato fuit, ne poſſe quidem eſſe quemquam arbitratuſ. quod de ordinaria potentia intelligendum eſt. Itaque Pelagiana hæresis in eo conſiftit, tum quod clanculum docebat sanctos & justos eſſe quosdam eo sanctitatis gradu ut ſine peccato ſint, tum etiam quod ita poſſe perveniri ad illum ſatum aiebat viribus liberi arbitrii ut minimè eſſet neceſſaria gratia Christi. Quamquam ſubdolè addebat id non contingere absque Dei gratia. Sed qualem intelligeret gratiam patet ex antecedentibus.

XI. Ex iis quæ diſſeruimus maniſtum fit damnatum à fynodo fuifſe quod in Pelagii commentis hæresim olebat, prætermiſſis aliis capitibus quæ non abhorrebant à ſana doctrina; quale eſt liberi arbitrii definitione, de auxiliis vo-

*Augustin.
ibid. c. 7.*

luntatis. Certum quidem est Pelagium sanam integrumque putasse naturam hominis nulla originali labe infectam & debilitatam, quæ in potestate haberet tam bonum velle quam malum, nec præsidii gratiæ egeret ut agere recte posset. Libertatem arbitrii dicebat Julianus Pelagianus, teste Augustino libro primo contra Julianum operis imperfecti, in admittendi peccati & abstinendi à peccato possibilitate consistere & in quadam indifferentia ad plura. Hoc nullibi refellit Augustinus. Sed liberum in hominibus esse arbitrium utrique dicimus, inquit. Non hinc est Cœlestiani & Pelagiani. Quid autem in doctrina Pelagiana de libero arbitrio reprehendendum esset addit: Sed si quis ad colendum recte Deum sine ipsius adjutorio dicit esse in hominibus liberum arbitrium, & quis quis ita dicit Deum nascentium conditorem ut parvolorum neget à potestate diaboli redemptorem, ipse Cœlestianus & Pelagianus vocatur. Quare non audiendi sunt recentiores quidam, qui proprietatem & naturam liberi arbitrii quallem Pelagiani definiebant, scilicet in illo indifferenti statu, inter hæretica decreta non satis bona fide percensent contra veterum mentem, Hieronymi, Augustini, & synodi Carthaginensis, qui litem nullam ea de re

Augustin.
lib. 2. de
nupt. c. 3.

Pelagianis moverunt, quos auctores hujus doctrinæ scirent non esse, sed illos eam ex communi Ecclesiæ sensu hau-sisse.

XII. Legis magisterium atque doctrinam prophetarum, evangelii predicationem, exemplum Christi, gratiam justificationis, quæ peccata condonat in baptismo, adoptat & consecrat, adjumenta & beneficia tum extrinsecus advenientia, tum intérieures mentis illuminationes à spiritu sancto profectas docebat & admittebat Pelagius. Sed ea omnia rectè instituendæ vitæ auxilia non damnavit Concilium Carthaginense, quoniam à regula catholicæ fidei non erant aliena. Praeclarè autem dixit Cyrillus Alexandrinus in commonitorio: *Non omnia quæ dicunt hæretici fugere ac detestare oportet. Multa enim afferunt ex iis quæ & nos ipsi profitemur.* Quippe, ut obseruat Gregorius Papa, *habent hoc hæretici primum ut malis bona permisceant, quatenus facilè sensui audientis illudant.*

*Gregor. lib.
5. Moral.
c. 10.*

XIII. Quæcunque autem perversa & à veritate fidei Christianæ abhorrentia docebant Pelagius & ejus sectatores, anathemate confixa sunt à patribus Africani. Mortem inflictam Adamo in peccati pœnam, traductam in ejus posteros originalis peccati labem negabant. Gratiae

X iiiij

necessitatem in adjutorium voluntatis, ut peccata vitare possit & mandata divina implere, non fatebantur. Sanctos esse sine peccato, adversantibus scripturis, tecte & subdolè secreti sui consciis tradebant. Hæc sunt falsa & hæretica dogmata ex quibus præcipuè conflatum erat sectæ illius corpus, quæ damnata sunt à patribus Africanis.

X I V. De vita æterna & regno cœlorum quod docuit, gratiam esse, nec criminis vertit Augustinus neque synodus Carthaginensis, nisi quatenus eam comparari per sanctitatem docuit, quæ post adeptam gratuitò justificationem per fidem in Christum, naturalibus arbitrii vi-ribus absque gratiæ cooperantis necessitate per bonorum operum incrementa exercetur. Vnde prædestinasse Deum ait

*Augustin.
lib. de præ-
dest. c. 18.
¶ 19.*

filios quos futuros sanctos immaculatosque præcivit. Utique ipse non fecit, nec se facturum sed illos futuros esse præscivit; ut loquitur Pelagius apud Augustinum. Caput erro-
ris in eo versatur quòd constantiam illam & perseverantiam in sanctitate in sola li-
beri arbitrii potestate absque gratiæ ne-
cessariis adjumentis constituebat. Quod caput datum semel, non erat quòd ite-
rum in explicatione prædestinationis dam-
naretur à Carthaginensi synodo, quæ spe-

cialem de prædestinatione quæstionem attingere noluit ob eas quas inferiùs pandemus illius consilii rationes.

CAPUT XIV.

De Concilio Diopolitano & aliis habitis in causa Pelagii.

I. **C**V M autem juxta legum & canonicum ordinem nemo de crimine impetri possit nisi aliquis accusationem suscipiat, hinc factum ut in conventu Hierosolymitano quæ fuerat derelicta cognitio adversus Pelagium, renuente Orosio accusatorem se gerere, statim restaurata fuerit in synodo Diopolitana. Hæc à quatuordecim Episcopis Palæstinis anno cccc xv. in urbe Diopoli acta; cui præerant Eulogius Metropolita Cæsareensis & Ioannes Hierosolymitanus, qui Pelagi personæ favebat. Eros quippe Arelatensis & Lazarus Aquensis Episcopi Galliani Palæstinam advehti, capitulis aliquot ex Pelagi libris collectis, eum libello dato reum detulerunt apud synodum illam: quò cùm se ad accusationem prosequendam conferrent, alter eorum morbo implicatus, ut neque socius illius, qui curam ægri gerebat, adesse potuerunt, ut docet

vetus auctor apud Photium codice LIV.
Quare judicium factum est reo tantum
præsente, absentibus ex justa causa & non
tergiversantibus accusatoribus, quod non
oportuit factum, sed differenda cognitio
ex juris ordine. Veruntamen cum ex li-
belli editione de crimine objecto consta-
ret, & Pelagius evocatus capitula sibi ob-
jecta damnaret anathemate, visum judici-
bus catholicum pronuntiandum qui ca-
tholicam fidem profiteretur & dogma ha-
reticum abnegaret. Subreptum tamen il-
lis fuit ab homine doloſo & veterato-
re, qui verborum ambiguis strophis virus
suum tegens, Episcoporum sententiam
a capite suo avertit, quod non accidisset
si accusatoribus præsentibus judicium ex
more actum fuisset, qui dissimulatorem
urgentes, quas neccebat cavillationes sol-
vissent. Iudicio ergo ex una parte facto,
denuo poterat eadem causa disceptari, nec
sententia eo modo lata poterat in rei ju-
dicatae vim transire; præsertim cum sta-
tim de Pelagii dolis, qui subinde detecti
sunt, viri pii & eruditi conquesti fuerint.
Hinc est quod Augustinus observat ut
rem magnimomenti, accusatores ad diem
synodi occurrere non potuisse, & illis ab-
sentibus, licet perlecto libello, Pelagium
absolutum. Per idem tempus in oriente, in

Aug. lib. 2.

retract. c.

47.

Syria, Palæstina Pelagius à quibusdam catholicis fratribus ad episcopalia gesta perductus, eisque absentibus qui de illo libellum derant, quoniam ad diem synodi non potuerunt occurtere, ab Episcopis quatuordecim auditus est; ubi eum dogmata ipsa damnantem quæ inimica gratiæ Dei adversus eum de libello legebantur, catholicum pronuntiaverunt. Idem auctor iisdem Episcopis libro primo contra Julianum cap. v. Pelagium *ut homines*, nullo ex altera parte urgente adversario, putantes catholicum, tamquam catholicum pronuntiaverunt. Quare cùm synodus ista Pelagi artibus delusa fuerit, miserabilem synodum Hieronymus eam appellavit; Hieron. epist.
79.

Pelagij fautores in Hieronymum, qui sui tuendi causa ad turrem munitionem se recepit, & in ejus monasteria cædibus & incendiis crudelissimè grassati sunt, teste Augustino in libro de gestis Pelagianorum.

II. In his itaque angustiis, hinc Pelagi à synodo absoluti, inde erroris redivi-
vi, quem nec à se ejuratum Pelagius jactabat, inducta nova gratiæ Dei interpreta-
tione, Eros & Lazarus accusatores instau-
randum esse judicium arbitrati sunt. Por-
rò cùm juxta canones Antiochenos ma-
jor synodus minorem discutere debeat,

O P V S C V L A

332

certum est Pelagii causam vel apud orientis universi Exarchum, Antiochenum Episcopum, agendam fuisse, vel sanè apud Romanum Pontificem, cùm causa communis esset & universalem Ecclesiam contingenter. Hoc ergo consilium ceperunt Hieronymo sine dubio auctore, ut per Orosium Presbyterum in Africam redeuntem Episcopos Africanos literis monerent de iis quæ Diospoli gesta erant & de gravi illo discrimine in quo vera fides versabatur ob Pelagii absolutionem præproperè & præpostorè factam. Non se contulere Carthaginem, tum quia eorum præsentia necessaria non erat, cùm rei absentes essent, tum quia ex ægritudine nondum erant restituti. Quò alludit Zosimus cùm illis exprobrat iratus quòd otiosi & delicati in lectoribus suis resedissent, ut patebit ex loco inferius proferendo. Adeundorum Africanorum hic color fuit quòd de hac causa ante quinquennium adversus Cœlestium ea decrevissent quæ absolutione Pelagii subverti videbantur. Veritatis ergo Christianæ tuendæ suique decreti propugnandi causa in hæresim istam Carthagine synodus provinciæ proconsularis coacta sub Aurelio anno ccccxvi. inquisivit, & statim ejus exemplo synodus quoque Numidiæ Milevi habita, cui interfuit

Augustinus. Vtraque synodus, discussio negotio, relationem misit ad Innocentium Papam, ut ipse sua auctoritate firmaret quod Episcopi censuissent de damnando Pelagio & Cælestio eorumque hæresi.

III. Sanè synodica epistola Concilii Carthaginensis literarum ab Erote & Lazaro missarum per Orosium meminit & judicij Diospolitani, cuius tamen acta nondum ad Africam pervenerant. Non tacent damnationis ante quinquennium adversus Cælestium hujus erroris complicem à Carthaginensi Concilio latæ decretum. Moxque subjungunt: *Quo recitato, quamvis judicatio manifesta constaret, quia illo tempore episcopali judicio excisum hoc tantum vulnus ab Ecclesia videretur, nihilominus tamen id deliberatione communi censimus, hujusmodi persuasionis auctores, Pelagium & Cælestium, quamvis & ad presbyterium idem Cælestius postea pervenisse dicatur, (in Asia scilicet, ut docet synodica Concilii Milevitani) nisi hæc apertissimè anathematizaverint, ipsos anathematizari oportere; ut si ipsorum non potuerit, saltem eorum qui decepti sunt ab eis vel decipi possint, cognita sententia quæ in eos lata est, sanitas procuretur.* Ceterum hic admonendus est lector cognitionem quidem adversus Pe-

Iagium & Cælestium ab hac synodo institutam jurisdictione ordinaria, quæ illos eorumque errores damnandos censuit, non autem illa auctoritate privata qua magistri placita philosophorum vel sectariorum expungere solent. Episcopi enim quod censem in synodo, ut judices controversæ propositæ constituunt.

IV. Non dissimulanda est quæ in contrarium promi potest objectio, Episcopis Africanis nihil competituisse juris in Pelagium, nec retractandæ ejus absolutionis quam impetraverat à synodo Diopolitana, in quam Concilium Carthaginense nullam poterat exercere jurisdictionem. Hoc quidem ultimum certum est, cum illa jurisdictione soli Antiochenæ vel apostolicæ sedi competenteret. Attamen cum de Cælestio judicium olim suscepisset Carthaginensis synodus, poterat in correum ejusdem criminis Pelagium, ne continentia causæ divideretur, inquirere & constituere quid agendum videretur, præcipue cum de fide mota esset quæstio, quæ omnes tangit, & cuius conservandæ sollicitudo omnibus Episcopis imposta est. Sed observandum est temperamentum quod prudenter & necessariò adhibent in dijudicando negotio. Iudicant, sed non pronuntiant. Referunt ad Papam

Innocentium, ut ipse summo jure decernat. Prorsus eo modo se gesserunt quo solebant Praefides provinciarum agere erga Principem, ad quem graviores & difficiliores causas referebant, sententia sua ad eum cum litis actis transmissa antequam litigioribus pronuntiaretur, ut Princeps aut decerneret ipse, aut quid decernendum à Praefide, rescriberet. Extant tituli de relationibus & consultationibus in corpore juris, & earum usus apud Plinium; quæ duplex illud nomen sortitæ, quia referebatur ad Principem, & ipse consulebatur. Relationum quoque synodarum orientis & occidentis ad Romanam sedem exempla supersunt; de quibus nos egimus libro primo de concordia sacerdotii & imperii cap. x.

V. Quare expendenda sunt synodi Carthaginensis verba. *Censuimus, inquiunt, anathematizari oportere.* Definiunt quid agendum videatur, sed non pronuntiant. Id summæ sedi reservant, cuius auctoritas per universam Ecclesiam expansa porrigitur. Quod docent verba sequentia. *Hoc itaque gestum, Domine frater, sanctæ caritati tue intimandum duximus, ut statutis nostræ mediocritatis etiam apostolicæ sedis adhibeatur auctoritas pro tuenda salute multorum & quorundam etiam perversitate corrigenda.* Eodem

tendit synodica Concilii Milevitani, quæ
Episcoporum culpæ imputandum fore ait
si quæ sunt suggesta sedi apostolice
pro Ecclesiæ commodo tacuerint. Qua-
propter de nova hæresi ad Innocentium
rescribunt, ut ipse pastoralem diligen-
tiam magnis periculis adhibeat. *Quia n.*
Dominus gratiæ suæ præcipuo munere in sede
apostolica collocavit, talemque nostris tempori-
bus præstítit ut nobis potius ad culpam negli-
gentiæ valeat si apud tuam venerationem que
pro Ecclesia sunt suggesta tacuerimus quam
ea tu possis vel fastidiosè vel negligenter acci-
pere, magnis periculis infirmorum membrorum
pastoralem diligentiam quæsumus adhibere dig-
nieris. Nova quippe hæresis & nimium per-
nicioſa tentat assurgere inimicorum gratiæ Dei.
adversus quam deinde copioſe disputant.

C A P V T . X V .

Quid egerit Innocentius I. post acceptas
Afrorum literas.

I. **H**ORUM Conciliorum mentem
Innocentius intellectus, qui re-
cripto suo ad synodum Carthaginensem
eos Episcopos laudat quod antiquæ tra-
ditionis exempla sectantes, ad sedis apo-
stolicæ judicium controversiam istam re-
tulissent.

tulissent. Proferenda sunt verba , quæ aliquæ indigent interpretatione, *Inquiendo de his rebus quas omni cum sollicitudine decet à sacerdotibus , maximè à vero iusto & catholico tractari Concilio , antiquæ traditionis exempla sectantes , & ecclesiastice memores disciplinæ , vestræ religionis vigorem non minus nunc in consulendo quam antea cùm pronuntiaretis veneratione firmatis , qui ad nostrum referendam approbas sis esse judiciam , scientes quid apostolicæ sedi (cùm omnes hoc loco positi ipsum sequi desideremus Apostolum) debeatur , à quo ipse episcopatus & tota auctoritas nominis hujus emerit. Ex duplice capite eos laudat , tum quòd olim in hac causa pronuntiassent , nempe adversus Cælestium , tum quòd nunc venerationem debitam sedi apostolicæ conservent ; eam consulendo , & omnia ad ejus referendo judicium. Quam quidem venerationem etiam cùm adversus Cælestium pronuntiarent custodisse testatur Innocentius. Quod significat eadem sententia constitutum ut gesta ad sedem apostolicam mitterentur pro more in causa communi totius Ecclesiæ observari solito ; quem à Diopolitanis judicibus omissum miratur Innocentius , ut statim patebit. Referendo autem ad sedem apostolicam , patrum insti-*

Y

tuta custodisse illos asserit , quæ illi non
humana sed divina decrevere sententia , ut quæ
quid quamvis de disjunctis remotisque provin-
ciis ageretur non prius ducerent finendum nisi
ad hujus sedis notitiam perveniret , ut tota hujus
auctoritate justa quæ fuerit pronuntiatio firma-
retur , indeque sumerent ceteræ Ecclesiæ quid
præcipere & quid vitare deberent.

II. Ut autem manifestius sit discussam
fuisse ab Episcopis quæstionem , hæresim
quoque damnatam , sed nondum promul-
gatam sententiam , quæ decreto sedis apo-
stolicæ proculdubio egebatur ut omnes te-
neret , addit : *Gratulor igitur , fratres con-
fissimi , quod per fratrem & coëpiscopum nostrum
Iulium literas ad nos destinasti ; & cum pro
illis curam geritis quibus præsidetis Ecclesiæ ,
sollicitudinem vestram pro omnium utilitate
monstratis , & per cunctas totius orbis Eccle-
siæ quod omnibus profit decernendum esse unda
depositis ; ut suis constabilita regulis Ecclesiæ ,
& hoc quod illos caveat , pronuntiationis iusta
firmata decretalibus patere non possit , qui per-
versis instructi imo destructi verborum argutii ,
sub imagine catholice fidei disputantes , totam
veri dogmatis querunt everttere disciplinam .*
Qui locus integer describendus fuit ut
ostenderetur Africanos rem discussisse &
quid decernendum esset ab Innocentio
poposcisse , ut universa Ecclesia generali

constituto stabiliretur. Interim corrigenda sunt verba quæ in omnibus exemplari bus perversè leguntur, & sic reponendum: *Vt suis constabilita regulis Ecclesia & habeat quo illos caveat, & pronuntiationis justæ firmata decretalibus, patere non possit iis qui*

&c. Ceterum quemadmodum decreta Principis dicebantur quæ cognitione habita controversiam dirimebant, sic quoque Romani Pontifices sua rescripta, quibus aliquid in perpetuum & generaliter constituebatur, decreta & decretalia vocavere. Vnde Siricius in epistola ad Himerium ait missa ad provincias à Liberio prædecessore suo generalia decreta. Et idem Innocentius decretalia constituta appellat.

III. *Vt autem Innocentii religio manifestius instrueretur, Aurelius, Alypius, Augustinus, Evodius, & Possidius Episcopi epistola familiari cum monuerunt Pelagii causam à pluribus in urbe foveri, Diopolitanam synodum ab eo delusam ambigua gratiæ significatione. Tum Pelagi librum miserunt à Iacobo & Timasio adolescentibus, illius quondam discipulis, subministratum, in quo gratiam conditionis agnoscit, non gratiam Christi: cui responderat Augustinus altero libro, nempe De natura & gratia, quem Inno-*

Y ij

centio simul transmisere. *Signa* fecimus hi locis, inquiunt, ubi petimus inspicere non graviteris quemadmodum sibi objecta quæstione quod gratiam Dei negaret, ita respondit ut eam non diceret nisi naturam in qua nos condidit Deus. Instructo probationibus negotio, adjiciunt quoque consilium suum, ut aut Pelagium evocet Romam, aut cum eo literis agat ut respondeat quam intelligat gratiam.

I V. Innocentius tam atroci quæ Christi gratiæ fiebat injuria commotus, post longam disputationem duo quædam constituit rescriptis suis ad utramque synodum datis. Ac primò quidem nefarium dogma Pelagii condemnat ut regulæ fidei contrarium. *Quisquis ergo huic assentiens videtur esse sententiæ, quo dicat adjutorio nobis non opus esse divino, inimicum se catholice fidei & Dei beneficiis profitetur indignum,* inquit in epistola ad synodum Carthaginensem. Deinde auctores hæreseos à communione separat donec resipiscant, quos nominatim appellat in rescripto ad Concilium Milvitanum. *Quare Pelagium Cœlestiumque, id est, inventores vocum novarum, quæ, sicut dicit Apostolus, ædificationis nihilum sed magis vanissimas consueverunt parere quæstiones ecclesiastica communione privari apostolici vigoris auctoritate censemus donec resipiscant,*

diaboli laqueis, à quo captivi tenentur secundum ipsius voluntatem, eosque interim dominico ovili non recipi quoad ipsi perversæ viæ quam securi sunt tramitem deferere voluerint.

V. Porrò epistolæ quoque Episcoporum quinque respondit, nescire se an in urbe sint qui Pelagii doctrinæ faveant, saltem latere, nec similia jactare. Quod attinet ad purgationem Pelagii in oriente actam, habere se quidem ait gesta episcopalia à laicis hominibus ad se perlata, sed dubitare an vera sint, quod sub nulla illius Concilii prosecutione venerant, nec eorum aliquas accepimus de hac re literas apud quos ipsius rei iste præstigit causas. Quod si de sua illa potuisset purgatione confidere, hoc magis credimus quod egisset quod multò verius esse poterat, ut illos cogeret epistolis suis quid judicaverant indicare. Nullam actorum synodi Diopolitanæ rationem habet, quoniam Episcoporum relatione (ut debuit, cum de causa communi ageretur) de iis certior factus non esset. Præterea verò hanc adiungit causam, nempe quod ex gestorum lectione pateat judicibus subreptum fuisse per cavillatorias Pelagii responsiones, atque adeo aliqua magis falsis argumentis, inquit, quam vera ratione, ut ad tempus videri poterat, purgavit, alia negando, alia falsa interpretatione vertendo. Quare rectè con-

Y iij

cludit , ne judicium gravitatem lœdat , nec
sue au^ctoritati detrahat , totumque dam-
nationis pondus refundat in reum : *Vnde*
non possumus illorum nec approbare nec culpan
judicium , (quod alioqui in ejus potestate
*situm erat , qua statim utitur) cùm nesciu-
mus utrum vera sint gesta , aut si vera sunt ,*
illum constet magis subterfugisse quam se tota
veritate purgasse . Illum itaque non habet
pro absoluto & purgato ab accusatione
quam Episcopi Gallicani instituerant ,
etsi à synodo Diopolitana absolutus
fuerit .

VII. Noluit autem Innocentius Pela-
gium evocare Romam aut cum eo per li-
teras agere , ut monebant quinque Epis-
copi , sed suo ipsius libro convictum com-
munione privavit . Nefas putabit aliquis
& alienum à judiciorum ordine , inauditum
hominem damnare . Sed si quis expendat
veterem usum , inveniet sceleris alicuius
homicidii puta , per testes convictum , sta-
tim communione abstinentum , nulla ad-
monitione prævia qua vocaretur ad se
purgandum ; ut censura illa coactus , ad
Episcopum accederet , aut innocentiam
suam probaturus , aut confessione crimen
agnoscens , beneficium pœnitentiæ peti-
turus . Quod tanto accuratiüs observan-
dum erat in hæreseos criminе quanto di-

ligentiū est huic morbo occurrentum. Recte itaque & juxta vetustum illum monrem subjungit Innocentius de Pelagio loquens : *Qui si confidit, novitque non nostra dignum damnatione quod dicat jam hoc se totum refutasse quod dixerat, non à nobis accersiri, sed ipse debet potius festinare ut possit absolvī*, scilicet ab excommunicatione quam nunc illum Innocentius percellit, non ab aliqua anteriore quam Baronius comminiscitur.

VII. Ex iis quæ retuli patet primam quæ Pelagio inficta est damnationem ab apostolica sede processisse. Addo etiam ab eadem sede primū Pelagii atque Cælestii illius discipuli dogma proscriptum, tamquam fidei catholicæ contrarium, generali decreto. Sanè Carthaginensis synodus anno ccccxi repulit Cælestium à presbyterio & ab Ecclesiæ communione quod errores illos spargeret. Sed hæc erat privata in eum hominem censura, quam ille appellatione ad Romanam sедem se clusisse putabat ; ipsique adeo Africani ad eam referendum tunc quoque censuerant ; à qua proinde totius rei definitio expectabatur. Itaque Prosper non immerito Romanæ sedi primam Pelagianæ hæreseos damnationem tribuit his versibus in carmine Dei ingratis.

Y iiij

*Pestem subeuntem prima recidit
Sedes Roma Petri, quæ pastoralis honoris
Facta caput mundo, quicquid non possidet armis
Religione tenet. Non segnior inde orientis
Rectorum cura emicuit.*

Hic agitur de damnatione ab Innocentio edita, & de nulla alia; ne quis cum Baronio referat ad sententiam Siricii adversus Iovinianum; qui licet Pelagio prævisse videri posset teste Hieronymo, hic tamen de ipsa Pelagiana hæresi loquitur Prosper, & de judicio Innocentii, quod postea Zosimus fecutus est. Vnde ad Innocentii, non autem ad Zosimi decretum hæc verba referre oportet, ut putabat M. Antonius Capellus. Ceterum Innocentius *Pelagianam hæresim primus condemnavit;* ut loquitur Facundus Hermianensis, & rei gestæ series ostendit.

Facund.
lib. 7. c. 3.

VIII. Enimvero non leve viris eruditis negotium facevit quod subjungit Prosper, Palæstinorum Episcoporum in oriente judicio, id est, synodi Diospolitanae, dogma quoque Pelagianum condemnatum, quod cum actum fuerit anno cccc-xv. & rescripta Innocentii ad synodos Africanas promulgata sint anno cccc-xvi. primi videntur Episcopi illi hac de re decreuisse. Sed facilis est responsio. Pelagium illi non condemnarunt, absol-

verunt per ignorantiam facti; & quamvis gratiam Christi probarent, seque illius vindices gererent, non damnavere ignotos sibi per Pelagii versutiam errores. Eorum itaque cura profuit Ecclesiæ ad asserendam gratiam, sed nullo eorum decreto hæresis ignota proscribi disertè potuit.

IX. Gravior est quæ procedit ex unico apud Prosperum verbo difficultas, à qua se eruditissimus Petavius expedire non potuit. Videtur enim significare, post damnatam Pelagii hæresim, in oriente Palæstinos Episcopos judicasse, *Inde orientis rectorum cura emicuit*, cùm certum sit judicium Diospolitanum antecessisse duobus annis Romani Pontificis decretum. *Inde* hoc in verisu non tempus, ut putant, sed locum significat. Scribebat Prosper in occidente, & habita ratione climatum ait, *Inde orientis rectorum cura emicuit*; ac si diceret: *Hinc* in occidente pestis adversus gratiam recisa est, & *Inde* in oriente ejus quoque rei curam gesserunt Episcopi Palæstini.



C A P V T X V I.

*Quid post Innocentium Papam egerit in eadem
causa Zosimus illius successor.*

I. **D**A M N A T I O ab Innocentio irrogata Pelagium atque Cælestium commovit adeo ut ambo sedi apostolicæ facti sui rationem dare sategerint, Pelagius quidem scriptis ad Innocentium ex Palæstina literis, quæ successori ejus Zosimo traditæ sunt, Cælestius verò Romam adiit, Zosimoque se purgare voluit, libello de fide sua edito : cuius verba cùm veram fidem de gratia redolerent, non tam de dogmate quærendum videbatur quàm de Cælestii absolutione, qui præpropera & præfestinata cognitione ab Africanis Innocentio subrepentibus fervore fidei oppressus existimabatur à Zosimo, ut ipse testatur in epistola ad Africanos data. Non esse locum conjecturæ ait an bene sentiret Cælestius, cùm ejus verba manifesta extarent inserta gestis habitis in basilica sancti Clementis, ubi cognitio ea de re instituta est à Zosimo. Addit ab ipsis Africanis Episcopis in hac causa, quando præsens Cælestius Carthagine auditus est, nihil liquidò judicatum,

Quod autem attinet ad literas Erotis & Lazari, eas fidem non facere, quod absentibus adversis absentem fides adhiberi non debeat, tum etiam quod vix Cælestio cogniti, nullum de talibus contentionibus cum eo sermonem habuissent. Deinde quod eorum testimonium admitti non debeat qui ordinationibus inordinatis, clero & plebe contradicente, *cum alienigenæ intra Gallias sacerdotia vendicas-*
sent, illis pulsi fuissent, & gradu atque
communione à Zosimo summoti. Quare videri retorquendum in melius judicium. Attamen ne præcox & immaturum procederet, constituit ad Africanos gesta cum literis suis transmittere; præcipitque *intra secundum mensem aut ven-*
re qui præsentem redarguant aliter senti-
re quam libellis & confessione contexuit, aut
nihil, post hæc tam aperta & manifesta quæ
protulit, dubii sanctitas vestra resedisse cog-
noscat.

II. Statim post datam priorem illam epistolam lectæ sunt Pelagii literæ coram Zosimo, quas ad decessorem illius Innocentium scripserat; quæ Praylii Episcopi Hierosolymitani, qui Ioannis successor erat, astipulatione nitebantur. Illis fidem absolutam de gratia sine fuko profiteri vi-
sus est, adeo ut miraretur Pontifex talem

virum infamari potuisse. Qua de re gra-
viùs cum Africanis secunda epistola ex-
postulat, & acrìùs in accusatores Erotem
& Lazarum invehitur, velut in procellæ
istiūs auctores, & sacerdotiis suis multa-
tos, quibus propterea fides adhiberi non
debeat. Neque porrò credendum ado-
lescentibus Timasio & Iacobo, qui scripta
quædam velut Pelagii prodiderant. Præ-
stò esse reos sedi apostolicæ, abesse accu-
satores illos, imò verò nec præsentes fuil-
se quando judicium prius latum est. Ni-
hil agi nisi præsens reus præsentibus ac-
cusatoribus arguatur. mature agitanda esse
judicia. quam in rem multa congerit. Tan-
dém exemplaria scriptæ professionis quam
Pelagius miserat ad Africanos transmit-
tit, ut de absoluta ejus fide gaudium ca-
piant.

III. Vbi observanda sunt duo. Zo-
simum binis istis literis nullam & invali-
dam fuisse relationem Concilii Carthagi-
nensis ostendit, quia nimis præproperè
facta, reis nec præsentibus nec per scrip-
ta saltem auditis, absentibus accusato-
toribus, contra judiciorum ordinem; præ-
cipuè cùm adversùs personam accusato-
rum, scilicet Erotem & Lazarum, excipi
posset eos non esse admittendos ob cri-
mina perpetrata & gradus communionis.

que jacturam ; nec credendum duobus adolescentibus Iacobo & Timasio. qua relatione subversa , sequebatur Innocenti damnationem , quæ illi innixa erat , esse nullam ; licet de illa in Zosimi literis altum silentium. Quamvis nec cognitionis quoque ab Innocentia factæ vitium omnino dissimulet , quod constituit præcipue in accusatorum absentia. Quò tendunt hæc verba : *Grave fuit Lazaro & Eroti litterarum suarum pedissequos esse. scilicet accedendo Romam aut Carthaginem. An nesciebant dilectionem vestram ad sedem apostolicam relaturam ? Huc certo calumniæ compendio navigassent. Vbi de episcopatu abdicando agitur , id est , de submovendis Erote & Lazaro , maria terraque lustrantur , nec ulla suffragia pretermittunt. Vbi vero innocentium fama percellitur , otiosi & delicati sive accusatores sive testes (In utroque enim fallentibus nomen infame est) in cubilibus & lectulis suis literis abutuntur , & totam Africam universumque tranquillum catholicæ serenitatis innubilant ad libidines suas duc peses. Non erat tamen quòd tam graviter excandesceret Zosimus ob sententiæ invaliditatem. Duplex enim erat excommunicacionis genus ; alterum quod post interrogacionem reo legitimè convicto aut etiam confessio infligebatur , quo usus tandem*

ipse Zosimus , ut mox dicam , adversus Pelagium & Cælestium ; alterum quo reus probationibus pressus , communione sum movebatur donec innocentiam suam pur garet. Quo secundo genere usus est Innocentius adversus eosdem novatores. Quæ distinctio controversiam istam componit.

IV. Ceterum quod observandum se cundò dixeram positum est in expenden da Zosimi de Pelagio & Cælestio opinio nè , quos ille sanæ fidei & *absolutæ* , ut loquitur , esse putabat & injuriosè vexatos , cùm disertis verbis gratiæ adjutorium profiterentur , nondum deprehensa verbi pellum hominum astutia & nova gratiæ interpretatione , & adderent libellis suis , *si minus peritè aut parum cautè aliquid fori possum effet* , emendari cupere à Zosimo , qui Petri fidem & sedem teneret . quæ est ultima clausula professionis Pelagii .

V. Acceptis Pontificis literis , Africa ni Concilio cc x i v . Episcoporum apud Carthaginem coacto liberius conquisti sunt quòd eos homines tueretur qui semel damnati non poterant judicium restituere nisi disertissimè errores à se olim professos configerent . Implexas demum istius scenæ strophas aperiunt , & petitio nibus Cælestii atque Pelagii ad se millis respondent ; ut patet ex epistola sequente

Zosimi. Ex hac epistola, qua caremus, de-
sumpta sunt verba quæ Prosper citat ad-
versus collatorem: *Erraverunt ducenti qua-*
tuordecim sacerdotes, qui in epistola quam suis
constitutionibus prætulerunt ita apostolicæ sedis
antistitem beatum Zosimum sunt allocuti: Con-
stituimus in Peligium atque Cœlestum per
venerabilem Innocentium de beatissimi Petri
sede prolatam manere sententiam, donec aper-
tissima confessione fateantur gratiam Dei per
Iesum Christum, non solum ad cognoscendam,
verum etiam ad faciendam justitiam, nos per
actus singulos adjuvare, ita ut sine illa nihil
veræ sanctæque pietatis habere, cogitare, di-
cere, agere valeamus. Sanè Zosimus tantisper
quoque accensus est, ac si de aposto-
licæ sedis privilegio, quo ex divina pro-
missione & canonica auctoritate potiri se
ait ut de illius sententia nullus retractare
possit, aliquo modo detraherent. Et tan-
dem docet epistola sua ad Aurelium & ce-
teros qui in Concilio Carthaginensi ad-
fuerant data se nihil immutasse, sed in eo-
dem statu reliquisse cuncta donec Africa-
norum literis in commune consuluisse:
quia, ut ait ille, nunquam temerè quæ sunt
dù tractanda finiuntur, nec sine magna deli-
beratione statuendum est quod summo debet dis-
ceptari judicio.

V.I. Ac certum quidem est ex Augu-

stino lib. 11. de peccato orig. cap. vii. Cælestium , licet falsis suggestionibus Pontifici obrepentem , nunquam excommunicatione solutum fuisse. Zosimus quippe consulere cum Africanis voluit ; non quasi nesciret quid fieri deberet ; sed pariter vobiscum voluimus , inquit , habere tractatum de illo qui apud vos , sicut ipsi per literas dicitis , fuerit accusatus , & ad nostram , qui se assereret innocentem , non refugiens iudicium , ex appellatione pristina venerit sedem , accusatores suos ultro deposcens , & quæ in se crimina per rumorem falsò dicebat esse illata condemnans.

VII. Africanorum literis , quibus adjectus erat libellus Paulini Diaconi adversus Cælestium olim oblatus , plenissimè instructus Pontifex , fraudem & imposturam Pelagii atque Cælestii detexit . Quod probat insignis Facundi Hermianensis locus : *Invenient postremo beatum quoque Zosimum apostolicæ sedis antistitem contra sancti Innocentii successoris sui sententiam , qui primus Pelagianam hæresim condemnavit , sedem ipsius Pelagii ejusque complicis Cælestii , quem in Ecclesia Carthaginensi convictum atque appellantem apostolicam sedem & ipse gestis discusserat , tamquam veram & catholicam iudantem , insuper etiam Africanos culpantem Episcopos quod ab illis hæretici crederentur ,*

Facund.
lib. 7. c. 3.

cum necdum ipsi Africanis Episcopis dolos eorum multò manifestius detegentibus, memoratos Pelagium & Cælestium putaret orthodoxos. Et tamen nec Athanasium nec Damasum nec illos Palæstinos Episcopos & Zosimum hæreticos credit Ecclesia, quia de hæreticis bene senserant, sed potius pro merito sue fidei catholicos judicat & honorat; quoniam non debet criminis deputari simplicium non intellecta veritate malignorum.

VIII. Quare Zosimus, propalata sibi hæreticorum fraude, accersitum Cælestium, cùm se subtraheret examini, nolle que respondere Paulini libello, atque Pelagium ejusdem criminis reuin decreto suo damnavit, teste Augustino libro secundo contra duas epistolas Pelagianorum cap. III. & IV. Id factum intervallo ipso quod est inter diem XXI. Martii anni CCCXVIII. (qua data est epistola Zosimi ad Africanos) & diem XXIX. Aprilis, qua eadem epistola accepta est. Quod constat ex edicto Honorii adversus ambos lato pridie Kalendas Maias. Neque enim proscripti essent Principis decreto pendente cognitione de eorum fide apud Pontificem, sed post sententiam adversus eos à Zosimo decretam, cùm in his rerum articulis leges Principum non antecedant judicia ecclesiastica, sed subse-

Z

quantur, eaque munitant auctoritate pū-
blica, & pœnis legum reos coērceant.

I X. Interim Carthaginæ coactum est
aliud plenarium Concilium ducentorum
decem & septem Episcoporum ipsis Ka-
lendis Maiis, quod Zosimi literas, quas
acceperant tertio Kalendas Maias, per-
pendens, cùm in suspenso videret Cæ-
lestii causam privatam, ne publica & com-
munis, quæ universam Ecclesiam contin-
gebat, quia nondum fatis explicata fue-
rat, adversariorum cavillationibus in dif-
crimen adduci posset, constituit octo ca-
nones quibus fidem veram explicat & hæ-
resim robustè conficit. His constitutioni-
bus à se nunc editis Africani prætulerant
pistolam Concilii præcedentis, ut loquitur
Prosper, id est, ante aliquod tempus misse-
rant Romam; nunc autem synodalia decre-
ta seu canones octo à se editos in hoc Con-
cilio c c x v i i . Episcoporum ad Zosimum
dirigunt, quos ille anno eodem ccccxviii.
edicto generali probavit; sicque per uni-
versum orbem Christianum hæresis Pela-
giana damnata est. Hæc sunt ad eam rem
probandam verba Prosperi in chronicō
anno c c c x v i i l . *Concilio apud Cartha-
ginen habito ducentorum decem & septem Epis-
coporum, ad Pontificem Zosimum synodalia
decreta perlata sunt; quibus probatis, per to-*

um mundum hæresis Pelagiana damnata est.

X. Hunc ergo ordinem secutus est Zosimus in cognitione ista. Libello Cælestii literisque Pelagii receptis , monuit Africanos per binas literas datas mense Octobris anni **ccccxvii**. ut mitterent aliquos intra secundum mensem qui reos istos peragerent. Annī sequentis exordio Concilium Carthaginē cogitūr **ccxi v.** Episcoporum , quod amplissima epistola ad Zosimum scripta fraudes hæreticorum detegit. Eam se recepisse testatur Zosimus epistola quam dedit **xxi.** Martii anni **ccccxviii.** ad Aurelium & ad ceteros qui affuerunt Concilio Carthaginensi. Vnde patet prius Concilium solutum fuisse. Postea detectis Pelagi & Cælestii do- lis, eos damnat tamquam de criminē sibi imposito convictos , & proscribi curat ab Honorio pridie Kalendas Maias.

XI. Celebratur aliud CarthaginēConci- lium plenarium **ccxvii.** Episcoporum Kalendis Maiis ; quod antequam rescire potuisset Pelagi damnationem , octo capita constituit, quæ fanciendæ & stabiliendæ fi- dei causa mittit ad Zosimum. Ille verò ut reos damnaverat , ita causam ipsam & hæ- resim edicto generali configit epistola ge- nerali ad universos Episcopos data ; quæ quidem non extat, sed laudatur à Cælestino

Z ij

Papa in epistola ad Gallos cap. viii. dicaturque *Papæ Zosimi regularis auctoritas ad totius orbis Episcopos*; eamque mox laudat cap. ix. qua probati sunt canones hujus synodi Carthaginensis, ut patet ex academ Cælestini epistola cap. iii. *Africanorum sententias suas fecerunt apostolici antifitites cum probarent.*

XII. Hujus decreti à Zosimo editi tempus incidit in annum cccc xviii. (ut patet ex chronicō Prosperi) post habitum Carthaginense Concilium. Quare non assentimur eruditissimo viro Petavio, qui decretum illud Zosimi ad Africanos prius delatum putat, eoque accepto Episcopos illos in Concilio Cathaginem Kalendis Maiis eiusdem anni cccc xviii. Pelagianam hæresim octo canonibus editis anathemati subjecisse. Decretum generale Zosimi adversus Pelagianam hæresim editum est post receptos synodi Carthaginensis canones, ut disertè docet Prosper in chronicō. Sententia verò lata adversus nomen Pelagii & Cælestii antecedit Kalendas Maias anni cccc xviii. ut dixi. Hallucinatio itaque versatur in eo quod duo ista decreta, generale & privatum, inter se miscentur à viris doctissimis, quæ distingui oportet. Ceterūm licet canones synodi Carthaginensis editi

sint ante Zosimi decretum in re aperta, de qua Romanæ Ecclesiæ eadem erat cum Africana sententia, & in qua definienda isthæc Innocentium sequi se profitebatur auctorem, attamen eorum capitum relatio ex more facta est ad Zosimum; ut apostolicæ sedis auctoritate accedente, quod erat limitibus Africæ circumscriptum, universæ Ecclesiæ per occidentem & orientem regula fieret ecclesiasticæ fidei. Huic Pontifici ea de re Afri Episcopi gratias egerunt literis suis quas ad eundem Zosimum scripserunt, ut patet ex Cælestino in epistola ad Gallos cap. v i i. Laudato enim ex Zosimi epistola regulari testimonio, addit: *Hunc autem sermonem sincerissimæ veritatis luce radiantem tanto Afri Episcopi honore venerati sunt ut ita ad eundem virum scriberent: Illud verò quod in literis quas in universas provincias curasti esse mittendas posuisti dicens &c.*

Auctoritates
de gratia
Dei c. s.

XIII. Quare ut initio hujus dissertationis excitata difficultas solvatur, certum est primam, quæ peremptoria fuit, & generalem hæresis Pelagianæ damnationem ab Innocentio profectam, quam deinde Zosimus decreto suo generali ad totius orbis Episcopos dato confirmavit, Vterque verò Pontificum relationibus Carthaginensium Conciliorum usus,

Z iiij

auctoritate Romanæ sedis negotium omnne constituit,

INTERPRETATIO CAPITIS

Clericus. 3. quæst. 4.

I. **V**Æ R U N T anxiè viri eruditi quid significare velit Stephanus à Gratiano relatus cap. *Clericus. 3. q. 4.* cùm statuit clericum qui Episcopo suo insidatus fuerit, à gradu removeri debere, & curiæ tradi serviturum. Quidam corpus curialium intelligunt, cui clericus vilia ministeria obiturus addicatur. Quidam verò forum & curiam secularium judicam, quorum sententia debitam pœnam suscipiat; quemadmodum in eadem specie clerici suo Episcopo insidias molientis decrevit Pius Papa apud Gratianum cap. *Si quis sacerdotum. 11. q. 1.* Posteriores Pontifices horum decretorum verbis utentes, clericum tradi curiæ sic interpretati sunt ut de judicibus publicis & eorum curia, non autem de corpore curialium, intelligant. Sed non admunt scrupulum quem verba Stephani injiciunt, qui tradi curiæ serviturum decernit. Quæ servitia, ut collegio curialium competere possint;